



ҮНДЭСНИЙ
СТАТИСТИКИЙН
ХОРОО



Schweizerische Eidgenossenschaft
Confédération suisse
Confederazione Svizzera
Confederaziun svizra

Swiss Agency for Development
and Cooperation SDC
Швейцарын хөгжлийн агентлаг

МОНГОЛ ДАХЬ НИЙГМИЙН ШИЛЖИЛТ 2010-2020 ОНД:

ХҮН АМ, ОРОН СУУЦНЫ ТООЛЛОГЫН
ӨГӨГДӨЛД ХИЙСЭН ШИНЖИЛГЭЭ

Энэхүү хэвлэлд илэрхийлсэн үзэл бодол нь зөвхөн судлаачдын бөгөөд Олон улсын шилжилт хөдөлгөөний байгууллага (ОУШХБ)-н бодлого, байр суурийг төлөөлөхгүй болно. Аливаа нэг улс орон эсвэл газар зүйн бүс нутгийн хувьд хийсэн хэмжилтүүд нь ОУШХБ тухайн улс орон, бүс нутгийн хууль эрх зүйн болон бусад байдлын тухайд ямар нэгэн дүгнэлт, байр суурь илэрхийлээгүй болно.

Эшлэл: Олон улсын шилжилт хөдөлгөөний байгууллага (ОУШХБ), Үндэсний Статистикийн Хороо, Монгол Улсын Их Сургууль 2023. Монгол дахь нийгмийн шилжилт 2010-2020 онд: Хүн ам, орон сууцны тооллогын өгөгдөлд хийсэн шинжилгээ. ҮСХ, Улаанбаатар. Монгол Улс.

ТАЛАРХАЛ

Монгол дахь нийгмийн шилжилт 2010-2020 онд: Хүн ам, орон сууцны тооллогын өгөгдөлд хийсэн шинжилгээг олон байгууллага, хамт олон, хувь хүний дэмжлэгтэйгээр хийж гүйцэтгэлээ. Судалгааг хийхэд үнэ цэнэтэй санал зөвлөмж өгч, хамтран ажилласан, дэмжлэг үзүүлсэн дараах байгууллага, хамт олон, хувь хүмүүст судалгааны багийн хамт олныхоо өмнөөс багийн хамт олны өмнөөс гүн талархал илэрхийлье. Үүнд, ОУШХБ-ын хамт олон – Хөтөлбөрийн менежер Daniel Kweku Sam болон зөвлөх Г.Гэрэлтогтох нарт судалгааны ажлыг хийхэд санхүүжилтийн дэмжлэг үзүүлэн, удирдлага, зохицуулалтаар хангаж, үнэтэй санал зөвлөмж өгсөнд их талархаж байна. ҮСХ-ны

хамт олон, ялангуяа, ҮСХ-ны дарга Б.Батдаваа, дэд дарга Д.Лхамсүрэн, Тамгын газрын дарга Б.Лхагвасүрэн, Тооллого өгөгдлийн шинжилгээний газрын дарга Ш.Ариунболд, Хүн ам, орон сууцны тооллогын хэлтсийн дарга О.Мандахзориг нарт болон ҮСХ-ны Тооллого, өгөгдлийн шинжилгээний газрын хамт олонд уг судалгааны ажлыг гүйцэтгэхэд дата өгөгдөл ашиглах, холбоход үнэтэй санал зөвлөмж өгч, аргачлалаар ханган, хамтран ажилласанд, тоон өгөгдөл дээр хамтран ажилласан Швейцарын Бернийн их сургуулийн судлаач П.Авралт-Од, болон МУИС-ийн ахьсан түвшний оюутнууд Ө.Дуламсүрэн, Э.Ундрал нарт тоон өгөгдлийн алдааг хянах ажилд тусалсанд гүн талархал илэрхийлье.

Судалгааны ажлыг гүйцэтгэсэн:

Б.Отгонтөгс

Судалгааны багийн ахлагч, МУИС-ийн Шинжлэх ухааны сургуулийн эдийн засгийн тэнхмийн багш, эдийн засгийн ухааны доктор, профессор

З.Манлайбаатар

Эдийн Засгийн Хүрээлэнгийн ахлах судлаач,

О.Мөнхбат

МУИС-ийн Шинжлэх ухааны сургуулийн социологийн тэнхмийн багш, социологийн ухааны доктор, профессор

Судалгааны тайланг бэлтгэсэн:

Б.Отгонтөгс

Судалгааны багийн ахлагч, МУИС-ийн Шинжлэх ухааны сургуулийн эдийн засгийн тэнхмийн багш, эдийн засгийн ухааны доктор, профессор

З.Манлайбаатар

Эдийн Засгийн Хүрээлэнгийн ахлах судлаач,

О.Мөнхбат

МУИС-ийн Шинжлэх ухааны сургуулийн социологийн тэнхмийн багш, социологийн ухааны доктор, профессор

Ц.Болд

МУИС-ийн Шинжлэх ухааны сургуулийн социологийн тэнхмийн багш

Э. Номин

МУИС-ийн Шинжлэх ухааны сургуулийн эдийн засгийн тэнхим дэх эрдэм шинжилгээний туслах ажилтан

Мэдээлэл боловсруулсан:

З.Манлайбаатар

Эдийн Засгийн Хүрээлэнгийн ахлах судлаач,

П.Авралт-Од

Швейцарын Бернийн их сургуулийн судлаач,

Б.Отгонтөгс

Судалгааны багийн ахлагч, МУИС-ийн Шинжлэх ухааны сургуулийн эдийн засгийн тэнхмийн багш, эдийн засгийн ухааны доктор, профессор

О.Мандахзориг

Хүн ам, орон сууцны тооллогын хэлтсийн дарга

Ө. Дуламсүрэн

МУИС-ийн эдийн засгийн, магистрын хөтөлбөрийн оюутан

Э.Ундрал

МУИС-ийн эдийн засгийн, магистрын хөтөлбөрийн оюутан

ТОВЧИЛСОН ҮГИЙН ТАЙЛБАР

БНМАУ -	Бүгд Найрамдах Монгол ард Улс
ҮСХ -	Үндэсний статистикийн хороо
ХАОСТ -	Хүн ам, орон сууцны тооллого
ОУХБ -	Олон Улсын Хөдөлмөрийн Байгууллага
ОУШХБ -	Олон Улсын Шилжилт хөдөлгөөний Байгууллага
ТЭЗУХ -	Төлөвлөгөөт Эдийн Засгийн Улсын Хороо
ШУА -	Шинжлэх Ухааны Академи
ЮНЭСКО -	Нэгдсэн Үндэстний Байгууллагын боловсрол, шинжлэх ухаан, соёлын байгууллага
ДБ -	Дэлхийн банк



ХУРААНГУЙ

Энэ судалгааны тайланд бид Монгол Улсад 2010-2020 онуудын хооронд явагдсан үе хоорондын болон үе доторхи нийгмийн шилжилт хэрхэн явагдсаныг 2010, 2020 оны Хүн ам, орон сууцны тооллогын нээлттэй тоон мэдээллийг ашиглан нийт хүн амын 30 хувийн мэдээллийг агуулсан панел өгөгдөл үүсгэн тэдний боловсролын түвшин, хөдөлмөр эрхлэлт, орон сууцны нөхцөл байдлын өөрчлөлтөөр Монгол Улсын хувьд анх удаа хэмжиж харууллаа.

Манай улсын хувьд албан боловсролын хамрагдалт өндөр байдаг учраас ялангуяа өсвөр насны хүүхэд залуусын дунд боловсролын түвшин дээшлэх шилжилт сайн явагджээ. Гэхдээ боловсролын үе доторх шилжилт хүн амын бүлгүүдээр нэлээд ялгаатай байна. 2010-аас 2020 он хүртэлх арван жилийн хугацаанд ерөнхийдөө эмэгтэйчүүд боловсролоо эрэгтэйчүүдээс илүү дээшлүүлжээ. Ялангуяа 1985 оноос хойш төрсөн эмэгтэйчүүд илүү олноор их дээд сургууль төгссөн бөгөөд тэдний боловсролын түвшин үеийнхээ эрэгтэйчүүдээс илүү хурдтай дээшилсэн байна. Үе доторх боловсролын шилжилт төрсөн байршлаар бас нэлээд ялгаатай явагдсан байна. 1975-1985 онд хөдөөд төрсөн хүмүүс боловсролын эрэмбээ илүү урагшлуулах нь их байсан боловч түүнээс хойш хөдөөд төрсөн хүмүүсийн боловсролын эрэмбэ ихээр ухарчээ.

Хөдөлмөр эрхлэлтийн хувьд 2010-2020 онд өгсөх шилжилт давамгайлжээ. Гэхдээ хүн амын бүлгүүдээр энэ шилжилт нэлээд ялгаатай явагдсан

байна. Залуу үеийнхэн хөдөлмөрийн зах зээл дээр үнэмлэхүй өгсөх шилжилт илүү хийсэн бол ахмад үеийнхэн дотор үнэмлэхүй уруудах шилжилт илүү байна. Хөдөлмөр эрхлэлтийн статусын хувьд, 1960-1970 он ба 1990-ээд оноос хойш төрсөн эмэгтэйчүүд нь үеийнхээ эрэгтэйчүүдтэй харьцуулахад, цалин хөлсгүй ажлаас цалин хөлстэй ажилд дэвшсэн хувь бага бол 1970-1990 онд төрсөн эмэгтэйчүүдийн хувьд өгсөх шилжилт илүү явагджээ.

Нийслэл, хот суурин газар төрсөн бүх насны бүлгийн хүмүүсийн хувьд ажил мэргэжлээ дээшлүүлэх боломж нь сайн байсан байна. Ялангуяа Улаанбаатар хотод энэ нь хамгийн их байсан бол Дархан-Уул, Орхон, Говьсүмбэр зэрэг том хотууд болон уул уурхайн үйл ажиллагаа идэвхтэй явагдаж буй Өмнөговь аймагт 1990 оноос хойш төрсөн хүмүүсийн хувьд энэ үзүүлэлт нэлээд өндөр байна. Нийслэл дэх орон сууцанд амьдардаг хүмүүсийн хувьд ажил мэргэжлийн статус илүү дээшилсэн бол гэр хороололд амьдардаг хүмүүсийн шилжилт харьцангуй бага, нас залуу болох тусам энэ ялгаа нэмэгдэж байна. Эмзэг бүлгийн өрхийн гишүүд боловсролын түвшний хоцрогдлоос шалтгаалаад хөдөлмөрийн зах зээл дээр ажил мэргэжлээ ахиулах боломж үеийнхнээсээ нэлээд доогуур байна.

2010-2020 онд хөрөнгө (орон сууцны хувьд) хамгийн багатай болон хамгийн ихтэй бүлгүүд тэр хэвээрээ үлдэх магадлал өндөр байсан бол харин дундаж бүлгүүдийн хувьд өөр

хоорондоо шилжих нь их байжээ. Хөрөнгийн энэхүү харьцангуй шилжилт боловсролын түвшин, нас, төрсөн газар, одоо амьдарч байгаа хамаарч ихээхэн ялгаатай явагдсан бол хүйсийн хувьд зөрүү харьцангуй бага байна. Бага боловсролтой, хөдөө амьдарч буй хүмүүс хөрөнгийн эрэмбээр ихээхэн ухарчээ.

Үе хоорондын нийгмийн шилжилтийн шинжилгээнээс харахад, 2020 оны байдлаар 21-30 настай залуусын 31.9% эцэг эхээсээ илүү боловсролтой болжээ. Гэхдээ эмэгтэйчүүдийн боловсролын үе хоорондын өгсөлт эрэгтэйчүүдээс илүү явагдсан бол хөдөө төрсөн хүмүүс эцэг эхээсээ өндөр боловсролтой болох хандлага нь нийслэлд төрсөн хүмүүсийнхээс илүү өндөр байжээ. Нийслэлд 2010 онд гэр хороололд амьдарч байсан хүүхдүүдийн боловсролын үе хоорондын өгсөлт орон сууцанд амьдарч байсан хүүхдүүдийнхээс эрс өндөр байна. Гэхдээ энэ нь гэр хороололд амьдарч байгаа хүүхдүүдийн эцэг эхчүүд харьцангуй доогуур боловсролтой учраас хүүхдүүд нь эцэг эхийнхээ боловсролыг давахад хялбар байсантай холбоотой.

Боловсролын үе хоорондын үнэмлэхүй өгсөлт 31.9%, харьцангуй өгсөлтийн дундаж 45.3% байна. Үе хоорондын корреляц эсвэл үе хоорондын регрессийн коэффициент 0.62 гарсан. Энэ нь тухайн хүүхдийн боловсролын түвшин нь эцэг эхийнхээ боловсролын түвшнээс хамаарах нөлөө (persistence) Монгол Улсад өндөр байгааг харуулж байна. Дэлхийн Банкнаас хийсэн судалгаанд, Монгол Улсын хувьд

1980-аад онд төрсөн хүмүүсийн хувьд боловсролын үнэмлэхүй шилжилтийг хэмжсэн регрессийн коэффициент нь 0.55-0.66 интервалд буюу ихээхэн дээгүүр түвшний шилжилттэй байна гэж хэмжигдсэн (Weide et al., 2021) бол бидний хэмжсэнээр нийт 1915 - 2010 онуудад төрсөн хүмүүсийнх 0,32 интервалд байна.

Боловсролын үе хоорондын энэхүү шилжилт ажил мэргэжлийн түвшний үе хоорондын шилжилтэд шууд тусгалаа олжээ. 21-30 насны эмэгтэйчүүд үеийнхээ эрэгтэйчүүдтэй харьцуулахад, эцэг эхээсээ илүү өндөр түвшний ажил мэргэжилтэй байх магадлал маш их байна. Сумын төв, хөдөөд төрсөн хүмүүсийн ажил мэргэжлийн үе хоорондын өгсөлт доогуур байна. Хөдөө орон нутагт төрсөн байх нь тухайн хүн ажил мэргэжлээ дээшлүүлэх боломжийг (үе доторх өгсөлт) хязгаарлахаас гадна, эцэг эхийнхээ эрхэлж байснаас илүү сайн ажил олж хийх (үе хоорондох өгсөлт) боломжийг хязгаарладаг нэг гол хүчин зүйл болдог ажээ. Ерөнхийдөө нийслэлээс алслагдах тусам ажил мэргэжлийн хувьд эцэг эхээсээ өндөр түвшний ажил эрхлэх магадлал буурч байна. Энэ судалгаанаас гарсан нэг сайхан үр дүн бол Улаанбаатарын гэр хороололд амьдардаг залуус эцэг эхээсээ илүү өндөр түвшний ажил эрхэлдэг байх магадлал нь орон сууцанд амьдардаг залуусынхаас өндөр байдаг ажээ.

Хэмжилтийн үр дүнд, хөрөнгийн үе хоорондын өгсөх шилжилт 45.1% гарч байна. Энэ нь хүүхдүүдийн 45.1% нь хөрөнгийн эрэмбээрээ эцэг эхчүүдийнхээ 10 жилийн өмнөх эрэмбээс

урагшилж чадсан, үлдэх 54.9% нь эцэг эхийнхээ эрэмбээс доогуур эрэмбэтэй байна.

Шилжин ирэгсдийн дунд явагдсан нийгмийн шилжилт тухайлбал, нийслэлээс аймагт шилжигсдийн дунд боловсролын өгсөлт бусдаас бага явагдсан бол гадаадаас ирсэн болон аймгаас нийслэл рүү шилжигсдийн дунд боловсролын түвшин илүү дээшилжээ.

Шилжин ирсэн хүмүүсийн хувьд ажил мэргэжлийн түвшний өгсөлт илүү байна. Нас залуу байх тусам шилжин ирээд удаагүй хүмүүсийн ажил мэргэжлийн түвшний өгсөлт огт шилжээгүй болон шилжин ирээд удсан хүмүүсийнхээс илүү байна. Тэр дундаа гадаадаас шилжин ирээд удаагүй байсан, 1960-1980 онд төрсөн хүмүүс ур чадвар, албан тушаалын хувьд бусад шилжигсдээс илүү ахижээ. Хүйсээр харьцуулбал, эмэгтэй шилжигч ажил мэргэжлээ ахиулах хандлага нь эрэгтэй шилжигчийнхээс нэлээд өндөр байдаг байна.

Судалгаанаас гарах зөвлөмжийн хувьд нийгмийн шилжингэ хөдөлгөөний 10 жил тутамд сайтар хэмжиж, нөлөөлж байгаа хүчин зүйлсүүдийг сайтар тогтоож байх шаардлагатай байна. Иргэд боловсрол, ажил эрхлэлт, орлогын хувьд хир зэрэг ахиж дэвшиж эсвэл уруудаж байна гэдгийг тогтоохын тулд дата өгөгдлийн чанарыг сайжруулах хэрэгтэй байна. Тухайлбал, хөрөнгө баялгийн хувьд нийгмийн шилжингэ хөдөлгөөнийг зөв тооцохын тулд зөвхөн орон сууцны байдлаас гадна иргэдийн эзэмшиж байгаа малын тоо, хадгаламжийн хэмжээ, хөдлөх хөрөнгийн талаарх мэдээлэлийг нэгтгэн уг судалгаанд санал болгон хэрэглэсэн аргыг ашиглан дахин хэмжилт хийх нь уг судалгааны гажилтыг засварлах юм.

Тус судалгааг ОУШХБ-ын санхүүжилтээр гүйцэтгэсэн ба МУИС-ийн Шинжлэх ухааны сургуулийн эдийн засаг, социологийн багш, доктор, магистр оюутнууд 2022 оны 6 дугаар сараас эхлэн 2023 оны 5 сарын хугацаанд хийж гүйцэтгэлээ.

Гарчиг

1. Удиртгал.....	11
2. Нийгмийн хөдлөнги чанарын онол, судлагдсан байдал	14
3. Судалгааны тоон өгөгдөл ба арга зүй.....	23
4. 2010-2020 онд явагдсан нийгмийн үе доторх шилжилт	34
4.1. Үе доторх боловсролын шилжилт	34
Боловсролын үе доторх үнэмлэхүй шилжилт	35
Боловсролын үе доторх харьцангуй шилжилт	40
4.2. Үе доторх хөдөлмөр эрхлэлтийн шилжилт	43
Хөдөлмөрийн зах зээл дээрх үе доторх үнэмлэхүй шилжилт.....	43
Хөдөлмөр эрхлэлтийн үе доторх үнэмлэхүй шилжилтэд нөлөөлсөн хүчин зүйлсийн шинжилгээ	51
Хөдөлмөр эрхлэлтийн үе доторх харьцангуй шилжилт	53
4.3. Үе доторх хөрөнгийн шилжилт	56
5. 2010-2020 онд явагдсан нийгмийн үе хоорондын шилжилт	60
5.1. Үе хоорондын боловсролын шилжилт.....	62
5.2. Үе хоорондын хөдөлмөр эрхлэлтийн шилжилт	66
5.3. Үе хоорондын хөрөнгийн шилжилт.....	68
6. Шилжин ирэгсдийн дунд явагдсан нийгмийн шилжилт	71
6.1. Шилжин ирэгсдийн боловсролын үе доторх шилжилт	73
6.2. Шилжин ирэгсдийн хөдөлмөр эрхлэлтийн үе доторх шилжилт	75
7. Дүгнэлт, зөвлөмж.....	76
Ашигласан эх сурвалж	82
Хавсралт	85

УДИРТГАЛ

Нийгмийн хөдлөнги байдал (social mobility) нь нийгэм судлаачид, эдийн засагчид, бодлого боловсруулагчдын хамгийн их сонирхдог сэдвийн нэг юм. Нийгмийн хөдлөнги байдлыг олон янзаар тодорхойлсон байдаг. Тухайлбал, амьдралынх нь эдийн засгийн ахиц дэвшлийг асуухад хүмүүс ихэвчлэн өөрсдийн амьдралын түвшнийг эцэг, эхийнхээ түвшинтэй харьцуулж үздэг болохыг социологич Goldthorpe (1987), Hochschild (2018) нар судалсан байдаг. Аливаа нийгэмд одоо үеийнхэн нь өмнөх үеэсээ илүү сайн орлоготой, илүү боловсролтой, илүү нийгмийн статустай амьдарч чадаж байна уу гэдэг асуулт их сонирхол татдаг. Үүнд босоо буюу үе хоорондын шилжих хөдөлгөөн, хэвтээ буюу үе доторх шилжилт хөдөлгөөн хамаарна. Үе хоорондын шилжих хөдөлгөөн гэдэг нь тухайн нэг хүн эсвэл өрх гэр өмнөх үе буюу эцэг эхийнхээ үетэй харьцуулахад байр суурь нь хэрхэн өөрчлөгдсөнийг илэрхийлдэг (Goldthorpe, 1987). Харин үе доторх шилжих хөдөлгөөн нь тухайн хүн буюу өрх гэрийн байр суурь цаг хугацааны туршид хэрхэн өөрчлөгдөж байгааг илэрхийлнэ. Нийгмийн хөдлөнги байдлыг боловсрол, ажил эрхлэлт, орлого зэрэг үзүүлэлтээр хэмжиж болно. Энэ хөдөлгөөн нь өгсөх, уруудах чиглэлтэй. Нийгмийн хөдлөнги чанар ба нийгмийн тэгш бус байдал нь хоорондоо хамааралтай байдаг. Орлогын тэгш бус байдал ихтэй буюу хэт баян, хэт ядуу өрхүүдтэй нийгэмд ямар гэр бүлд төрж өссөн нь хүүхдийн ирээдүйн орлогыг

тодорхойлох чухал хүчин зүйл болж байдаг. Жишээлбэл, чинээлэг гэр бүлд өссөн хүүхдийн эрүүл мэнд, боловсрол сайн байдаг бөгөөд эцэг эхийнх нь нөөц бололцоо, танил тал, хэлхээ холбоо хүүхдийнх нь ажил эрхлэлт, хэлхээ холбоонд хүчтэй нөлөөлдөг (Corak 2013). Иймээс чинээлэг айлын хүүхэд илүү сайн ажилтай, өндөр орлоготой болох магадлал илүү байдаг. Иймээс тэгш бус байдал их бол нийгмийн хөдлөнги чанар үе доторх ба үе хооронд аль аль нь мууддаг. Үе хоорондын шилжих хөдөлгөөн ба тэгш бус байдлын энэхүү урвуу хамаарлыг “Агуу Гатсбийн муруй” (Great Gatsby curve) гэх болсон¹.

Орлогын тэгш бус байдал ихтэй улс орнуудад орлогын үе хоорондын шилжих хөдөлгөөн бага байх хандлагатай байдаг. Гэтэл тухайн хүний орлого нь боловсрол, хөдөлмөр эрхлэлтийн статустай хамааралтай үзүүлэлт юм. Монгол Улсад тэгш бус байдал, ядуурал нь хүн амын дунд боломж нөхцөлийн тэгш бус байдалтай холбоотой юу?

Энэхүү судалгааны хамрах хугацаанд өрхийн болон хувь хүний түвшинд нийгмийн гол үзүүлэлтүүд хэрхэн өөрчлөгдсөнийг дараах хүснэгтэд харуулав.

¹ Энэ нь Нобелийн шагналт зохиолч Скот Фицжералдын “Агуу Гатсби” романд гардаг, ядуу гэр бүлээс гаралтай боловч асар их баяжиж дээдсийн хүрээлэлд багтсан гол дүрээс сэдэвлэсэн нэр томьёо юм.

Хүснэгт 1. Нийгмийн гол үзүүлэлтүүдийн өөрчлөлт, 2000-2020 он

	2000 он	2010 он	2020 он
Ядуурлын түвшин, %	35.6*	38.8	27.8
Жини коэффициент	0.35*	0.33	0.33
15 ба түүнээс настай хүн амд эзлэх дээд боловсролтой хүмүүсийн эзлэх хувь	9.2%	21.0%	29.5%
15 ба түүнээс дээш настай хүн амд цалинтай ажил эрхлэгч ба ажил олгогчдын эзлэх хувь	21.7%	28.1%	40.3%
Халуун, хүйтэн устай сууцанд амьдардаг өрхийн эзлэх хувь	19.5%	20.7%	28.0%

* - Ядуурал, тэгш бус байдлын үзүүлэлтийг 1998 оноор авав

Эх сурвалж: ҮСХ-ны нэгдсэн мэдээллийн сан (www.1212.mn), Хүн ам, орон сууцны тооллогын тайлангууд.

Хугацааны эхэн үетэй харьцуулахад Монгол Улсад сүүлийн 10 жилд ядуурлын түвшин буурсан боловч бүс нутгийн орнуудтай харьцуулахад өндөр хэвээр байна. Жини коэффициентоор хэмжсэн хэрэглээний тэгш бус байдал бараг өөрчлөгдөөгүй байна. Харин хүн амын боловсролын түвшин, ажил эрхлэлт, айл өрхийн сууцны нөхцөл сайжирчээ.

Хүүхдүүд чанартай боловсрол эзэмшиж, ирээдүйд илүү сайн ажил эрхлэх боломж нь тэдний баян, ядуугаас үл хамааран ижил тэгш байх ёстой (Black, Devereux 2010). Энэхүү боломж нөхцөлийн тэгш байдлыг дээшлүүлэхийн тулд Монгол дахь нийгмийн хөдлөнг байдал ямар байгаа, энэ нь ямар хүчин зүйлстэй хамааралтай байгааг хэмжиж ойлгох нь маш чухал юм². Иймээс энэ судалгаанд бид дараах үндсэн зорилгуудыг дэвшүүлсэн. Үүнд:

1. Монгол дахь боловсрол, хөдөлмөр эрхлэлт, өрхийн баялаг гэх мэт нийгмийн гол үзүүлэлтийн

хувьд үе доторх шилжих хөдөлгөөн хэрхэн явагдаж байгаа талаарх дескриптив шинжилгээ хийх,

2. Дээрх нийгмийн гол үзүүлэлтүүдээр хэмжсэн үе хоорондын шилжих хөдөлгөөн ямар байгаа талаар шинжлэх,
3. Нийгмийн шилжих хөдөлгөөн нь газар зүйн шилжих хөдөлгөөнтэй ямар хамааралтай байгаа талаар шинжлэх юм.

Энэ судалгаанд бид хэвтээ ба босоо шилжилт гэсэн үндсэн хоёр хэмжээсээр нийгмийн шилжилтийг авч үзнэ. Хэвтээ шилжилт гэдэг нь үе доторх (intragenerational mobility) шилжилт бөгөөд хугацааны эхэнд байсан тухайн хүний нийгмийн байдал, жишээ нь боловсролын түвшин эсвэл ажил мэргэжлийн түвшин хугацааны эцэст хэрхэн өөрчлөгдсөнийг илэрхийлэх үзүүлэлт юм. Харин босоо шилжилт гэдэг нь үе хоорондын (intergenerational) шилжилт бөгөөд тухайн хүний нийгмийн байдал эцэг эхийнхээ нийгмийн байдалтай харьцуулахад хэр дээрдсэнийг илэрхийлнэ. Үе

² Social mobility ойлголтыг Х. Гүндсамбуу (2021) нийгмийн хөдлөнгө чанар гэж нэршсэн бөгөөд бид энэ тайланд энэ энэ томьёог нийгмийн шилжих хөдөлгөөн гэж нэршилтэй хамт нэг утгаар хэрэглэсэн юм.

доторх ба үе хоорондын шилжилтийг дотор нь харьцуулагдах байдлаар нь үнэмлэхүй (absolute) ба харьцангуй (relative) шилжилт гэж ангилдаг. Үнэмлэхүй шилжилт гэдэг нь авч үзэж буй хугацаанд тухайн хүний нийгмийн байдалд гарсан ямар нэг өөрчлөлтийг илэрхийлэх бол харьцангуй шилжилт гэдэг нь тухайн хүний нийгмийн байдлын бусад хүмүүстэй харьцуулсан эрэмбэ хэрхэн урагшилж эсвэл ухарч байгааг илэрхийлнэ. (Goldthorpe, 1987). Иймээс бид нийгмийн шилжилтийн дээрх дөрвөн тодорхойлолтыг хослуулан ашиглаж, Монгол Улсад 2010-аас 2020 оны хооронд явагдсан хүмүүсийн нийгмийн байдалд гарсан өөрчлөлтийг үе доторх үнэмлэхүй шилжилт, үе доторх харьцангуй шилжилт, үе хоорондын үнэмлэхүй шилжилт, үе хоорондын харьцангуй шилжилт гэсэн дөрвөн хүрээнд хэмжиж харуулахыг зорилоо.

Нийгмийн шилжилтийн талаарх эдгээр хэмжилтийн үр дүнг танилцуулахаас өмнө бид эхлээд нийгмийн хөдлөнги чанар байдлын

талаар, ялангуяа Монголын хувьд судлагдсан байдлын талаар Бүлэг 2-т хэлэлцэнэ. Бүлэг 3-т судалгаанд ашигласан тоон өгөгдлийн онцлог, үүнийг хэрхэн бүрдүүлж бэлтгэсэн талаарх аргачлалыг тайлбарлана. Мөн сонирхож буй хугацааны эхэн ба эцэст хүмүүсийн нийгмийн байдал буюу боловсролын түвшин, хөдөлмөр эрхлэлт, сууцны нөхцөл гэх мэт үзүүлэлтүүд ямар байсныг тоон өгөгдлөөс тооцсон дескриптив үр дүнг танилцуулна. Дараагийн 4 ба 5 дугаар бүлгүүдэд судалгааны гол үр дүн болох нийгмийн шилжилтийн талаар дэлгэрэнгүй шинжилгээний үр дүнг танилцуулна. Тухайлбал, Бүлэг 4-д 2010-аас 2020 оны хооронд хүн амын дунд явагдсан үе доторх нийгмийн шилжилтийн талаар авч үзэх бол Бүлэг 5-д үе хоорондын нийгмийн шилжилтийг авч үзнэ. Харин Бүлэг 6-д дээрх нийгмийн шилжилтүүдийг газар зүйн шилжилттэй холбосон шинжилгээний үр дүнг танилцуулна. Эцэст нь, 7 дугаар бүлэгт бид судалгааны нэгдсэн дүгнэлтийг танилцуулна.

2. НИЙГМИЙН ХӨДЛӨНГИ ЧАНАРЫН ОНОЛ, СУДЛАГДСАН БАЙДАЛ

2020 оны байдлаар, Монгол Улс 1,5 сая хавтгай метр талбайтай, 3,4 сая хүн амтай, нэг хүнд ноогдох Дотоодын Нийт Бүтээгдэхүүн нь нэрлэсэн байдлаар 4,041 ам доллар улс юм(Үндэсний Статистикийн Хороо, 2021, 1212.mn). 1921-1991 онуудын хооронд төвлөрсөн төлөвлөгөөт эдийн засагтай, Бүгд Найрамдах Монгол Ард Улс (БНМАУ) гэж нэрлэгддэг, социалист улс байсан юм. Ингээд 1991 оноос эхлэн тус улс зах зээлийн эдийн засаг болон олон намын бүтэцтэй ардчилсан нийгэм рүү шилжилт хийсэн улс билээ. 1921-1991 онуудын хооронд БНМАУ тэр үеийн ЗХУ-ын эдийн засаг, хамтын ажиллагаа, тусламжаас ихээхэн хамаардаг байсан бөгөөд эдгээр онуудад өмнө нь байгаагүй хөдөө аж ахуй, газар тариалан, аж үйлдвэр, үйлчилгээний салбарууд, эрүүл мэнд, боловсрол, шинжлэх ухааны салбаруудыг хөгжүүлж, ерөнхийдөө тэгш боломж, тэгш байдлыг хангах зорилготой нийгэм байв (Asian Development Bank, 1992). Малчид нэгдэлд хамрагдаж, нэгдэлчдийн хүүхдүүд сумын төв болон аймгийн төвд төрөөс санхүүжүүлдэг дотуур байртай сургуульд суралцан төгсдөг байв. 1960 аад онуудын дундуур Азийн хөгжиж буй орнуудын дундаас хамгийн анх бүх нийтийн бага боловсрол эзэмшиж чадсан улс хэмээн үнэлэгдэж UNESCO байгууллагын медалиар шагнагдаж байсан түүхтэй юм. БНМАУ 1990 оны байдлаар Монгол Улсын нийт хүн амын 96,5 % нь бичиг үсгийн боловсролтой (Steiner-Khamsi, Stolpe, 2006).

Социализмын үед хамгийн гол ангиуд бол малчин, ажилчин, сэхээтэн бол анги биш давхарга гэж үздэг байв (Tsogbadrakh, 2017). БНМАУ-д хөдөөгийн сум болгонд байгуулагдсан дотуур байртай дунд сургуулиуд бол Зөвлөлт Холбоот Улсын болон тухайн үеийн социалист улсуудын боловсролын системээс эрс тэс ялгаатай систем байсан бөгөөд нийгмийн хөгжил, өсөлт ,өөрчлөлтөнд хамгийн их хувь нэмэр оруулсан гэж үздэг судлаачид их бий. (Steiner-Khamsi, Stolpe, 2006). Гэхдээ 10 жилийн сургууль төгсөөд нийт төгсөгчдийн 20-23% нь дээд сургуульд элсэн орж суралцдаг байсан ба 60% хүртэлх төгсөгчид техник мэргэжлийн сургууль, техникумд элсэн суралцаж, мэрэгжилтэй ажилчид болдог байв (Tsogbadrakh, 2017). Тиймээс боловсролын системээр дамжин нийгмийн шилжингэ хөдөлгөөн эрчимтэй явж байсан нь даамжиггүй юм. 1991 оноос хойш төрийн өмчийн дээд сургуулийн тоо нэмэгдсэнээс гадна, төрийн бус өмчийн их, дээд сургуулиуд ихээр байгуулагдан, бүрэн дунд боловсрол олсон төгсөгчид дээд боловсролтой болох магадлал, бодит байдал улам нэмэгдсэн юм (Tsetsenbileg, 2015).

Тиймээс энэ судалгаанд хамрагдаж байгаа 2010-2020 онуудын хоорондох үе доторх болон үе хоорондын нийгмийн шилжилт боловсролын хувьд өндөр хэмжигдэх боломжтой юм. Социалист нийгмийн үед эмэгтэйчүүдийн тэгш эрх,

суралцах, ажиллах, өмчлөх, сонгох, сонгогдох эрх эрэгтэйчүүдтэй ижил тэгш байв. Тиймээс Монгол улсын хувьд охид, эмэгтэйчүүдийн боловсролын түвшин эрэгтэйчүүдтэй ижил түвшинд, 1990 оноос хойш илүү өнөдр түвшинд хүрсэн байна. Helliwel ба Putnam нарын тодорхойлсноор, боловсрол нь улс төрийн болон нийгмийн олон талт оролцоонд шууд нөлөөлдөг хүчин зүйл тул (Helliwel and Putnam, 1999), боловсролын систем хүртээмжтэй, чанартай болж ирсэн тул социализмын үед нийгмийн шилжингэ хөдөлгөөн эмэгтэйчүүдийн хувьд мөн сайжирсан байна (Tsogbadrakh, 2017).

Нэгэн хэмжээст онол үзэл баримтлалд эдийн засгийн буюу өмч хөрөнгө гэсэн нэг багц шалгуур үзүүлэлтээр нийгмийн давхраажлыг тодорхойлж байгаа онол сургаалыг багтаан үзэж байгаа бол өмч хөрөнгийн байдал төдийгүй боловсрол, эрх мэдэл, албан тушаал, нийгмийн нэр хүнд зэрэг олон тооны шалгуур үзүүлэлтүүдээр тодорхойлдог онол сургаалийг олон хэмжээст хэмээн тодорхойлно. Нэгэн хэмжээст онол сургаалд голлон марксист болон позитивист чиглэлийн үзэл баримтлал орох бөгөөд үл гүйцэлдэх социалист үзэлтэн Т.Мор, Т.Компанелла, Ш.Фурье, Сен Симон нарын сургаалаас эхлэлээ авч анхлан хүч үл хэрэглэн хөрөнгө мөнгөтэй ангийнхныг ойлгон ухааруулах замаар, нийгмийн тэгш бус байдлын эх үндэс болсон өмчөөс нь татгалзуулан хүн хүндээ нөхөр, анд бий болсон ангигүй тэгш шударга нийгмийг байгуулж болох юм гэсэн утга санаанд суурилан бий болжээ.

Марксизмын сонгодог төлөөлөгчидийн үзэл баримтлалын (түүний дотор нийгмийн ялгарал, түүний цаашдын чиг хандлагын тухай сургаалын) нөлөөн дор хуучин зөвлөлтийн болон социалист орнуудын нийгэм судлаач эрдэмтэд социаль бүтцийн асуудлыг авч үзэж судалсаар ирсэн билээ. Эдгээр эрдэмтэдийн дотроос хуучин ЗХУ-ын А.А.Амбрасов, С.Н.Надель, А.А.Галкин, К.И.Микульский, А.Н.Мельников, М.Н.Руткевич, В.С.Семёнов, Ю.Д.Квашнин, З.Т.Голенкова, Е.Д.Игитханян, Л.М.Романенко, М.Ф.Черкыш, И.Б.Артюхова, О.А.Афанасивна, А.Д.Вайсман болон Югослав, Польш Чехийн нэр бүхий эрдэмтэн судлаачдыг дурьдаж болно. Социаль бүтцийн позитивист парадигмыг баримталж асан эдгээр судлаачид нийгмийг ихэвчлэн эрх тэгш ажилчин, тариачин (Монголд бол малчин, ажилчин хэмээх хоёр анги ба нэг давхарга /хөдөлмөрийн сэхээтэн/) гэсэн гурамсан бүтэцтэй хэмээн үзэж тайлбарласан байдаг.

Энэ чиглэлийн парадигмын төлөөлөгчид нийгмийн ялгарлын гол үндсийг өмч, өмчийн харилцаатай холбон авч үзэж нийгмийн нэгэн хэмжээст бүтцийг зураглан гаргасан байдгаараа нийтлэг юм. Нийгмийн социаль бүтцийн олон хэмжээст онолын эх суурийг Немецийн социологич М.Вебер тавьсан гэх үндэслэлтэй бөгөөд эрх мэдлийг нийгмийн ялгарлын үндэс болгон үзснээрээ асуудалд хандах цоо шинэ хандлагыг бий болгосон билээ. Түүний үзсэнээр нийгмийн дотор бий болсон анги, статусын бүлгүүд, страт бол мөн л эрх мэдлийн хуваарилалтын хүрээнд хамрагдах зүйлс ажээ.

Улмаар социологийн сонгодог төлөөлөгчидөөс П.Сорокин, Э.Дюркхайм, орчин үеийн өрнөдийн социологичдоос Т.Парсонс, Р.Мертон, К.Дэвис, Л.Уорнер, Б.Барбер, Ж.Бурдые нарын судалгаа шинжилгээ нийгмийн давхраажлынолонхэмжээст, позитивист бус онол парадигмыг бүрэлдэн тогтоход чухал үүрэг гүйцэтгэсэн юм. Олон хэмжээст парадигмын гол төлөөлөгчид нь нийгмийн ялгарлыг дан ганц эдийн засгийн үзүүлэлт төдийгүй ажил мэргэжил, боловсрол, эрх мэдэл, албан тушаал гэх зэрэг социаль шинжүүдийн тусламжтайгаар хэмжиж олон хэмжээст нийгмийн бүтцийг тодорхойлдог ороо нийтлэг ажээ.

Монголд социологи үүссэн бий болсон цагаас нийгмийн анги, давхаргын судалгааг хэрэгжүүлж ирсэн бөгөөд дээр дурдсанчлан найрамдалт харилцаат Малчин, Ажилчин анги, Сэхээтэн гэсэн давхрага гэсэн бүтцийн хүрээнд судалж иржээ. Эдгээр судалгаанд давхраа, давхраажил гэсэн ойлголт хэрэглэгдэггүй байсан агаад анги, давхрага, нийгмийн бүтэц гэсэн нэр томъёонууд нь ойлголт ухагдхууны аппаратын гол цөмийг бүрдүүлж байлаа.

Үе хоорондын нийгмийн шилжилт буюу хүүхдийн нийгэмд эзлэх байр суурь нь эцэг эхийнхээ нийгэмд эзлэх байр сууриас хэрхэн хамаарч буйг хэмжихийн тулд тухайн хүүхдийн болон эцэг эхийн гол, гол үзүүлэлтийг бүртгэсэн тоон мэдээлэлтэй байх шаардлагатай бөгөөд тухайн гэр бүлийн гишүүдийн мэдээллийг урт хугацааны турш мөшгөж бүртгэсэн панел тоон өгөгдөл шаардлагатай байдаг. Харамсалтай нь манай улсад ийм тоон өгөгдөл нээлттэй

байдаггүй. Ийм тоон мэдээлэл байхгүй үед томоохон тооллого болон түүвэр судалгаанд тухайн оролцогчоос эцэг эхийнх нь нийгмийн статусыг лавлаж бүртгэсэн мэдээллийг ашиглаж болно. Манай улсад ингэж эцэг эхийнх нь мэдээллийг лавлаж бүртгэсэн судалгааны нээлттэй мэдээлэл ховор. 1990 оноос өмнөх Монголын нийгэмд, социалист нийгмийн үед, ажилчин бус нийгмийн гаралтай хүмүүс ажилчин болох шилжилт социалист нийгмийн үе хоорондын гол хөдөлгөөнийг тодорхойлж байжээ.

1974 оноос “Монголын ажилчин ангийн нийгмийн бүтэц, хөдөлмөр, соёл ахуй” гэсэн суурь судалгаа анх эхэлсэн бөгөөд ажилчдын хөдөлмөрийн нөхцөл, норм, төлөвлөгөө, цалин хөлс, чөлөөт цаг, гэр бүлийн харилцаа зэрэг сэдвүүдэд анхаарал хандуулжээ. Улмаар “БНМАУ-ын нийгмийн бүтэц” гэсэн сэдэвт ажлын хүрээнд ажилчин, малчин ангийг судлахдаа а. Нийгмийн бүтэц, б. Хөдөлмөрт хандах хандлага, в. Соёл, г. Чөлөөт цаг, д. Ухамсар, сүсэг бишрэл гэсэн чиглэлээр судалжээ (О. Мөнхбат, 2000).

Судлаач Х.Гүндсамбуугийн “Залуу малчдын нийгмийн төрх” гэсэн бүтээл гарсан нь нийгмийн гишүүдийг дээр дурдсан чиглэлийн хүрээнд насны үзүүлэлтээр түүвэрлэн шинжилсэн байна. Тэрээр сэхээтэн гэсэн нийгмийн бүлгийн судалгааны дүнд “Өнөөгийн сэхээтний нийгмийн төрх” хамтын бүтээл гаргаж сэхээтэн бол соёл, урлаг, эрүүл мэнд гэх зэрэг салбаруудаар мэргэжилтэн, албан хаагч гэсэн оюуны хөдөлмөр эрхэлдэг нийгмийн бүлэг гэсэн дүгнэлтэнд хүрсэн байна.

Онцлон дурдахад боловсрол, эрхэлж буй ажил гэсэн шалгуур гол үзүүлэлт байлаа. (Гүндсамбуу, 2002). Энэ үеийн судалгааны мэдээлэл цуглуулах арга нь голлон асуулгын буюу анкет/асуумж зэрэг тоон шинжтэй аргууд давамгайлж байсан бөгөөд нийгмийн бүтцийн талаарх, сэхээтэн хэмээх давхрагын судалгаа тэр үед мөн хийгдэж байлаа. Эдгээр судалгаа нь а. түүхийн чиглэлээр, б. социологийн чиглэлээр голлон өрнөжээ. Тухайлбал түүхийн (Б.Лигүү, Ч.Дашдаваа, Ц.Готов, Д.Өлзийсайхан,), социологийн, (В.Отгоннасан, Ц. Уртнасан, Ч.Дашдаваа, Н.Хавх, Х.Гүндсамбуу, С.Гомбо, Ц.Пүрэв, Р.Вандангомбо) эрдэмтэн судлаачдыг энд дурдаж болно.

1990-ээд оны эхэн үеэс Монгол дахь нийгмийн бүтцийн судалгаа нь онол арга зүйн хувьд өрнөдийн социологийн онол, парадигмуудыг ашиглаж, олон хэмжээст нийгмийн давхраажлын тогтолцоог зураглахад чиглэгдэж байв. 1992 онд Шинжлэх ухааны Академийн Философи Социологийн хүрээлэнгээс явуулсан “Нийгмийн бүтцийн өнөөгийн төлөв хандлага” сэдэвт социологийн судалгаа нь нийгмийн нэг тогтолцооноос нөгөө шилжих шилжилтийн үед Монголын нийгмийн бүтцэд гарч буй өөрчлөлтийн төлөв байдал, цаашдын чиг хандлагын тандсан ач холбогдолтой судалгаа байлаа. Улмаар 2000 оны үеэс нийгмийн давхраажлын чиглэлээрх судалгаанд орчин үеийн Монголын нийгмийн давхраажил, түүнийг бүрдүүлэгч нийгмийн анги давхрааны асуудлаар Х.Гүндсамбуу, Ц.Уртнасан, Ц.Пүрэв нийгмийн давхраажлийн тогтолцооны онол арга зүй, шалгуур үзүүлэлтийг судалсан О.Мөнхбат нар ном бүтээлдээ

нийгмийн давхраажил, түүний олон хэмжээс шалгуур үзүүлэлтийн асуудлыг хөндөн судалжээ.

Энэ үеийн судалгаа нь нэгдүгээрт, шинэ онол арга зүйн эрэл хайгуул буюу уламжлалт позивист марксист хандлагыг өрнөдийн онол парадигмтэй хослуулан хэрэглэх, хоёрдугаарт, шинэ арга зүйн үүднээс Монголын нийгмийн давхраажлыг судлах буюу эмпирик байдлаар судлах гэсэн шинжтэй байснаараа онцлог байв. Мөн ийм хандлага бүхий судалгааны тоонд нийгмийн давхраажил, нийгмийн социаль бүтэц, дунд ангийн асуудлаар МУИС-ийн Социологийн тэнхмээс эрхлэн хэрэгжүүлж, Монгол Улсын ШУБЯ санхүүжүүлсэн 3,000 иргэнээс авсан түүврийн хэмжээтэй “Монголын нийгмийн давхраажилт, төлөв байдал, чиг хандлага” 1993-1998 онд хэрэгжсэн суурь судалгаа /түүвэр 3000 хүн/ болон Монгол Улс, Гэгээрлийн Яамны захиалгаар 1,500 хүнээс судалгаа авсан түүврийн хэмжээ бүхий "Монголын нийгмийн дотоод ялгарал" 1998-2000 он зэрэг судалгааг дурдаж болно. Эдгээр судалгаа нь 1990 оноос Монголын нийгэмд өрнөсөн нийгэм, улстөр, эдийн засгийн асар өөрчлөлтийн нөлөөн дор шинээр бүрэлдэн үүсч байгаа Монголын нийгмийн давхраажил, түүний тулгуур анги давхраа, бүлгүүдийг судалсан суурь судалгааны төсөл байсан ба Монголын нийгмийн давхраажлийн шалгуур үзүүлэлтийг (i) эд баялаг ба орлого, (ii) боловсрол, (iii) мэргэжил, (iv) албан тушаал ба эрх мэдэл гэсэн 4 гол шалгуур үзүүлэлтээр тодорхойлно гэж үзжээ. Дээр дурдсан бүхий л судалгаа шинжилгээний анхдагч мэдээлэл

цуглуулах арга нь ихэвчлэн асуумж, статистик баримт сэлтийн шинжилгээ зэрэг тоон судалгааны аргууд зонхилж байлаа (ШУА, Философи Социологийн хүрээлэн, 1992). БНМАУ-ын нийгмийн бүтцийн судалгаанд нийгмийн нэг ангиас нөгөө анги руу шилжих хөдөлгөөн зөвхөн нам төрийн бодлогын хүрээнд тухайлбал, аж үйлдвэржилт, атар газар эзэмших аян гэх бүх ард түмнийг хамарсан шилжих хөдөлгөөний үед гарч байжээ. Малчин ангиас ажилчин анги руу шилжих шилжилт бол үүний нэг илрэл байв. Гэхдээ энэхүү шилжилт нь дээш эсбөгөөс доош чиглэсэн хөдөлгөөн биш бөгөөд учир нь тухайн үеийн парадигм нь социалист нийгмийн ангиуд нь статусын хувьд эрх тэгш, найрамдалт харилцаат ангиуд хэмээн үзэж байсантай холбоотой (О. Мөнхбат, 2000).

Харин 1990- ээд оноос олон хэмжээст парадигмээс үүдэн нийгмийн мобиль хөдөлгөөны буюу нийгмийн шилжилтийн ойлголт бий болж эхэлжээ. Дээрх судалгааны дүнг харьцуулан үзэхэд нийгмийн дээд болон дундаас дээгүүр давхраанд хамаарна гэж үзсэн хүмүүсийн хувь тогтмол буурч, доод дундаас доогуур давхраанд өөрсдийгөө харъяалуулсан хүмүүсийн хувь харьцангуй тогтвортой (1994, 1996-1998 оны судалгаагаар) харин дунд давхрааны хувь харьцангуй өссөн нь харагдаж байна. Дунд давхрааны өсөлт дээд болон дундаас дээгүүр давхраанаас уруудсан, доод, дундаас доогуур давхраанаас өгссөн мобиль хөдөлгөөний дүнд хангагдсан гэж үзэж болох юм. Түүнчлэн хүмүүс өөрсдийн социаль статус нөлөөлөх хүчин

зүйлсийг өмнөхөөсөө зөв тооцож, илүү объектив үнэлэмж өгдөг болсон хэдий ч амны билгээс ашдын билэг гэсэн Монголчуудын уламжлалт сэтгэлгээний нөлөө хүчтэй хэвээр байгаа нь 1996 он ба 1998 онд явуулсан судалгаанаас ажиглагдаж байлаа.

Учир нь судалгаанд оролцсон олон иргэд олдог орлого бага, өдөр тутмын хэрэгцээгээ хангадаггүй гэсэн атлаа өөрийгөө социаль дунд давхраанд хамааруулж үзсэн байна. Нийгмийн шилжингэ хөдөлгөөнд нөлөөлдөг хүчин зүйлсийг орлого, эд баялаг, боловсрол, мэргэжил, эрх мэдэл албан тушаал гэсэн шалгуур үзүүлэлтүүд мөн гэдгийг уг судалгааны дүн баталж байлаа (О. Мөнхбат, 2000). 1990-ээд оноос хойшхи судалгааны дүнгээс харахад боловсролын түвшин өсөх тусам хүний социаль статус амжиргааны түвшин зэрэгцэн өсөх хандлагатай болов. 1994 оны судалгаанаас харахад өөрийгөө дээд давхраанд хамааруулан үзсэн хүмүүсийн 3,4% нь дээд боловсролтой байхад бүрэн бус ба бүрэн дунд, бага, боловсролгүй болзошгүй хүмүүс 0% байлаа. Дундаас дээгүүр давхрааны дотор 22% дунд давхрааны 59,3%-ийг дээд боловсролтой хүмүүс эзэлж байлаа. Нийгмийн доод давхрааны 31,7%-ийг бага болон боловсролгүй хүмүүс бүрдүүлдэг бол энэ давхрааны 3,4%- нь дээд боловсролтой гэж харуулсан байна. Тусгай дунд боловсролтой хүмүүсийн 14,7% нь нийгмийн дундаас дээгүүр 61,7% нь харъяалуулан үзсэн нь бүрэн бус ба бүрэн дунд боловсролтой хүмүүсээс тус бүр өндөр байна (О. Мөнхбат, 2000).

1996 онд МУИС-ийн социологийн тэнхимээс эрхлэн явуулсан, “Монголын нийгмийн давхраажилтын төлөв хандлага” судалгааны дүнд харьцуулсан шинжилгээ хийснээс үзэхэд орлогын хувьд өдөр тутмын хэрэгцээгээ хангадаг гэж хариулсан хүмүүсийн 50,3% нь дээд боловсролтой бол хэрэглээгээ юугаар ч хязгаарлагддаггүй хүссэн бүхнээ авчихдаг гэж дээд боловсролтой хүмүүсийн 4,1% нь хариулсан байхад ингэж хариулсан хүмүүсийн дунд бага боловсролтой ба боловсролгүй хүмүүс байхгүй байсан байна (О. Мөнхбат, 2000). Эл судалгааны үргэлжлэл болох 1998 оны намрын судалгаа дээрх баримт сэлтийн үнэн зөв болохыг батлан харуулж байгаа юм. Боловсролын түвшингээр шат ахих тусам тухайн бие хүн, түүний харъяалагддаг социаль бүлгийн статус босоо шугамын дагуу өсдөг нь зүй тогтлын шинжтэй болж байна. 1996 онд МУИС-ийн социологийн тэнхимээс явуулсан “Монголын нийгмийн дотоод ялгаварлал” судалгааны дүнгээс үзэхэд асуулагад хамрагдсан нийт хүний 74,2% нь боловсролын түвшин, эзэмшсэн мэргэжил хүний нийгмийн байдалд нөлөөлдөг гол хүчин зүйлүүдээс хамгийн чухал нь гэж үздэг ажээ.

Мэргэжил нь бие хүмүүст нийгмийн хомс баялагаас (эрх мэдэл, орлого, албан тушаал, нэр хүнд гэх мэт) хүртэх тэгш бус ялгавартай хэтийн урьдчилсан боломжийг нээж өгдөг бөгөөд эл урьдчилгааг хэрхэн хэрэгжүүлснээс тухайн хүний амьдралын амжилт шалтгаалдаг. Түүнээс биш оноогдсон функцээ гүйцэтгэж эхлээгүй (өөрөөр хэлбэл хэрэгжиж эхлээгүй) мэргэжил шууд автоматаар эзэмшсэн хүндээ

амжилт авчирдаггүй. Ямар нэг мэргэжлийг эзэмшихэд бие хүнээс хэдий их цаг хугацаа, хөрөнгө мөнгө, авъяас чадвар, хичээл зүтгэл шаардагдана, төдийчинээ нийгмийн хомс баялагаас хүртэх урьдчилсан боломж, нөхцөл бүрдэнэ. Дээр дурьдсан зүйлс бага шаардагдах тусам баялагаас хүртэх урьдчилсан боломж хумигдаж, мэргэжлийн нийгмийн үнэ хүнд буурна. Иймд давуутай урьдчилсан боломж олгодог мэргэжлийн нийгмийн үнэ хүнд өндөр байдаг ба тэдгээрийг эзэмшихийн төлөө нийгмийн гишүүд өрсөлдөж байдаг. 1996 онд МУИС-ийн социологийн тэнхимээс явуулсан “Монголын нийгмийн дотоод ялгаварлал” судалгааны хүрээнд мэргэжлийн үнэ хүндийн талаарх Монголын олон нийтийн санаа бодлыг тандан үзэхэд (1996 оны байдлаар) 1.Улс нийгэмд хэрэгтэй (50,1%), 2.Ойр дотныхондоо тус дэм сайтай (41,7%), танил тал ихтэй болдог (39,4%), цалин хөлс ахиу (36,7%), эрх мэдэл ихтэй (16,9%) гэсэн хэд хэдэн шалгуурыг мэргэжлийн үнэ хүндийг тодорхойлоход чухалчлан үзсэн байна.

Тиймээс бидний энэ судалгаанд тоон аргуудыг ашиглан нийгмийн шилжингэ хөдөлгөөнийг хэмжихдээ боловсрол, ажил мэргэжил, хөрөнгө баялаг зэрэг 3 хувьсагч үзүүлэлтүүдийг ашигласан нь социологийн шинжлэх ухааны дүгнэлтүүдтэй тохирч байгаа юм. Социологийн судалгааны хувьд Монголын нийгмийн давхраажлын судалгаанд позитист хандлага буюу нийгмийн барим сэлтийн парадигм, түүний тулгуур онолууд хүчтэй нөлөөлсөөр иржээ. 1990 оноос өмнөх нийгмийн бүтцийн судалгаа нь нэгэн

хэмжээст буюу эдийн засаг, боловсрол гэсэн тоон үзүүлэлт бүхий шалгуур үзүүлэлтүүдэд голлон түшиглэж ирсэн бөгөөд арга зүйн хувьд ангийн ялгарал устан үгүй болно гэсэн Марксист үзэл баримтлал дээр хөгжиж ирсэн байна. 1990-ээд оноос хойшхи нийгмийн давхраажлийн судалгаа нь олон хэмжээст шалгуур үзүүлэлтийг эрхэмлэх хандлагатай болж эрх мэдэл, нэр хүнд зэрэг тоон байдлаар шууд эс хэмжигдэх чанарын шинжилгээ рүү шилжиж эхэлсэн хэдий ч өнөөг хүртэл орлого, эд баялаг зэрэг үзүүлэлтийг түгээмэл хэрэглэсээр байна. Энэ утгаараа нийгмийн давхраажлийн судалгаа шинжилгээнд чанарын үзүүлэлтүүд нэвтрэх болсон нь позитивист хандлага бүхий баримт сэлтийн болон зан үйлийн парадигмын зэрэгцээ феноменолог хандлага бүхий нийгмийн дефиницийн парадигм зэрэгцэн орших болсоныг гэрчилж байна.

Улмаар нийгмийн давхраажлын судалгаанд позитивист хийгээд феноменолог хандлага хэрэглэгдсэнээр давхраажлын шалгуур үзүүлэлтийг дан ганц тоон хэмжилтын байдлаар шалгаж болох үзүүлэлтээс гадна мөн респондентын зан үйлд агуулагдаж буй субъектив утга учир, ач холбогдлыг илрүүлж чадахуйц чанарын үзүүлэлтийг хөгжүүлэх шаардлага тулгамдсан асуудал болж байна. Нийгмийн бүтцийн нэг хэмжээс парадигмын судалгаанд нийгмийн нэг ангиас нөгөө анги руу шилжих хөдөлгөөн зөвхөн нам төрийн бодлогын хүрээнд тухайлбал, аж үйлдвэржилт, атар газар эзэмших аян гэх бүх ард түмнийг хамарсан шилжих хөдөлгөөний үед гарч байжээ.

Малчин ангиас ажилчин анги руу шилжих шилжилт бол үүний нэг илрэл байв. Гэхдээ энэхүү шилжилт нь дээш эсбөгөөс доош чиглэсэн хөдөлгөөн биш бөгөөд учир нь тухайн үеийн парадигм нь социалист нийгмийн ангиуд нь статусын хувьд эрх тэгш, найрамдалт харилцаат ангиуд хэмээн үзэж байсантай холбоотой.

1979 оны Хүн амын тооллогын үр дүнгээр “нийгмийн аль ч анги, давхрааны хувьд нийгмийн шилжилт нээлттэй явагдсан..., нийгмийн аль ч анги, давхраа нь зонхилон өөрөө өөрийгөө нөхөн сэлбэж, үе дамжсан ажилчин, малчин, сэхээтнийг нөхцөлдүүлсэн” (Гүндсамбуу, 2021). 1979 онд хийсэн Хүн амын тооллогоор Монголд анх удаа судалгааны зорилгоор Д. Загасбалдан анги хоорондын болон анги дотоодын нийгмийн шилжилт хэрхэн явагдаж байгааг хэмжсэн байдаг. 1979 оны байдлаар Монгол улсад нийгмийн шилжилт нээлттэй явагдаж, нийт хүн амын 33% нь малчин ард ангиас, 29% нь ажилчин ангиас, 14% нь сэхээтний давхраанаас, 24% нь хоршоолсон ардын ангиас гаралтай байсныг тэмдэглэсэн байна (Гүндсамбуу, 2021). Харин 1990-ээд оноос олон хэмжээст парадигмээс үүдэн нийгмийн шилжилт хөдөлгөөны ойлголт бий болж эхэлжээ. Нийгмийн шилжилт хөдөлгөөнд нөлөөлдөг хүчин зүйлсийг орлого, эд баялаг, боловсрол, мэргэжил, эрх мэдэл албан тушаал гэсэн шалгуур үзүүлэлтүүд мөн гэдгийг социологийн судалгааны үр дүн баталж байгаа юм.

Олон хүнийг хамарсан, хүүхдүүдийг эцэг эхийнх нь мэдээлэлтэй холбосон панел өгөгдөл тун ховор байдаг. Иймээс

үе хоорондын нийгмийн шилжилтийн судалгаанууд дийлэнх нь АНУ болон бусад хөгжингүй орнуудад хийгдсэн байдаг (Halikias & Reeves, 2016). Жишээлбэл, Corak, Heisz (1998) нар Канадын орлогын татварын мэдээллийг ашиглан эцэг-хүүгийн үе хоорондын цалин ба нийт орлогын мэдрэмжийг хэмжиж, ялангуяа бага орлоготой бүлэгт орлогын үе хоорондын шилжилт сайн явагдаж байгааг тогтоосон байна. Chetty, et al. (2017) судалгаанд АНУ-ын хоёр удаагийн хүн амын тооллого болон он оны хүн амын түүвэр судалгааны өгөгдлүүдийг холбон их өгөгдөл үүсгэж, 1940-1984 онд төрсөн иргэдийн туйлын шилжих хөдөлгөөнийг хэмжээд, энэ үед төрсөн хүмүүсийн 90 хувьд туйлын орлогын шилжилт явагдаагүй гэж дүгнэжээ.

Сүүлийн үеийн томоохон судалгаа бол Дэлхийн банкны гүйцэтгэсэн, 114 улсын хүн амын үе хоорондын боловсролын шилжилтийг хэмжсэн судалгаа бөгөөд 1950-1989 онд төрсөн хүмүүсийн боловсролын түвшин эцэг эхийнхээ боловсролын түвшнээс хэр дээшилснээр харуулжээ (Weide, Lakner, Mahler, Narayan, & Ramasubbaiah, 2021). Энэ судалгаагаар, хөгжсөн орнуудад эцэг эхээсээ илүү боловсрол эзэмшсэн хүмүүсийн эзлэх хувь буюу боловсролын үнэмлэхүй шилжилт нь хөгжиж буй орнуудаас өндөр байжээ. Хөгжсөн орны эцэг эхчүүд бусад орныхоос боловсролын түвшин өндөр боловч хүүхдүүд нь бүр ч илүү өндөр боловсролтой болж байна. Харин хөгжиж буй болон бага орлоготой орнуудад боловсролын үе хоорондын шилжилт тааруу байна. Эцэг эх ба

хүүхдийн сургуульд сурсан жилийн хоорондох хамаарлын зэргээр хэмжсэн харьцангуй шилжилт ч хөгжсөн орнуудад өндөр, хөгжиж буй орнуудад бага байдаг. Дээрх Дэлхийн Банкны судалгаагаар, Монгол Улсын хувьд 1980-аад онд төрсөн хүмүүсийн хувьд боловсролын үнэмлэхүй шилжилтийг хэмжсэн регрессийн коэффициент нь 0.55-0.66 интервалд буюу ихээхэн дээгүүр түвшний шилжилттэй байна гэж хэмжигдсэн (Weide et al., 2021) бол бидний хэмжсэнээр 1980-1984 онуудад төрсөн хүмүүсийнх 0.56 байсан ба 1985-1989 онуудад төрсөн хүмүүсийнх 0.47 байна. Дүгнээд хэлбэл, Монгол Улсад боловсролын өргөжилт ба боловсролын үе хоорондын шилжилт ижил хугацаанд ижил хандлагатай хувьсаж иржээ.

Энэ чиглэлээр сүүлийн үед хийгдсэн нэг судалгаа бол З. Манлайбаатар, Б. Отгонтөгс (2023) нарын “Монгол дахь үе хоорондын шилжилт: 1989-2020 оны хүн амын тооллогын хязгаарлагдмал түүврийн шинжилгээ” өгүүлэл юм. Зохиогчид энэ судалгаанд ҮСХ-ны Хүн ам, орон сууцны 1989, 2000, 2010, 2020 тооллогын анхдагч тоон өгөгдлөөс 10 хувийг санамсаргүй түүвэрлэн авч, нээлттэй тавьсан тоон мэдээллийг ашиглан Монгол дахь үе хоорондын нийгмийн шилжилтийн талаар судалжээ. Хэдийгээр тэдний сонгосон өгөгдөл нь түүвэр сонголтын хазайлттай байх магадлалтай боловч уг судалгаагаар Монгол улсад үе хоорондын үнэмлэхүй шилжилт нэмэгдэж буй нь тогтоогдсон ба ялангуяа эмэгтэйчүүдийн дунд энэхүү өгсөх шилжилт хурдтай явагдаж, эцэг эхээсээ илүү боловсрол эзэмшиж, илүү сайн ажил эрхлэх эмэгтэйчүүдийн хувь

ихэссээр байна. Харин эрэгтэйчүүдийн үе хоорондын өгсөх шилжилт харьцангуй удаан нэмэгдсэн, 1975-1984 онд төрсөн эрэгтэйчүүдийн боловсролын үе хоорондын шилжилт зах зээлийн шилжилтийн эхний арван жилд огцом уруудсан байсныг судлаачид хэмжсэн. Хүмүүсийн хаана төрсөн нь үе хоорондын нийгмийн шилжилтэд хүчтэй нөлөөтэй байгааг тэд дүгнэж гаргасан байна. Тухайлбал, 1940-1960

онд нийслэл болон төвийн аймгуудад төрсөн хүмүүсийн хувьд боловсролын өгсөх шилжилт бусад газар төрсөн хүмүүсийнхээс илүү хурдтай явагдсан бол 1960 оноос хойш баруун ба хангайн бүсийн аймгуудад төрсөн хүмүүсийн боловсролын өгсөх шилжилт бусад бүсэд төрсөн үеийнхнээсээ илүү явагджээ (Манлайбаатар, Отгонтөгс 2023).

3. СУДАЛГААНЫ ТООН ӨГӨГДӨЛ БА АРГА ЗҮЙ

Судалгаанд ашиглах гол тоон өгөгдөл нь Үндэсний статистикийн хороо (ҮСХ)-оос арван жил тутам зохион байгуулдаг Хүн ам, орон сууцны тооллого (ХАОСТ)-ын панел тоон өгөгдөл юм.

Монгол Улсын 1989, 2000, 2010, 2020 оны ХАОСТ-ын өгөгдлийг холбож панел өгөгдлийг үүсгэж бэлтгэхийн тулд эхлээд ҮСХ-ны Тооллого, өгөгдлийн шинжилгээний газартай хамтран өгөгдлийн сангуудад дүн шинжилгээ хийж, панел өгөгдөл үсгэх боломжит хувилбарыг судалсан. Хэрвээ тооллогын өгөгдөл тус бүрд хүний дахин давтагдашгүй дугаар үүссэн бол панел өгөгдлийг үүсгэхэд хялбар. Хүн ам, орон сууцны 1989 оны тооллогын дүнгээс 10 хувь нь цахимаар хадгалагдан үлдсэн, тооллогод хамрагдсан иргэний овог нэр цахимаар байхгүй тул тус оны мэдээллийг панел өгөгдөлд холбох боломжгүй болсон. Тиймээс үлдсэн 2000, 2010, 2020 оны хүн ам, орон сууцны тооллогын мэдээллийн хувьд өгөгдлийн цахим санг ашиглан иргэний ургийн овог, овог, нэр, төрсөн он, сар, өдөр, хүйс, төрсөн газар, шашин, үндэс угсаа зэрэг цаг хугацааны туршид өөрчлөлтгүй хувьсагчдыг сонгон панел өгөгдөл үүсгэх хувилбар дээр ажилласан.

Үүний тулд судлаачид эдгээр хувьсагчийг (нас, хүйс, төрсөн он, сар, өдөр) оролцуулан давхардлыг шалгана. Хэрвээ тухайн нэг хүний мэдээлэл 2000, 2010, 2020 оны тооллогын мэдээллийн санд тус бүр цор ганц байвал тухайн хүний мэдээллийг шууд сонгон панел

өгөгдөл үүсгэнэ. Ургийн овог, шашин, төрсөн газар зэрэг хувьсагчийг хариулагч өөр өөр судалгаанд ялгаатай мэдээлэх тохиолдол олон гардаг тул эдгээр хувьсагчийг бид панель дата үүсгэх шүүлтүүр асуулт болгож сонгоогүй. Гэхдээ тооллогын мэдээллийн санд бүртгэгдэхдээ тухайн хүний мэдээлэл алдаатай, зөрүүтэй орох тохиолдол элбэг. Жишээлбэл, тухайн хүн нэрээ өөрөөр хэлэх, судлаач буруу тэмдэглэх, үсэг нэмэх, үсэг солих гэх мэт асуудлаас болж тухайн хүн гурван тооллогын өгөгдөлд өөр хүн мэт бүртгэгдэх боломжтой. Тиймээс бид “Fuzzy match” аргачлал ашиглан панел өгөгдлийг үүсгэсэн. Энэ арга нь гурван тооллогод хамрагдсан хүн нэг бүрд ижил шинж тэмдгээр нь оноо өгөх бөгөөд 1 үсэг буюу 1 тэмдэгт солигдсон тохиолдолд оноо нь үл ялиг буурах зарчмаар явагдана. Үүнийг ашиглан судлаачийн буруугаас шалтгаалсан мэдээлэл оруулалт, тэмдэглэлтийн алдааг засах боломжтой юм.

Бид эхлээд 2000 оны тооллогыг суурь болгон бусад тооллогын мэдээлэлтэй холболт хийсэн. Дээр дурдсан цаг хугацааны хувьд өөрчлөлтгүй үзүүлэлтүүдээс овог, нэр, төрсөн он, төрсөн сар, төрсөн өдөр, хүйс гэсэн хувьсагчид л 2000 оны тооллогын цахим өгөгдөл дээр байсан тул эдгээр үзүүлэлтийг түлхүүр үзүүлэлт болгон бусад оны мэдээлэлтэй холбосон. Үүний үр дүнд 2000 оны тооллогод хамрагдсан нийт 2.4 сая иргэнээс 1.2 сая иргэний мэдээлэл бусад оны

тооллогын мэдээлэлтэй холбогдож, панел өгөгдөл үүсгэсэн юм. Гэхдээ 2000 оны тооллогын өгөгдлийн санд энэ судалгааны сонирхож буй боловсрол, ажил эрхлэлт гэх мэт гол мэдээлэл цахимаар хадгалагдаагүй байсан тул бид 2010 болон 2020 оны тооллогын дүнг холбон панел өгөгдөл үүсгэх үе шат руу шилжсэн.

Энэ удаа бид 2010 оны тооллогын дүнг суурь болгон 2020 оны тооллогын мэдээлэлтэй холбосон. Ингэхдээ овог, нэр, хүйс, төрсөн он, төрсөн сар, төрсөн өдрийг холбох хувьсагч болгож ашиглав. Эдгээр хувьсагчаар шууд холбогдохгүй үлдсэн хүмүүсийн өгөгдлийг Fuzzy

match аргачлалаар холбов. Ингэснээр 2010 онд тооллогод хамрагдсан 2.2 сая ажиглалтын утгаас 2 сая орчим ажиглалтын утгыг холбон панел өгөгдөл үүсгэсэн. 2010-аас 2020 оны хугацаанд 181 мянган хүн нас барсныг харгалзан үзвэл үүсгэсэн панел өгөгдөл нийт хүн амын 98 хувийг хамарсан нь нэлээн сайн үр дүн юм.

Бэлтгэсэн панел өгөгдлөөс 30 орчим хувийг буюу 197,350 өрхийн 628,066 хувь хүний өгөгдлийг санамсаргүй түүвэрлэж энэхүү судалгааны үндсэн өгөгдлийг бүрдүүлээ. Энэ өгөгдөлд 2010 оноос хойш төрсөн хүүхдүүдийн мэдээлэл хамрагдаагүй.

Хүснэгт 2. Түүвэрт хамруулсан хүн амын хүйс, нас, байршил

	Тоо	Хувь
Нийт	628,066	100.0%
Хүйс		
Эрэгтэй	300,176	47.8%
Эмэгтэй	327,890	52.2%
Нас (2010 оны байдлаар)		
5 хүртэлх	80,370	12.8%
5-17	137,914	22.0%
18-34	214,601	34.2%
35-49	129,745	20.7%
50-64	52,990	8.4%
65-аас дээш	12,446	2.0%
Төрсөн байршил		
Нийслэл	156,141	24.9%
Аймгийн төв	145,156	23.1%
Сумын төв	277,005	45.5%
Хөдөө	40,764	6.5%
2020 онд амьдарч буй байршил		
Нийслэл	292,225	46.5%
Аймгийн төв	125,716	20.0%
Сумын төв	76,890	12.3%
Хөдөө	133,235	21.2%

Эх сурвалж: УСХ, ХАОСТ-2010, 2020

Дээрх 2010 ба 2020 оныг хамарсан, хувь хүний болон өрхийн түвшний томоохон панел тоон өгөгдлийг ашиглан 2010-2020 онд хүн амын дунд үе доторх ба үе хоорондын нийгмийн шилжилт хэрхэн явагдсаныг тооллогын зарим асуултаас хэмжих боломжтой. Энэ судалгаанд бид хувь хүн болон өрх гэрийн нийгмийн статус дээшилсэн эсвэл доошилсон өөрчлөлтийг хэмжихдээ бид тоон мэдээллийн боломжид тулгуурлан боловсрол, хөдөлмөр эрхлэлт, баялгийн индекс зэрэг үзүүлэлтийг ашиглалаа.

Hertz, Jayasundera, Piraino, Selcuk, Smith and Verashchagina (2007) нар үе хоорондын боловсролын шилжилтийг 42 орны хувьд хэмжихдээ эцэг эхтэйгээ хамт амьдардаг 20-24 насны болон 25-29 насны хүүхдүүдийнх нь хувьд боловсролын корреляцийн коэффициентийг хэмжсэн байдаг.

Бид энд 2010 онд эцэг эхийн хамт амьдарч байсан 11-20 настай хүүхэд, залуучуудыг сонгож, дүн шинжилгээг гүйцэтгэлээ. 10 жилийн дараа буюу 2020 онд ддгээр хүүхэд залуучууд 21-30 нас хүрсэн байсан бөгөөд энэ насандаа тэдний нийгмийн статус хэрхэн өөрчлөгдсөн, тэр нь тухайн хүүхдийн болон тэдний эцэг эхийн янз бүрийн бүлгээр хэр их ялгаатай байгааг нарийвчилж авч үзэх болно. 0-10 насны хүүхдүүдийг сонговол 10 жилийн дараа тэд бараг насанд хүрээгүй, ялангуяа бидний сонирхож буй боловсрол, хөдөлмөр эрхлэлт, хөрөнгийн хувьд өгсөх шилжилт хийж гүйцээгүй эсвэл хийж эхлээгүй байх болно. Харин 2010

онд 20-оос дээш насны хүмүүсийн 50-аас бага хувь нь эцэг эхтэйгээ хамт амьдардаг бөгөөд нас нэмэгдэх хэрээр энэ хувь огцом буурч байна. Иймд дээр дурдсан “түүвэр сонголтын гажуудал” (sample selection bias)-ыг бага байлгахын тулд 2010 онд 11-20 настай хүүхдүүдийг сонгон авсан болно.

Үе хоорондын шилжилтийн судалгаанд ашигладаг тоон мэдээллийн нэг сул тал нь хэмжилтийн алдаа буюу хүүхдүүд нь эцэг эхийнхээ мэдээллийг эргэн санаж мэдээлэхдээ алдаа гаргах явдал байдаг. Харин хүн амын тооллогын мэдээлэлд эцэг эхийг өөрсдийг нь судалгаанд хамруулдаг тул хэмжилтийн алдаа бага байна. Мөн тухайн хүний орлогыг биш харин боловсролын түвшин, ажил эрхлэлт гэх мэт үзүүлэлтүүдийг хэмжихэд алдаа бага гардаг. Иймээс энэ судалгаанд боловсролын түвшин, ажил эрхлэлтийн статус үе хооронд хэрхэн шилжиж өөрчлөгдөж байгааг хэмжихийг зорьсон. Үе хоорондын шилжилтийг шилжилтийн магадлалын матриц (transition matrix), үе хоорондын регрессийн коэффициент (intergenerational regression), үе хоорондын корреляц (intergenerational correlation) зэрэг үзүүлэлтээр хэмждэг. Шилжилтийн матриц гэдэг нь [1]-д харуулсантай адилаар эцэг эх ба хүүхдийн боловсролын түвшин, эсвэл ажил мэргэжил зэрэг төлөвүүдийн хооронд шилжих магадлалыг илэрхийлсэн хүснэгт юм. Марковын хэлхээний загвараар уг матрицыг дараах байдлаар бичиж болно.

$$\rho_{i,j} = \Pr(z_t = j | z_{t-1} = i); \quad \rho_{i,j} \geq 0; \quad \sum_{j=0}^{k-1} \rho_{i,j} = 1$$

[1]

Жишээ нь шилжилтийн матриц нь эцэг эхийн боловсролын төлөв (z_{t-1})-өөс буюу $t-1$ үеийн боловсролын i түвшнээс хүүхдийн боловсролын төлөв (z_t)-т буюу t үеийн боловсролын j түвшинд шилжих магадлалыг илэрхийлнэ. Эцэг эхийн тухайн боловсролын түвшинд харгалзах хүүхдийн боловсролын боломжит

төлөвүүдэд шилжих магадлалын нийлбэр 1 байх ёстой.

Үе хоорондын шилжилтийн регрессийн коэффициент буюу үе хоорондын шилжилтийн тогтонги байдал (persistence)-ыг дараах нэг хувьсагчийн регрессийн тэгшитгэлээс үнэлнэ.

$$y_{i,t} = \alpha + \beta y_{i,t-1} + \epsilon_i ; \forall i = 1, 2, \dots N \quad [2]$$

Энд $y_{i,t}$ нь i дүгээр хүүхдийн боловсролыг илэрхийлэх тасралтгүй хэмжигдэхүүн, $y_{i,t-1}$ нь i дүгээр хүүхдийн эцэг эхийн боловсрол, ϵ_i нь хүүхдийн үзүүлэлтэд нөлөөлөх, эцэг эхийн үзүүлэлттэй хамааралгүй бусад бүх хүчин зүйлсийг агуулах алдааны үзүүлэлт. β нь үе хоорондын регрессийн коэффициент бөгөөд энэ утга их байх тусам үе хоорондын шилжилт хөдөлгөөн муутай байна.

Урт хугацаанд регрессийн коэффициент буурвал эцэг эх ба хүүхдийн боловсролын хоорондын хамаарал буурч, хөдөлгөөн нэмэгдсэн гэж дүгнэж болно. Гэхдээ регрессийн коэффициент нь эцэг эх ба хүүхдийн хооронд боловсрол шилжих вариациас гадна нийгэмд боловсролын дундаж түвшин буюу сурсан жил өмнөх үетэй харьцуулахад ерөнхийдөө өссөн нөлөөг давхар агуулдаг. Иймээс эцэг эхийн ба хүүхдийн үе тус бүрийн сурсан жилийн стандарт хазайлтын харьцаагаар регрессийн коэффициентыг дараах томъёогоор засварлахад үе хоорондын корреляц гарна.

$$\gamma = \beta \frac{\sigma_{t-1}}{\sigma_t} \quad [3]$$

Энд σ_{t-1} , σ_t нь эцэг эхийн ба хүүхдийн үеийнхний сурсан жилийн стандарт хазайлт. Энэхүү үе хоорондын корреляцийн коэффициент 0-д ойртох тусам үе хоорондын боловсролын шилжилт сайн байгааг илтгэнэ.

Боловсролын үе хоорондын шилжилтийн ерөнхий өөрчлөлт нийгмийн бүлгүүдээр хэр ялгаатай явагдсаныг бид [1], [2], [3] тэгшитгэлээр судалсан ба уг шилжилтийг хүйс, төрсөн газар, Улаанбаатар хотын хувьд орон сууцанд болон гэр хороололд амьдардаг, мөн эмзэг бүлгийн хүмүүс гэсэн гол бүлгүүдээр тодруулж мөн хэмжсэн. Эмзэг бүлгийн өрхийн хувьд бид 2010 оны байдлаар 3 ба түүнээс олон хүүхэдтэй ганц бие тэргүүнтэй өрх, хөгжлийн бэрхшээлтэй гишүүнтэй өрхийг эмзэг бүлгийн өрх гэж тодорхойлов.

Боловсролын өгсөх шилжилтийг тодорхойлохдоо хүүхэд нь эцэг эхийнхээ хамгийн их суралцсан жилээс илүү сурсан бол эцэг эхээсээ илүү боловсролтой гэж үзсэн. Боловсролын уруудах шилжилтийг тодорхойлохдоо хүүхэд нь эцэг эхийнхээ хамгийн их суралцсан жилээс цөөн жил сурсан бол эцэг эхээсээ доогуур боловсролтой гэж үзсэн.

Бид мөн боловсролын болон хөдөлмөр эрхлэлтийн үе хоорондын шилжилтэд нөлөөлж болох дээрх хүчин зүйлсийг нэгтгэн өгсөх ба уруудах шилжилтийн пробит загварын үнэлгээг дараах тэгшитгэл ашиглан хийсэн.

$$P_i = \beta_0 + \beta_j \cdot X_{i,j} + u_i \quad [4]$$

Энд, P нь бинар хувьсагч. Жишээлбэл, боловсролын үе хоорондын өгсөх шилжилтийг үнэлж буй үед i дүгээр хүний боловсрол эцэг эхийнхээсээ дээшилсэн бол 1, дээшлээгүй бол 0 утга авна. $X_{i,j}$ нь тухайн хүний шинж чанарыг харуулах үл хамаарах хувьсагчид. u_i нь алдааны хэсэг.

Бид эцэг эхийн ажилладаг салбар, хөдөлмөр эрхлэлтийн статус, ажил мэргэжлийн түвшин хүүхдийн үед хэр өөрчлөгдсөнийг хэмжихдээ, нэгдүгээрт, эцэг эх нь хувиараа хөдөлмөр эрхэлдэг (мал маллах, газар тариалан эрхлэх, хувиараа хөдөлмөр эрхлэх гэх мэт) байхад хүүхэд нь цалинтай ажил эрхэлдэг, эсвэл ажил олгогч болсон бол хөдөлмөр эрхлэлтийн хувьд өгсөх шилжилт гэж тодорхойлов. Харин эсрэгээрээ, эцэг эх нь цалинтай ажил эрхэлдэг болон ажил олгогч байхад хүүхэд нь хувиараа хөдөлмөр эрхэлдэг бол хөдөлмөр эрхлэлтийн уруудах шилжилт гэж тодорхойллоо. Эцэг эх нь бүгд хувиараа хөдөлмөр эрхэлдэг бол тухайн хүүхдийг хувиараа хөдөлмөр эрхэлдэг эцэг эхтэй гэж үзэв. Харин эцэг эхийн ядаж нэг нь цалинтай ажил эрхэлдэг болон ажил олгогч байвал тухайн хүүхдийг цалинтай ажил эрхэлдэг эцэг эхтэй гэж үзсэн.

Эдийн засгийн салбарын үе хоорондын шилжилтийг хэмжихийн тулд ХАА-д ажилладаг эцэг эхийн хүүхэд нь ХАА-н бус салбарт ажиллаж байвал түүнийг өгсөх шилжилт, харин ХАА-н бус салбарт ажилладаг эцэг эхийн хүүхэд нь ХАА-д ажиллавал уруудах шилжилт гэж тодорхойлсон. Эцэг эх нь бүгд ХАА-н салбарт ажилладаг бол тухайн хүүхдийг ХАА-н салбарт ажилладаг эцэг эхтэй гэж үзсэн. Харин эцэг эхийн ядаж нэг нь ХАА-н бус салбарт ажилладаг бол тухайн хүүхдийг ХАА-н бус салбарт ажилладаг эцэг эхтэй гэж үзэв.

Хөдөлмөр эрхлэлтийн үе хоорондын шилжилтийг хэмжихдээ бид эрхэлж буй ажил мэргэжлийн (occupation) буюу ур чадварын үе хоорондын шилжилт хэрхэн явагдсаныг мөн хэмжсэн. Эцэг эх нь ур чадвар бага шаардсан ажил мэргэжилтэй (контор, үйлчилгээний ажилтан, худалдаа үйлчилгээний ажилтан, ХАА, үйлдвэрлэл, барилга, машин механизмын оператор, угсрагч, энгийн ажил мэргэжил гэх мэт) байхад хүүхэд нь ур чадвар их шаардсан ажил мэргэжилтэй (менежер, мэргэжилтэн, техникч гэх мэт) бол ур чадварын үе хоорондын өгсөлт гэж тодорхойлов. Харин эцэг эх нь ур чадвар их шаардсан ажил эрхэлдэг байхад хүүхэд нь ур чадвар бага шаардсан ажил эрхэлж байвал ур чадварын үе хоорондын уруудалт гэж тодорхойллоо.

Хөдөлмөр эрхлэлтэд гарсан өөрчлөлтийг 2010 ба 2020 оны хүмүүсийн ажил эрхлэлтийн болон бусад шинж чанарын талаарх дэлгэрэнгүй тоон өгөгдлийг ашиглан, илүү уян хатан загваруудаар шинжлэх боломжтой. Энд бид хөдөлмөр эрхлэлтэд гарсан гол

өөрчлөлтийг ажил мэргэжлийн түвшний (occupational) өөрчлөлтөөр төлөөлүүлэн авч үзсэн бөгөөд ажил мэргэжлийн түвшний үе доторх шилжилтэд нөлөөлж болох хүчин зүйлсийг [5] болон [6] регрессийн загварууд ашиглан үнэлсэн. Эхний загвар нь 2010 ба 2020 оны хөдөлмөр эрхлэлтийн мэдээллийг хувь хүний түвшинд холбож панел өгөгдөл үүсгэлгүй, шууд нийлүүлсэн холимог хөндлөн (pooled cross sectional) өгөгдөл ашиглах энгийн пробит регресс (probit)-ийн загвар юм.

$$P_i = \beta_0 + \beta_j \cdot X_{i,j} + u_i \quad [5]$$

Энд, P нь бинар хувьсагч. Жишээлбэл, i дүгээр хүний ажил мэргэжлийн түвшин бага үед 0, өндөр үед 1 утга авна. $X_{i,j}$ нь i дүгээр хүний j дүгээр шинж чанарыг харуулах үл хамаарах хувьсагчид. u_i нь алдааны хэсэг.

Дараагийн загвар нь 2010 ба 2020 оны хөдөлмөр эрхлэлтийн мэдээллийг хувь хүний түвшинд холбосон панел өгөгдөл ашиглах пробит (panel probit) загвар юм. Уг загварыг дараах томъёогоор илэрхийлдэг

$$P_{i,t} = \alpha_i + \beta_j \cdot X_{i,j,t} + \delta_t + u_i + e_{i,t} \quad [6]$$

Энд, $P_{i,t}$ нь хамаарах бинар хувьсагч буюу i дүгээр хүний t хугацаан дахь ажил мэргэжлийн түвшин өндөр байгаа эсэхийг илэрхийлнэ. Ажил мэргэжлийн түвшин бага үед 0, өндөр үед 1 утга авна. α_i нь i дүгээр хүний тогтмол нөлөө, $X_{i,j,t}$ нь тухайн i хүний t хугацаан дахь j шинж чанарыг харуулах үл хамаарах хувьсагчид, δ_t нь хугацааны тогтмол нөлөө, u_i нь тухайн хүнд хамаарах алдааны хэсэг, $e_{i,t}$ нь нийт алдааны

хэсэг. Дээрх хоёр эмпирик загвар ашиглан хүн амын ажил мэргэжлийн түвшин дээшлэхэд нөлөөлөх хүчин зүйлсийн үнэлгээг харуулна.

Энэ судалгаанд авч үзэх нэг чухал асуудал нь 2010-2020 онд өөр газраас шилжин суурьшсан хүн амын дунд нийгмийн шилжилт бусад хүн амтай харьцуулахад хэр явагдсаныг тодруулах явдал юм. Өөрөөр хэлбэл биет байдлаар нүүдлэн суурьшсан байдал нь тэдний нийгмийн шилжилттэй ямар холбоо, хамааралтай байгааг бид судалхыг зорьсон юм. Судалгааны энэ асуултанд хариулахын тулд бид 2010 онд тооллогод хамрагдсан, гэхдээ сүүлийн 5 жилд өөр газраас (гадаад болон дотоод) буюу 2005 оны 1-р сард тоологдсон газраасаа өөр газар амьдарч байсан хүн амын бүлгийг “шилжин ирэгсэд” гэж онцолж авч үзэн, тэдний дунд 2010-аас 2020 хүн хүртэлх хугацаанд явагдсан нийгмийн шилжилтийг судлах юм. Өөрөөр хэлбэл, тухайн газарт гадаад, дотоодоос шилжин ирээд удаагүй буюу 5 хүртэлх жил болсон иргэдийн хувьд боловсрол, хөдөлмөр эрхлэлт, сууцны нөхцөл гэх мэт нийгмийн үзүүлэлт нь 2010-аас 2020 онд бусадтай харьцуулахад хэр ахиж дэвшсэнийг тодруулна. Ингэхдээ, өмнөх бүлгүүдэд авч үзсэний адилаар, шилжин ирэгсдийн үе доторх шилжилтийг бусад хүмүүстэй болон өөр хооронд нь (шилжин ирсэн газар, нас, хүйс гэх мэт) харьцуулна. Харин үе хоорондын шилжилтийг авч үзэхгүй. Учир нь үе хоорондын шинжилгээ хийхээр ялгаж авсан, 2010 онд 11-20 настайдаа эцэг эхтэйгээ амьдарч байсан хүүхэд залуусын дотор шилжин ирсэн хүүхдийн тоо цөөн байсан.

Тухайн хүний эзэмшсэн оны ХАОСТ-д боловсролыг 9 түвшинд боловсролын түвшин нь ажил эрхлэлт, бүртгэсэн тул 2020 оны тооллогын орлого, нийгэмд эзлэх байр суурийг мэдээллийг үүнд нийцүүлэн 9 түвшинд тодорхойлогч гол үзүүлэлт юм. 2010 ангилав.

Хүснэгт 3. Түүвэрт хамруулсан хүн амын боловсролын түвшин, 2010-2020 он

Боловсролын түвшин	2010 он		2020 он	
	Тоо	Хувь	Тоо	Хувь
Боловсролгүй	152,004	24.2%	41,190	6.6%
Бага	72,336	11.5%	75,867	12.1%
Суурь	80,889	12.9%	89,078	14.1%
Бүрэн дунд	165,007	26.3%	166,765	26.6%
Техник мэргэжлийн дунд	14,552	2.3%	28,554	4.5%
Тусгай мэргэжлийн дунд	29,443	4.7%	37,224	5.9%
Дипломын болон бакалаврын дээд	88,673	14.1%	153,396	24.4%
Магистр	7,634	1.2%	18,099	2.9%
Доктор	745	0.1%	1,110	0.2%
Мэдээлэлгүй	16,783	2.7%	16,783	2.7%
Нийт	628,066	100%	628,066	100%

Эх сурвалж: УСХ, ХАОСТ-2010, 2020

Гэхдээ хялбар, ойлгомжтой байлгах үүднээс бид бага дунд, дээд гэсэн 3 шатны боловсролын зэргээр үе доторхи болон үе хоорондын шилжилт өөрчлөлтийг хэмжсэн байгаа. Тухайн хүний хөдөлмөр эрхлэлтийн статусын өөрчлөлт нь нэг үзүүлэлтээр төлөөлүүлж хэмжихэд ярвигтай учраас бид хөдөлмөр эрхлэлтийн өөрчлөлт, ажил эрхэлж буй салбарын өөрчлөлт, ур

чадвар буюу албан тушаалын өөрчлөлт гэсэн гурван үзүүлэлтийг авч үзлээ.

Нэгдүгээрт, хөдөлмөр эрхлэлт дээшилсэн гэдгийг өмнө нь ажилгүй эсвэл цалин хөлсгүй ажил эрхэлдэг байснаа дараа нь цалинтай ажил эрхэлдэг эсвэл ажил олгогч болсноор тодорхойлов. Гэхдээ 2010 ба 2020 оны Хүн ам, орон сууцны тооллогод ажил эрхлэлтийн ангиллыг ялгаатай асуусныг дурдах хэрэгтэй (Хүснэгт 4).

Хүснэгт 4. Түүвэрт хамруулсан хүн амын хөдөлмөр эрхлэлтийн статус, 2010-2020 он

2010 он			2020 он		
Ажил эрхлэлт	Тоо	Хувь	Ажил эрхлэлт	Тоо	Хувь
Цалин хөлстэй ажиллагч	124,139	57.0%	Байнгын ажиллагч	182,749	58.8%
Ажил олгогч	5,296	2.4%	Түр ба тохиолдлын ажиллагч, дадлагажигч, гүйцэтгэх гэрээлэгч	27,077	8.7%
Хувиараа хөдөлмөр эрхлэгч	58,969	27.1%	ААНБ-ын ажил олгогч	1,345	0.4%
Нөхөрлөл, хоршооны гишүүн	465	0.2%			

Өрхийн үйлдвэрлэл, үйлчилгээнд цалин хөлсгүй оролцогч	28,465	13.1%	Зах зээлд чиглэсэн өрхийн ААН-ийн ажил олгогч	736	0.2%
Бусад	552	0.3%	Ажилтан ажиллуулдаггүй ААН-ийн болон өрхийн үйлдвэрлэл эрхлэгч	79,685	25.6%
			Хувь нэмрээ оруулагч гэр бүлийн гишүүн	19,273	6.2%
Нийт	217,886	100%		310,865	100%

Эх сурвалж: УСХ, ХАОСТ-2010, 2020

2010 ба 2020 оны тооллогын мэдээллийг харьцуулахын тулд бид цалин хөлстэй ба цалин хөлсгүй ажиллагчийг дараах байдлаар ангилсан. Үүнд:

- 2010 оны цалин хөлстэй ажиллагч, ажил олгогчийг “цалинтай ажиллагч” гэж үзэв.
- Харин 2010 оны хувиараа хөдөлмөр эрхлэгч, нөхөрлөл, хоршооны гишүүн, өрхийн үйлдвэрлэл, үйлчилгээнд цалин хөлсгүй оролцогч, бусад ажил хийж байгаа хүмүүсийг “цалин хөлсгүй ажиллагч” гэж үзэв.
- 2020 онд байнгын, түр, тохиолдлын, дагалдан ажиллагч, гүйцэтгэгч гэрээлэгч, ААНБ-ын ажил олгогчийг “цалинтай ажиллагч” гэж үзэв.

- 2020 оны зах зээлд чиглэсэн өрхийн ААН-ийн ажил олгогч, ажилтан ажиллуулдаггүй ААН-ийн үйл ажиллагаа эрхлэгч, өрхийн ААН-ийн өрхийн үйлдвэрлэл эрхлэгч, хувь нэмрээ оруулагч гэр бүлийн гишүүнийг “цалин хөлсгүй ажил эрхлэгч” гэж үзэв.

Хоёрдугаарт, тухайн хүний ажилладаг салбар өгсөх гэдгийг урьд нь ажилгүй эсвэл хөдөө аж ахуйн салбарт ажилладаг байснаа дараа нь ХАА-н бус салбарт ажилладаг болсноор тодорхойлов. 2010 ба 2020 оны Хүн ам, орон сууцны тооллогод хамрагдсан хүмүүсийн ажил эрхэлж буй салбарыг Хүснэгт 5-д харуулав. 2010 оны тооллогод ажил эрхлэлтийн салбараа мэдээлсэн хүмүүсийн 25.4% нь ХАА-д ажиллаж байсан бол 2020 онд энэ үзүүлэлт 23.9% болжээ.

Хүснэгт 5. Түүвэрт хамруулсан хүн амын ажил эрхэлж буй салбар, 2010-2020 он

Ажил эрхэлж буй салбар	2010 он		2020 он	
	Тоо	Хувь	Тоо	Хувь
Хөдөө аж ахуй	54,857	25.4%	72,228	23.9%
Уул уурхай	8,599	4.0%	13,234	4.4%
Боловсруулах үйлдвэрлэл	21,473	9.9%	32,451	10.7%
Барилга	12,578	5.8%	17,917	5.9%
Худалдаа	29,853	13.8%	37,619	12.5%
Тээвэр	12,672	5.9%	15,566	5.2%
Үйлчилгээ	39,222	18.2%	57,857	19.1%
Боловсрол, эрүүл мэнд	30,312	14.0%	44,040	14.6%
Бусад	6,568	3.0%	11,306	3.7%
Нийт	216,134	100.0%	302,218	100.0%

Эх сурвалж: УСХ, ХАОСТ-2010, 2020

Гуравдугаарт, ур чадвар өгсөх гэдгийг урьд нь ур чадвар бага шаардсан ажил мэргэжилтэй (occupation) буюу албан тушаалтай байснаа хожим нь ур чадвар их шаардсан ажил мэргэжилтэй буюу албан тушаалтай болсныг тодорхойлов. 2010 ба 2020 оны Хүн ам, орон сууцны тооллогод хамрагдсан хүмүүсийн ажил мэргэжлийн түвшний өргөн хүрээтэй ангиллыг Хүснэгт 6-д

харуулав. Олон Улсын Хөдөлмөрийн Байгууллагын ангилснаар³, бид менежер, мэргэжилтэн, техникч болон туслах дэд мэргэжилтний ажил мэргэжлийг ур чадвар их шаардах ажил мэргэжил гэж үзсэн. Энэ тодорхойлолтоор, 2010 онд ур чадвар их шаардсан ажил мэргэжлээр нийт ажиллагсдын 30.7% ажиллаж байсан бол 2020 онд энэ үзүүлэлт 33.1% болж нэмэгджээ.

Хүснэгт 6. Түүвэрт хамруулсан хүн амын ажил мэргэжлийн түвшин, 2010-2020 он

Ажил мэргэжлийн түвшин	2010 он		2020 он	
	Тоо	Хувь	Тоо	Хувь
Захирал, менежер	17,593	8.1%	29,938	9.8%
Мэргэжилтэн	39,109	18.0%	58,178	19.1%
Техникч болон дэд мэргэжилтэн	10,121	4.7%	12,897	4.2%
Контор, үйлчилгээний ажилтан	6,168	2.8%	11,201	3.7%
Худалдаа, үйлчилгээний ажилтан	34,090	15.7%	40,335	13.2%
Хөдөө аж ахуйн ажилтан	54,050	24.8%	71,369	23.4%
Үйлдвэрлэл, барилга, үйлчилгээний ажилтан	20,123	9.2%	25,131	8.3%
Машин механизмын оператор	18,225	8.4%	24,891	8.2%
Энгийн ажил мэргэжил	16,210	7.4%	25,755	8.5%
Зэвсэгт хүчний ажил мэргэжил	2,197	1.0%	5,068	1.7%
Нийт	217,886	100.0%	304,763	100.0%

Эх сурвалж: YCX, ХАОСТ-2010, 2020

Хөдөлмөр эрхлэлтийн байдлаас гадна тухайн хүний хөрөнгө, баялгаар эдийн засгийн статусын өөрчлөлтийг нэмж харуулбал маш сонирхолтой. Харамсалтай нь, бидний боловсруулж бэлтгэсэн панел тоон өгөгдөлд тухайн хүний буюу өрхийн хөрөнгийг илэрхийлэхэд шаардагдах мөнгөн хадгаламж, эзэмшиж буй бизнес, мал, үл хөдлөх ба хөдлөх хөрөнгийн мэдээлэл бараг тусаагүй. Иймээс бид тухайн хүний амьдарч буй сууцны нөхцөлийн талаарх мэдээллээр баялгийг төлөөлүүлж авлаа. Гэхдээ сууцны нөхцөл нь тухайн хүний хөрөнгө чинээг бүрэн илэрхийлэхгүй

сул талтайг тэмдэглэх нь зүйтэй. Жишээлбэл, малчин өрхүүд ихэвчлэн гэрт амьдардаг тул цэвэр ба бохир ус, халаалтын төвлөрсөн сүлжээнд холбогдоогүй учраас сууцны нөхцөл тааруу ангилалд орж тоологдоход хүрч байна.

2010-2020 онд сууцны нөхцөл хэрхэн өөрчлөгдсөн талаарх ерөнхий үр дүнг дараах хүснэгтэд харуулав. Сууцны нөхцөлийг тодорхойлохоор сонгосон үзүүлэлтүүдийн хувьд 2010,

³ <https://ilostat.ilo.org/resources/concepts-and-definitions/classification-occupation/>

2020 оны түвшин ямар байсныг дараах хүснэгтэд харьцуулж харуулав. Хүснэгт 7-өөс харахад, судалгаанд хамруулсан

10 жилийн хугацаанд хүн амын сууцны нөхцөл ерөнхийдөө сайжирсан байна.

Хүснэгт 7. Түүвэрт хамруулсан хүн амын сууцны нөхцөл, 2010-2020 он

Сууцны нөхцөл	2010 он		2020 он	
	Тоо	Хувь	Тоо	Хувь
Тохиллог сууц ба орон сууцанд амьдардаг	134,932	21.5%	182,314	29.0%
Өөрийн өмчийн сууцанд амьдардаг	559,770	89.1%	583,980	93.0%
Усны төвлөрсөн системд холбогдсон, эсвэл хамгаалагдсан худагтай	327,640	52.2%	504,689	80.5%
Төвлөрсөн цахилгааны эх үүсвэрт холбогдсон	497,265	79.2%	521,621	83.1%
Төвлөрсөн халаалт, цахилгаан халаагуур, нам даралтын зуухтай	170,375	27.1%	166,765	31.1%
Бохирыг төвлөрсөн болон бие даасан системээр зайлуулдаг	143,140	22.8%	153,396	24.4%
Бие засах газар сууцны дотор байдаг	141,953	22.6%	189,573	30.2%
Хатуу хог хаягдлыг үйлчилгээний байгууллагаар зайлуулдаг	402,149	64.0%	445,281	70.9%
Интернэтэд холбогдсон	57,548	9.1%	176,012	28.0%

Эх сурвалж: YCX, ХАОСТ-2010, 2020

Дээрх ерөнхий хандлагыг панел тоон өгөгдөл ашиглан хувь хүний хөрөнгийн өөрчлөлтөөр тодруулж авч үзлээ. Баялгийн индексийг АНУ-ын Олон Улсын Хөгжлийн Агентлагийн боловсруулсан “Хүн ам зүй ба эрүүл мэндийн судалгааны статистикийн удирдамж”-д заасан аргачлалын дагуу тооцсон (USAID, 2020). Гэхдээ тухайн хүний хөрөнгө буюу баялгийн түвшнийг хэмжихэд шаардлагатай үзүүлэлтүүдийг тухайн оны Хүн ам, орон сууцны тооллогод асуусан боломжит хувьсагчдаар төлөөлүүлж хэмжив. Тухайлбал, 2010 ба 2020 оны тооллогын өгөгдөлд хоёуланд нь байсан өрхийн сууцны төрөл, цахилгааны эх үүсвэр, усны эх үүсвэр, халаалтын эх үүсвэр, бохир ус зайлуулах байгууламж, ариун цэврийн байгууламж, хатуу хог хаягдал зайлуулах арга, интернетэд

холбогдсон эсэх зэрэг номинал үзүүлэлтийн хариултын хувилбар бүрээр индикатор хувьсагч үүсгэсэн. Үүн дээр байшингийн талбай, гэрийн ханын тоо гэсэн тоон үзүүлэлтүүдийг нэмж, эдгээр хувьсагчдын гол бүрэлдэхүүн хэсгийн шинжилгээ (principal component analysis)-г хот ба хөдөөгийн өрхүүдийн хувьд тус тусад нь дээрх аргачлалын дагуу хийв. Дараа нь хот, хөдөөгийн өрхүүдийн баялгийн оноог нэгтгэн эрэмбэлж нийт өрхийн баялгийн оноо болон тэнцүү таван бүлгийг 2010 ба 2020 он тус бүрээр тооцсон.

Гэхдээ дээрх байдлаар дан ганц сууцны нөхцөлд тулгуурласан хүн амын хөрөнгө баялагт гарсан шилжилтийг ялангуяа үнэмлэхүй (абсолют) байдлаар илэрхийлэхэд тохиромжгүй юм. Учир нь, зөвхөн сууцны нөхцөлийн үзүүлэлтүүдээс “гол бүрэлдэхүүн хэсгийн

шинжилгээ”-ээр тооцсон 2010 ба 2020 оны хөрөнгийн оноо нь абсолют утгаар хооронд нь шууд харьцуулах нийцгүй байгаа юм. Жишээлбэл, тухайн өрхийн сууц 2010 онтой харьцуулахад 2020 онд сайжирсан байхад хөрөнгийн оноо нь үнэмлэхүй утгаар өсөөгүй, тэр байтугай буурсан тохиолдол олон гарсан. Энэ нь хөрөнгийн оноог тооцоход өөр хоорондоо хамаарал өндөртэй сууцны нөхцөлийн дээрх үзүүлэлтүүдээс гадна өрхийн хадгаламж, мал хөрөнгө, өр зээлийг бүрэн илэрхийлэх нэмэлт хувьсагчид шаардлагатайг илтгэж байна. Гэхдээ энд тооцсон хөрөнгийн оноо нь тухайн өрхийн бусад өрхтэй харьцуулсан хөрөнгийн онооны харьцангуй

өөрчлөлтийг нийцтэй харуулж байгаа юм. Иймээс бид энэ тайланд хүн амын хөрөнгийн шилжилтийг үе дотор ба үе хооронд харуулахдаа зөвхөн баялгийн индексийн харьцангуй шилжилтийг л авч үзлээ.

Дээр дурдсан аргачлалын дагуу бэлтгэсэн тоон мэдээллийг ашиглан 2010 оноос 2020 он хүртэлх арван жилд Монголын хүн амын дунд үе доторх болон үе хооронд нийгмийн шилжилт хэрхэн явагдсан, эдгээр шилжилт нийгмийн бүлгүүдээр хэр ялгаатай байсан талаарх харьцуулсан шинжилгээний үр дүнг дараах бүлгүүдэд дэлгэрэнгүй танилцууллаа.

4. 2010-2020 ОНД ЯВАГДСАН НИЙГМИЙН ҮЕ ДОТОРХ ШИЛЖИЛТ

2010 ба 2020 оны Хүн ам, орон сууцны тооллогод аль алинд нь хамрагдсан хувь хүмүүс болон өрхийн мэдээллээс үүсгэсэн панел тоон өгөгдөл нь энэ хугацаанд хүн амын дунд явагдсан нийгмийн шилжилтийг тодорхойлох таатай боломжийг олгож байгаа юм. Энэ бүлэгт үе доторх нийгмийн шилжилтийг эхлээд тодруулж авч үзье. Энэ хэсэгт бид хувь хүмүүсийн ажил эрхлэлт, боловсрол, баялгийн индекс 2010-2020 онд үе дотроо хэрхэн өөрчлөгдсөнийг үнэмлэхүй болон харьцангуй байдлаар авч үзнэ. Эхний хэсэгт тухайн хүний нийгмийн байдлыг илэрхийлэх үзүүлэлтүүд арван жилийн дотор хэрхэн ахисныг үнэмлэхүй (absolute) байдлаар харуулах бол дараагийн хэсэгт нийгмийн байдал нь

бусад хүмүүстэй харьцуулахад хэрхэн ахисныг (relative) байдлаар харуулна.

4.1 Үе доторх боловсролын шилжилт

2010 оны тооллогод хамрагдсан, боловсролын түвшний мэдээлэл нь байгаа хүн амын боловсролын түвшин 2020 оны тооллогоор хэрхэн өөрчлөгдсөнийг дараах хүснэгтэд харуулав. 2010 онд бага буюу боловсролгүй байсан хүмүүсийн 42.1% нь 2020 онд дунд, 5.7% нь дээд боловсролтой болж боловсрол нь дээшилсэн бол 2010 онд дунд боловсролтой байсан хүмүүсийн 21.7% нь 2020 онд дээд боловсролтой болжээ.

Хүснэгт 8. Хүн амын боловсролын түвшин 2010-2020 он

		2020 оны боловсролын түвшин			
2010 оны боловсролын түвшин		Бага	Дунд	Дээд	Нийт
	Бага	117,057 52.2%	94,546 42.1%	12,737 5.7%	224,340 100.0%
	Дунд	-	227,075 78.3%	62,816 21.7%	289,891 100.0%
	Дээд	-	-	97,052 100.0%	97,052 100.0%
	Нийт	117,057 19.2%	321,621 52.6%	172,605 28.2%	611,283 100.0%

Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Боловсролын түвшин нь 2010-2020 онд дээшилсэн хүн амын эзлэх хувийг насны бүлгээр нь тодруулж авч үзье. Манай улсын боловсролын хамралт өндөр учраас хүүхэд залуусын боловсролын түвшний өгсөх шилжилт

маш хүчтэй явагдсаныг Хүснэгт 9-д харуулав. Тодруулбал, 2010 онд 10 хүртэлх настай байсан хүүхдийн 33.7%-ийн боловсролын түвшин нь боловсролгүй болон бага боловсролтой байснаа 2020 онд дунд боловсролтой

болж дээшилсэн. Харин 2010 онд 10-19 настай байсан хүүхдүүдийн 73.8%-ийн боловсролын түвшин нь бага болон

дунд байснаа 2020 онд дунд болон дээд болж дээшилжээ.

Хүснэгт 9. Боловсролын түвшин дээшилсэн хүн амын тоо ба хувь, насны бүлгээр

	Нийт хүн амын тоо	Үүнээс боловсролын түвшин дээшилсэн хүн амын тоо	Эзлэх хувь
Нийт хүн ам	611,283	170,099	27.8%
2010 оны 0-9 настнууд	121,402	40,928	33.7%
2010 оны 10-19 настнууд	123,229	90,898	73.8%
2010 оны 20-29 настнууд	128,449	28,207	22.0%


Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Боловсролын үе доторх үнэмлэхүй шилжилт

Боловсролын үе доторх үнэмлэхүй өгсөлтийг насаар Зураг 1-д харуулав. 2010 онд 0-5 настай байсан хүүхдүүд 2020 онд хараахан бүрэн дунд боловсрол эзэмшиж амжаагүй байх тул боловсролын өгсөх шилжилт

явагдаагүй бол 7-15 настай байсан хүүхдүүд бараг бүгд бага боловсролтой байснаа дунд боловсролтой болжээ. Түүнээс дээш насны хүүхдүүдийн хувьд нас нэмэгдэхийн хэрээр боловсролын түвшин өгсөх хувь буурч байна. Гэхдээ 2010 онд 30-40 настай байсан хүмүүсийн 10 гаруй хувийн боловсролын түвшин дээшилсэн нь анхаарал татахуйц үйл явдал юм.

Зураг 1. Боловсролын үе доторх үнэмлэхүй өгсөлт 2010-2020 онд, насаар




Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Боловсролын түвшний өгсөлтийг одоо хүйсээр харьцуулъя. Зураг 2-т боловсролын түвшин дээшилсэн хүмүүсийн эзлэх хувийг хүйсээр харьцуулж харуулав. Энд өмнөх зурагт харуулсны урвуугаар, төрсөн оны кохорт бүлгээр харуулсан бөгөөд насны бүлэг залуу байх тусам боловсролын өгсөх шилжилт илүү явагдсан ерөнхий хандлага ажиглагдаж байна. Хүйсээр харьцуулбал, 2010 оноос 2020 он хүртэлх арван жилийн хугацаанд 1970-1974 онд төрсөн эмэгтэйчүүдийн боловсрол (9.7%) үеийн эрэгтэйчүүдээс (8.2%) илүү дээшилсэн бол 1975-1984 онд төрсөн эрэгтэйчүүдийн

боловсрол (11.4%-12.0%) энэ арван жилд эмэгтэйчүүдийнхээс (10.0%-11.1%) илүү дээшилжээ. Харин 1985 оноос хойш төрсөн эмэгтэйчүүдийн хувьд эрэгтэйчүүдтэй харьцуулахад боловсролын өгсөх шилжилт илүү явагдсан байна. Тэр дундаа 1990-1994 онд төрсөн эмэгтэйчүүдийн боловсролын түвшний өгсөлт (60.7%) эрэгтэйчүүдийнхээс (46.8%) илүү хурдтай явагджээ. Энэ нь 2010 онд 16-20 настай байсан эмэгтэйчүүд үеийн эрэгтэйчүүдтэй харьцуулахад 2020 он хүртэлх хугацаанд илүү олноороо их дээд сургуульд суралцаж төгссөнийг илтгэж байна.

Зураг 2. Үе доторх боловсролын үнэмлэхүй өгсөлт 2010-2020 онд, хүйсээр болон төрсөн оны кохорт бүлгээр



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо


Боловсролын шилжилтэд хүйсээс гадна тухайн хүний төрсөн байршил ихээхэн ялгаатай нөлөөлдөг. Манай улсын хувьд боловсролын өгсөх шилжилтийн төрсөн байршлаарх ялгааг төрсөн оны кохорт бүлгээр Зураг 3-т харуулав. Эндээс харахад, бүх байршлын хувьд 2010-аас 2020

оны хооронд насны бүлэг залуу байх тусам боловсролын өгсөх шилжилт илүү хүчтэй явагдсан байна. Гэхдээ кохорт бүлгүүдэд төрсөн байршлаас хамаарсан боловсролын өгсөх шилжилт нэлээд ялгаатай явагджээ. Тухайлбал, 1975-1984 онд хөдөөд төрсөн хүмүүс (14.9%-16.5%) бусад газар төрсөн үеийнхээ

хүмүүстэй харьцуулахад боловсролоо илүү дээшлүүлсэн бол 1985 оноос хойш хөдөөд төрсөн хүмүүсийн боловсролын өгсөх шилжилт бусад газар төрсөн хүмүүстэй харьцуулахад хамгийн

удаан (16.4%-91.2%) явагджээ. Энэ нь ерөнхийдөө хөдөөд төрсөн хүмүүс боловсрол эзэмшихэд алгуурлах, бусдаас бага анхаардгийг харуулж байна.

Зураг 3. Үе доторх боловсролын үнэмлэхүй өгсөлт 2010-2020 онд, төрсөн байршлаар болон төрсөн оны кохорт бүлгээр



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

1975-1984 онд аймгийн төвд төрсөн хүмүүс сүүлийн арван жилийн хугацаанд боловсролоо дээшлүүлсэн хувь хамгийн бага байсан (8.9%-10.1%) бол 1995-2004 онд аймгийн төвд төрсөн хүүхэд залуусын боловсрол сүүлийн арван жилд хамгийн хурдтай (88.9%-95.3%) дээшилжээ. Харин 1985-1994 онд төрсөн хүмүүсээс Улаанбаатарт төрсөн хүмүүсийн боловсролын өгсөлт хамгийн их (26.9%-59.7%) явагдсан байна. Энэ нь 2010 онд 16-25 настай байсан, нийслэлд төрсөн хүүхэд, залуус бүрэн дунд болон техник мэргэжлийн дунд боловсрол эзэмших, их дээд сургуульд суралцаж төгсөх магадлал илүү байсныг илтгэнэ.

Хүн амын боловсролын өгсөх шилжилтийг тухайн хүний 2010 оны тооллогод хамрагдсан аймгаар тодруулж харъя. Өөрөөр хэлбэл, аль аймгийн иргэдийн боловсрол 2010 оноос хойших арван жилийн хугацаанд боловсролоо илүү дээшлүүлснийг харьцуулъя. Хүснэгт 10-аас харвал, 1970-1980 онд төрсөн, Баян-Өлгий, Говь-Алтай, Дундговь аймагт амьдарч байсан хүмүүсийн боловсрол дээшилсэн хувь хамгийн их, Сүхбаатар, Орхон, Сэлэнгэ аймагт хамгийн бага байжээ. 1980-1990 онд төрсөн, Улаанбаатар, Баян-Өлгий, Дархан-Уул, Ховдын иргэдийн боловсрол нь хамгийн их дээшилсэн бол Сүхбаатар, Дорнод, Завханод

хамгийн бага байв. Харин 1990-2000 онд төрсөн хүмүүсийн боловсролын хувьд Улаанбаатар, Ховд, Говь-Алтай аймагт хамгийн их, Сүхбаатар, Хэнтий, Баянхонгорт хамгийн бага дээшилжээ.


Хүснэгт 10. 2010-2020 онд боловсролын түвшин дээшилсэн хүн амын хувь, 2010 оны тооллогод хамрагдсан аймгаар, төрсөн оны бүлгээр

	1970-74	1975-79	1980-84	1985-89	1990-94	1995-99
Архангай	6.7	14.3	15.9	18.0	46.9	84.1
Баян-Өлгий	16.5	18.3	19.1	20.6	52.9	84.4
Баянхонгор	7.4	16.3	14.5	13.5	34.8	87.7
Булган	7.5	13.2	14.0	13.7	41.9	89.2
Говь-Алтай	9.2	17.4	12.8	14.5	53.1	92.6
Дорноговь	8.6	9.2	10.8	13.9	37.0	90.7
Дорнод	7.8	9.4	8.7	12.9	38.3	88.8
Дундговь	9.1	16.4	12.5	14.6	40.0	90.7
Завхан	8.5	11.0	10.2	12.1	49.8	89.8
Өвөрхангай	9.2	13.6	15.6	15.7	41.1	87.0
Өмнөговь	9.8	11.5	13.9	12.9	38.8	90.2
Сүхбаатар	6.0	9.4	8.9	10.5	29.4	90.1
Сэлэнгэ	7.3	9.2	9.9	14.9	39.6	89.8
Төв	8.2	11.9	13.2	17.0	46.1	90.5
Увс	7.1	10.3	12.3	10.1	47.8	87.4
Ховд	9.9	14.4	13.4	21.8	56.7	88.8
Хөвсгөл	7.4	14.8	12.7	12.8	38.4	84.5
Хэнтий	8.3	10.6	10.8	12.5	36.6	87.7
Дархан-Уул	10.0	8.7	10.6	26.0	52.6	88.7
Улаанбаатар	9.7	9.0	10.7	29.2	62.1	86.1
Орхон	8.3	7.3	10.0	20.8	50.0	89.8
Говьсүмбэр	6.7	12.1	14.1	15.2	43.4	89.9

Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Нийслэлийн хүн амын байршил буюу хотын төв эсвэл алслагдмал дүүрэгт амьдарч байгаа эсэх нь ядуурал, амьдралын чанарт хүчтэй нөлөөлдөг. Ялангуяа төвлөрсөн дулаан, усан хангамжид холбогдоогүй гэр хороололд амьдардаг хүн амын нийгмийн үзүүлэлтүүд орон сууц, тохилог хаусанд амьдардаг хүн амынхаас доогуур байдаг. Үүнтэй холбоотойгоор, нийслэлийн хүн амын дунд явагдсан боловсролын өгсөх шилжилтийг гэр хороолол болон орон сууцанд амьдардаг байдлаар харьцуулъя.

Зураг 4. Нийслэл дэх боловсролын түвшний үе доторх өгсөлт 2010-2020 онд, 2010 оны байршлаар




Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Зураг 4-д харуулснаар, 1985-1994 онд төрсөн, орон сууцанд амьдарч байсан хүмүүсийн боловсролын түвшин гэр хороололд амьдардаг үеийнхнээсээ илүү дээшилжээ. Ялангуяа 2010 онд 15-20 настай байсан орон сууцанд амьдардаг залуусын хувьд бүрэн дунд боловсролоо дүүргэх, дээд боловсрол эзэмших магадлал нь гэр хороололд амьдардаг үеийнхнээсээ 21.3 нэгж хувиар илүү байгаа нь маш том зөрүү юм.

Боловсролын үе доторх энэхүү шилжилтийг гүнзгийрүүлэн, эмзэг

бүлгийн өрхийн гишүүдийн хувьд энэ шилжилт хэрхэн явагдсаныг тодруулж авч үзье. Энд бид 2010 оны байдлаар 3 ба түүнээс олон хүүхэдтэй ганц бие тэргүүнтэй өрх, хөгжлийн бэрхшээлтэй гишүүнтэй өрхийг эмзэг бүлгийн өрх гэж тодорхойлов. Зураг 5-д эдгээр өрхийн гишүүдийн боловсрол 2010-2020 онд хэрхэн дээшилснийг бусад өрхийн гишүүдийнхтэй харьцуулан харуулав. Эндээс үзэхэд, 1985 оноос хойш төрсөн, эмзэг бүлгийн өрхийн гишүүдийн боловсролын үе доторх өгсөлт бусад өрхийн гишүүдийнхээс доогуур явагдсан байна.

Зураг 5. Эмзэг бүлгийн өрхийн гишүүдийн боловсролын үе доторх өгсөлт, 2010 оны бүлгээр



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Тухайлбал, 1985-1989 онд төрсөн, олон хүүхэдтэй ганц бие эцэг, эхчүүдийн 16 хувь нь 2010-2020 онд боловсролоо дээшлүүлсэн бол хөгжлийн бэрхшээлтэй гишүүн бүхий өрхөд амьдардаг энэ үеийн хүмүүсийн 20 хувь, бусад өрхөд амьдардаг энэ үеийн хүмүүсийн 24 хувь нь боловсролоо дээшлүүлжээ. Харин 1990-1994 онд төрсөн, олон хүүхэдтэй ганц бие тэргүүнтэй өрхийн хүүхэд залуусын 51 хувь, хөгжлийн бэрхшээлтэй гишүүн бүхий өрхөд амьдардаг хүүхэд залуусын 43 хувь, бусад өрхийн хүүхэд залуусын 55 хувь нь боловсролоо дээшлүүлжээ. 1995 оноос хойш төрсөн хүүхдүүдийн хувьд боловсролын өгсөх шилжилтийн зөрүү харьцангуй бага байгаа боловч хөгжлийн бэрхшээлтэй гишүүн бүхий өрхөд амьдардаг хүүхдүүдийн боловсрол бусад өрхийн хүүхдийнхээс 4 нэгж хувиар доогуур, олон хүүхэдтэй ганц бие тэргүүнтэй өрхийн хүүхдүүдийнх 2 нэгж хувиар доогуур байна.

Боловсролын үе доторх харьцангуй шилжилт



Одоо дээр авч үзсэн боловсролын үе доторх шилжилт харьцангуй байдлаар хэрхэн явагдсаныг авч үзье. Тодорхойлолт ёсоор, боловсролын үе доторх харьцангуй өгсөлт нь нийт хүн амд харьцуулсан тухайн хүний боловсролын эрэмбэ 2010-аас 2020 оны хооронд урагшилсныг харуулах бол харьцангуй уруудалт нь эрэмбэ ухарсныг илтгэнэ. Иймээс тухайн хүний боловсролын түвшин дээшилсэн л бол түүний нийт хүн амд эзлэх боловсролын эрэмбэ урагшилж, харьцангуй өгсөх шилжилт явагдсан гэж үзнэ. Тиймээс тухайн хугацаанд бүрэн дунд эсвэл дээд боловсрол эзэмшсэн залуусын боловсролын харьцангуй эрэмбэ буюу байрлал урагшлах нь гарцаагүй. Харин ялангуяа бага, дунд боловсролтой хүмүүсийн боловсролын

түвшин нэмэгдээгүй хэвээр байгаа тохиолдолд өөр нэг хүн дээд боловсрол эзэмшсэнээр түүний боловсролын эрэмбэ ухрах боломжтой. Хугацааны эхэнд боловсролын түвшин хамгийн өндөртэй буюу дээд боловсролтой байсан хүмүүсийн хувьд хугацааны эцэст тэдний боловсролын түвшин нэмэгдэхгүй боловч боловсролын харьцангуй эрэмбэ нь ухрахгүй.

Зураг 6-д энэхүү 2010-2020 явагдсан боловсролын үе доторх харьцангуй өгсөлт ба уруудалтыг хүйсээр харьцуулан харуулав. Зураг 6-ын А хэсгээс харахад,

1985 оноос хойш төрсөн эмэгтэйчүүдийн боловсролын харьцангуй өгсөлт үеийнхээ эрэгтэйчүүдийг бодвол илүү явагджээ. Энэ үеийн эмэгтэйчүүдийн боловсролын үнэмлэхүй өгсөлт үеийнхээ эрэгтэйчүүдээс илүү явагдаж байсан билээ (Зураг 2-ийг харна уу). Гэхдээ 1985 оноос өмнө төрсөн эрэгтэй, эмэгтэй хүмүүсийн үнэмлэхүй өгсөлттэй харьцуулахад, харьцангуй өгсөлт бага зэрэг доогуур хэмжигджээ. Энэ нь 1990 оноос хойш төрсөн хүмүүс 2010-2020 онд боловсролын түвшнээ илүүтэй дээшлүүлж харьцангуй байраа илүү урагшлуулж буйтай холбоотой юм.

Зураг 6. Боловсролын эрэмбийн харьцангуй шилжилт 2010-2020 онд, хүйсээр, кохорт бүлгээр



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо


Гэхдээ боловсролын энэ эрэмбэ хэрхэн хойшилж байгааг Зураг 6-ын Б хэсэг илүү тодорхой харуулж байна. Ялангуяа 1995 оноос өмнө төрсөн бүх эрэгтэйчүүдийн хувьд боловсролын эрэмбэ ухарч, харьцангуй уруудалт явагдах хувь нь үеийнхээ эмэгтэйчүүдтэй харьцуулахад 10 гаруй нэгж хувиар илүү байна. 1990 оноос өмнө төрсөн эрэгтэй, эмэгтэйчүүдийн

боловсролын харьцангуй өгсөлт ойролцоо боловч харьцангуй уруудалт ийм их зөрүүтэй байгаа нь энэ үеийн эмэгтэйчүүд дээд боловсрол эзэмшсэн хувь эрэгтэйчүүдээс өндөр байгаатай холбоотой. Өөрөөр хэлбэл, дээд боловсрол эзэмшсэн хүмүүсийн харьцангуй байр бусад хүмүүсийн боловсролын түвшин дээшлэхээс үл хамаарч хэвээр хадгалагдана.

Одоо боловсролын түвшний харьцангуй шилжилт тухайн хүний төрсөн газраас хамаарч хэр ялгаатай явагдсаныг тодруулж авч үзье. Боловсролын үе доторх үнэмлэхүй өгсөлтийн адилаар (Зураг 3), 2010-2020 онд явагдсан боловсролын үе доторх харьцангуй өгсөлт нь 1975-1985 онд хөдөөд төрсөн хүмүүсийн хувьд бусад газар төрсөн хүмүүсийнхээс харьцангуй илүү, 1985 оноос хойш хөдөөд төрсөн

хүмүүсийн хувьд бусад газар төрсөн хүмүүсийнхээс харьцангуй бага байжээ (Зураг 7. А). Бүх байршлын хувьд нэг ажиглагдаж буй зүйл бол 1995 оноос хойш төрсөн хүмүүсийн хувьд боловсролын харьцангуй өгссөн хувь нь үнэмлэхүй өгссөн хувиас доогуур байна. Энэ нь дээр дурдсанчлан, урьд нь дээд боловсрол эзэмшсэн хүмүүсийн эрэмбэ ухрахгүйтэй холбоотой.

Зураг 7. Боловсролын эрэмбийн харьцангуй шилжилт 2010-2020 онд, төрсөн газраар, кохорт бүлгээр



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Харин 2010-2020 онд боловсролын харьцангуй уруудалт тухайн хүний төрсөн газраас хамаарч хэр ялгаатай явагдсаныг Зураг 7-ийн Б хэсэгт харуулав. 1970-1995 онд төрсөн хүмүүсийн боловсролын эрэмбэ ухарсан байдал төрсөн газраас хамаарч эрс ялгаатай байна. Улаанбаатарт төрсөн энэ үеийн хүмүүст боловсролын харьцангуй уруудалт хамгийн бага байсан бол хөдөөд төрсөн хүмүүсийн боловсролын уруудалт хамгийн их байжээ. Энэ нь хот газарт төрсөн

хүмүүсийн боловсролын дундаж түвшин сонгосон хугацааны эхэнд буюу 2010 онд илүү өндөр, сумын төв, хөдөөд төрсөн хүмүүсийн боловсролын дундаж түвшин доогуур байсан, хөдөөд төрсөн хүмүүс 2010-2020 онд боловсролоо дээшлүүлэхэд бага анхаарсантай холбоотой. Эндээс үзэхэд, хөдөөд болон сумдад төрсөн хүмүүс томоохон хот, сууринд төрсөн хүмүүсийг бодвол боловсролын хувьд нийгэмд эзлэх байр суурь доошлох магадлал маш өндөр байдаг ажээ.

4.2 Үе доторх хөдөлмөр эрхлэлтийн шилжилт

3-р бүлэгт судалгааны арга зүйн хэсэгт тайлбарласны дагуу, бид тухайн хүний хөдөлмөр эрхлэлтийн статусын өөрчлөлтийг хөдөлмөр эрхлэлтийн өөрчлөлт, ажил эрхэлж буй салбарын өөрчлөлт, ур чадвар буюу ажил мэргэжлийн түвшний өөрчлөлт гэсэн гурван үзүүлэлтээр зэрэг хэмжсэн. Тухайлбал, өмнө нь цалин хөлсгүй ажил эрхэлдэг байснаа дараа нь цалинтай ажил эрхэлдэг, эсвэл ажил олгогч болсон бол хөдөлмөр эрхлэлтийн статус өгссөн гэж үзнэ. Харин өмнө нь цалин хөлстэй ажил эрхэлдэг эсвэл ажил олгогч байснаа дараа нь цалин хөлсгүй ажилтай эсвэл ажилгүй болсон бол хөдөлмөр эрхлэлтийн статус уруудсан гэж үзнэ. Үүнтэй төстэйгөөр, урьд нь ХАА-д ажилладаг байснаа дараа нь ХАА-н бус салбарт ажиллаж байвал түүнийг салбарын хувьд өгсөлт, харин ХАА-н бус салбарт ажилладаг байснаа ХАА-д шилжиж ажиллавал салбарын хувьд уруудалт гэж тодорхойлсон.

Ажил мэргэжлийн түвшин нь бас тухайн хүний ур чадвар, туршлагыг

илэрхийлдэг. Урьд нь ур чадвар бага шаардсан ажил мэргэжилтэй (контор, үйлчилгээний ажилтан, худалдаа үйлчилгээний ажилтан, ХАА, үйлдвэрлэл, барилга, машин механизмын оператор, угсрагч, энгийн ажил мэргэжил гэх мэт) байснаа хожим нь ур чадвар их шаардсан ажил мэргэжилтэй (менежер, мэргэжилтэн, техникч гэх мэт) болсон бол ур чадварын үе доторх өгсөлт гэж тодорхойлов. Харин ур чадвар их шаардсан ажил эрхэлдэг байснаа хожим нь ур чадвар бага шаардсан ажил эрхэлж байвал ур чадварын үе доторх уруудалт гэж тодорхойллоо.

Хөдөлмөрийн зах зээл дээрх үе доторх үнэмлэхүй шилжилт

2010-2020 онд хөдөлмөрийн зах зээл дээр ур чадвар, салбар, хөдөлмөр эрхлэлтийн статусын хувьд ямар шилжилт явагдсаныг Хүснэгт 11-д харуулав. Ерөнхийдөө, сүүлийн арван жилийн хугацаанд хөдөлмөрийн зах зээл дээр өгсөх шилжилт давамгайлжээ. Ялангуяа хөдөлмөр эрхлэлтийн статус болон салбарын хувьд өгсөх шилжилт илүү явагджээ.

Хүснэгт 11. Хөдөлмөрийн зах зээл дээрх үнэмлэхүй шилжилт 2010-2020 онд

	Өгссөн	Хэвээр	Уруудсан	Нийт
Хөдөлмөр эрхлэлтийн статус	23.5%	67.0%	9.5%	100%
Ажиллаж буй салбар	22.9%	65.4%	11.7%	100%
Ур чадвар/албан тушаал	12.5%	81.1%	6.4%	100%

Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Эдгээр шилжилтийг хүн амын төрсөн оны бүлгээр тодруулж харвал (Хүснэгт 12), 2010-аас 2020 оны хооронд залуу үеийнхэн хөдөлмөрийн зах зээл дээр

үнэмлэхүй өгсөх шилжилт илүү хийсэн бол ахмад үеийнхэн үнэмлэхүй уруудах шилжилт илүү хийжээ. Тухайлбал, 1990-1994 онд төрсөн залуусын 50.8%

нь 2010 онд ажилгүй, цалин хөлсгүй байснаа 2020 онд цалин хөлстэй ажил эрхэлдэг болж хөдөлмөр эрхлэлт нь дээшилжээ. Харин энэ үеийн залуусын 2.3% нь 2010 онд цалин хөлстэй ажилтай байснаа 2020 онд ажилгүй, эсвэл цалин хөлсгүй ажил эрхэлдэг болж хөдөлмөр

эрхлэлт нь уруудсан байна. 1990-1994 онд төрсөн үеийнхэн 2010 онд 15-20 настай бөгөөд цалин хөлстэй ажилтай байх магадлал бага байсан. Харин 2020 онд энэ үеийнхэн 25-30 настай байх тул цалин хөлстэй ажил эрхлэх магадлал нь эрс нэмэгдэж байна.

Хүснэгт 12. Хөдөлмөрийн зах зээл дээрх үнэмлэхүй шилжилт 2010-2020 онд, төрсөн оны бүлгээр

Төрсөн оны бүлэг	Ажил эрхлэлтийн статус	Салбар	Ажил мэргэжлийн түвшин
Өгссөн			
1960-1964 он	7.9%	7.7%	3.9%
1965-1969 он	13.7%	12.6%	6.5%
1970-1974 он	17.6%	16.0%	8.3%
1975-1979 он	19.7%	18.5%	9.4%
1980-1984 он	21.8%	20.4%	12.0%
1985-1989 он	33.4%	32.9%	20.2%
1990-1994 он	50.8%	51.4%	26.5%
Уруудсан			
1960-1964 он	19.7%	24.7%	11.5%
1965-1969 он	11.2%	14.5%	7.7%
1970-1974 он	9.0%	12.1%	7.1%
1975-1979 он	8.6%	11.3%	6.9%
1980-1984 он	9.5%	11.6%	7.7%
1985-1989 он	8.3%	9.5%	5.8%
1990-1994 он	2.3%	2.5%	0.6%

Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Тэгвэл насны бүлэг ахих тусам ажил эрхлэлтийн өгсөх шилжилт хийсэн хувь буурч, уруудах шилжилт хийсэн хувь нэмэгдэж байна. 1960-1964 онд төрсөн хүмүүсийн 7.9%-ийн ажил эрхлэлт 2010-аас 2020 оны хооронд дээшилсэн бол 19.7%-ийн ажил эрхлэлт энэ хугацаанд урууджээ. Энэ үеийнхэн 2010 онд 45-50 настай байсан бол 2020 онд 55-60 настай болж, зарим нь тэтгэвэрт гарч эхэлсэн тул ажил эрхлэлтийн уруудах хандлага давамгайлж байна.

Салбарын хувьд өгсөх ба уруудах шилжилт хийсэн хүмүүсийн хувь насны бүлгээр авч үзвэл дээр дурдсан ажил эрхлэлтийн статус шилжсэнтэй ерөнхийдөө ойролцоо байна. Харин ур чадварын хувьд өгсөх, уруудах шилжилт хийсэн хүмүүсийн эзлэх хувийг насны бүлгээр авч үзвэл ажил эрхлэлтийн статусын болон салбарын шилжилт хийсэн хүмүүсийн эзлэх хувиас ойролцоогоор хоёр дахин бага байна.


Одоо хөдөлмөрийн зах зээл дээрх шилжилтийг хүйсээр харьцуулж харъя. Зураг 8-оос харахад аль ч хүйсийн хувьд залуу байх тусам хөдөлмөрийн зах зээл дээрх өгсөх шилжилт илүү, уруудах шилжилт бага байх хандлагатай байна.



Хөдөлмөр эрхлэлтийн статусын хувьд, 1960-1970 он ба 1990-ээд онд төрсөн эмэгтэйчүүд нь үеийнхээ эрэгтэйчүүдтэй харьцуулахад, цалин хөлсгүй ажлаас цалин хөлстэй ажилд дэвшсэн хувь бага бол 1970-1990 онд төрсөн эмэгтэйчүүдийн хувьд өгсөх шилжилт илүү явагджээ (Зураг 8.А). Харин 1960-1965 онд төрсөн эмэгтэйчүүдийн хувьд хөдөлмөр эрхлэлтийн статус буурсан хувь нь

үеийнхээ эрэгтэйчүүдийнхээс илүү бол 1965-1990 онд төрсөн эрэгтэйчүүдэд хөдөлмөр эрхлэлтийн статус доошлох нь илүү байжээ (Зураг 8.Б).

Салбарын хувьд, 1960-1970 он ба 1990-ээд онд төрсөн эмэгтэйчүүд нь үеийнхээ эрэгтэйчүүдтэй харьцуулахад ХАА-аас ХАА-н бус салбарын ажилд шилжих хувь бага бол 1970-1990 онд төрсөн эмэгтэйчүүдийн энэ шилжилт илүү байна (Зураг 8.В). 1960-1965 онд төрсөн эмэгтэйчүүдийн хувьд салбар уруудсан хувь нь үеийнхээ эрэгтэйчүүдийнхээс илүү бол 1970-1990 онд төрсөн эрэгтэйчүүдэд салбар уруудах шилжилт илүү байна (Зураг 8.Г).

Зураг 8. Хөдөлмөр эрхлэлтийн үе доторх үнэмлэхүй шилжилт, хүйсээр, кохорт бүлгээр





Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Нас залуу байх тусам эмэгтэйчүүдийн ажил мэргэжлийн түвшин өгсөх магадлал үеийнхээ эрэгтэйчүүдтэй харьцуулахад улам нэмэгдэж байна (Зураг 8.Д). Тухайлбал, 1960-1964 онд төрсөн эмэгтэйчүүдийн ажил мэргэжлийн түвшин өгсөх магадлал 2.1 нэгж хувиар эрэгтэйчүүдийнхээс бага байсан бол 1965 оноос хойш төрсөн эмэгтэйчүүдийн ажил мэргэжлийн өгсөх магадлал илүү гарч, энэ зөрүү 1990 оноос хойш төрсөн эмэгтэйчүүдийн хувьд 6.4 нэгж хувь болж байна. Харин ажил мэргэжлийн түвшин уруудах магадлал бүх насны бүлгийн эмэгтэйчүүдийн хувьд эрэгтэйчүүдийнхээс илүү байна (Зураг 8.Е). Ялангуяа 1960-1970 онд төрсөн эмэгтэйчүүдийн ажил мэргэжлийн түвшин уруудах магадлал үеийнхээ эрэгтэйчүүдээс 10 нэгж хувь хүртэл илүү байна. Гэхдээ энэ зөрүү залуу эмэгтэйчүүдийн хувьд буурч, 1990 оноос хойш төрсөн эмэгтэйчүүдийн хувьд ажил мэргэжлийн түвшин буурах магадлал адилхан 0.6% байна.

Ерөнхийдөө хөдөлмөрийн зах зээл дээрх өгсөх шилжилт 1970-аад оноос хойш төрсөн эмэгтэйчүүдийн хувьд үеийнхээ эрэгтэйчүүдээс илүү байгаа хандлага нь тухайн насны

эмэгтэйчүүдийн боловсролын түвшин эрэгтэйчүүдээсээ илүү байгаатай зарим талаар холбоотой.

Одоо харин тухайн хүний хөдөлмөрийн зах зээл дээрх шилжилтэд төрсөн байршлаас хамаарсан ялгаа хэр хүчтэй байгааг авч үзье. Зураг 9-аас харахад, хот, хөдөө хаана ч төрсөн бай нас залуу болох тусам 2010-2020 оны хооронд хөдөлмөрийн зах зээлд өгсөж шилжсэн хувь нь ерөнхийдөө нэмэгдэж, уруудаж шилжсэн хувь нь буурах хандлагатай байна.

Хөдөлмөр эрхлэлтийн статус өгсөх буюу ажилгүй, эсвэл цалин хөлсгүй ажил эрхэлж байснаа цалинтай ажилд шилжих хандлага нийслэлд төрсөн, бүх насны бүлгийн хүмүүст хамгийн өндөр байгаа бол хөдөөд төрсөн, бүх насны бүлгийн хүмүүст хамгийн бага байна (Зураг 9.А). Жишээлбэл, 1960-1964 онд нийслэлд төрсөн хүмүүсийн 10.4 хувь нь 2010-2020 онд цалин хөлстэй ажилд шилжсэн бол хөдөөд төрсөн хүмүүсийн хувьд энэ үзүүлэлт 4.0 хувь байна. Тэгвэл 1990-1994 онд нийслэлд төрсөн хүмүүсийн 55.7 хувь нь цалин хөлстэй ажилд шилжсэн байхад хөдөөд төрсөн хүмүүсийн дөнгөж 29.0 хувь нь ийм шилжилт хийжээ.


Хөдөлмөр эрхлэлтийн статус уруудсан хувь нийслэлд төрсөн бүх насны хүмүүст хамгийн өндөр байгаа бол хөдөөд төрсөн хүмүүст хамгийн бага байна (Зураг 9.Б). Жишээлбэл, 1960-1964 онд нийслэлд төрсөн хүмүүсийн 23.5 хувь нь 2010-2020 онд цалин хөлсгүй ажил руу шилжсэн бол хөдөөд төрсөн энэ үеийн хүмүүсийн 10.0 хувь уруудах шилжилт хийжээ. Уруудах шилжилтийн хувь нь нас буурах хэрээр ерөнхийдөө бүх бүлгийн хувьд буурсаар, 1990-1994 онд нийслэлд төрсөн хүмүүст 2.5 хувь, хөдөөд төрсөн хүмүүст 0.9 хувь болжээ.


Ажилладаг салбарын хувьд төрсөн оны бүлгээр, төрсөн байршлаар нь өгсөх (Зураг 9. В) ба уруудах (Зураг 9.Г) шилжилтийг авч үзвэл хөдөлмөр эрхлэлтийн статусын өгсөх, уруудах шилжилттэй нэлээд төстэй өөрчлөлт явагджээ. Өөрөөр хэлбэл, нийслэл, хот суурин газар төрсөн бүх насны бүлгийн хүмүүс хөдөөд төрсөн хүмүүстэй

харьцуулахад ХАА-н салбараас бусад салбарт шилжиж ажилласан хувь нь илүү байна. Мөн хотод төрсөн хүмүүс хөдөөд төрсөн хүмүүстэй харьцуулахад бусад салбараас ХАА-д шилжиж ажилласан хувь нь илүү байна.

Ажил мэргэжлийн түвшин өгсөх буюу мэргэжил, ур чадвар бага шаардах ажил эрхэлж байснаа ур чадвар шаардах ажилд шилжих, албан тушаал дэвших хандлага нийслэлд төрсөн, бүх насны бүлгийн хүмүүст хамгийн өндөр, хөдөөд төрсөн, бүх насны бүлгийн хүмүүст хамгийн бага байна (Зураг 9. Д). Жишээлбэл, 1960-1964 онд нийслэлд төрсөн хүмүүсийн 5.3 хувь нь 2010-2020 онд ажил мэргэжлийн түвшин ахисан бол хөдөөд төрсөн энэ үеийн хүмүүсийн 1.7 хувь нь ажил мэргэжлийн түвшнээ ахиулжээ. Тэгвэл 1990-1994 онд нийслэлд төрсөн хүмүүсийн 31.1 хувь нь ажил мэргэжлээ ахиулсан байхад хөдөөд төрсөн хүмүүсийн 13.7 хувь нь ажил мэргэжлээ ахиулжээ.

Зураг 9. Хөдөлмөр эрхлэлтийн үе доторх үнэмлэхүй шилжилт, төрсөн байршлаар





Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Гэхдээ ажил мэргэжлийн түвшин уруудсан хувь ч нийслэлд төрсөн бүх насны хүмүүст хамгийн өндөр байгаа бол хөдөөд төрсөн хүмүүст хамгийн бага байна (Зураг 9. Е). Жишээлбэл, 1960-1964 онд нийслэлд төрсөн хүмүүсийн 16.7 хувь нь 2010-2020 онд ажил мэргэжлийн түвшин доогуур ажилд шилжсэн бол хөдөөд төрсөн энэ үеийн хүмүүсийн 5.3 хувь нь ажил мэргэжлийн түвшний уруудах шилжилт хийжээ. Ажил мэргэжлийн уруудах шилжилтийн хувь нь насны бүлэг залуужих хэрээр ерөнхийдөө бүх бүлгийн хувьд буурч, 1990-1994 онд нийслэлд төрсөн хүмүүст 0.8 хувь, хөдөөд төрсөн хүмүүст 0.2 хувь болжээ.

Эндээс дүгнэхэд, нийслэл, хот суурин газар төрсөн бүх насны бүлгийн

хүмүүс хөдөлмөрийн зах зээл дээр илүү хөдөлгөөнтэй, өгсөх болон уруудах шилжилт хийх магадлал нь хөдөөд төрсөн хүмүүсийнхээс илүү байна. Өгсөх ба уруудах шилжилтийн зөрүүгээр харвал, 1970 оноос хойш төрсөн хүмүүс хөдөлмөрийн зах зээл дээр өгсөх шилжилт хийх нь уруудсанаасаа илүү, тэр дундаа нийслэл, хот суурин газар төрсөн хүмүүст энэ цэвэр зөрүү нь хөдөөд төрсөн хүмүүсийнхээс илүү явагджээ. Нас залуу байх тусам энэ цэвэр зөрүү улам өсөх хандлагатай байна.

Одоо хөдөлмөрийн зах зээл дээр хүмүүсийн ажил мэргэжлийн түвшин өгссөн байдлыг тухайн хүний 2020 оны тооллогод хамрагдсан аймгаар харьцуулъя. Өөрөөр хэлбэл, 2020 оны

байдлаар аймаг, нийслэлд ажил эрхэлж буй хүмүүсийн ажил мэргэжлийн түвшин хэрхэн дээшилснийг авч үзье. Хүснэгт 13-аас харвал, бүх насны бүлгийнхний ажил мэргэжлээ дээшлүүлэх боломж нь Улаанбаатарт хамгийн их байсан бол Дархан-Уул, Орхон, Говьсүмбэр зэрэг

том хотууд үүний дараа орж байна. Мөн уул уурхайн үйл ажиллагаа идэвхтэй явагдаж буй Өмнөговь аймагт ажил мэргэжлийн түвшнээ дээшлүүлсэн хувь 1990 оноос хойш төрсөн хүмүүсийн хувьд нэлээд өндөр байна.

Хүснэгт 13. 2010-2020 онд ажил мэргэжлийн түвшин дээшилсэн хүн амын хувь, 2020 оны тооллогод хамрагдсан аймгаар, төрсөн оны бүлгээр

	1965-69	1970-74	1975-79	1980-84	1985-89	1990-94	1995-99
Архангай	3.3	3.1	4.0	6.1	13.1	20.5	12.5
Баян-Өлгий	5.7	5.4	4.9	6.3	11.9	13.3	6.6
Баянхонгор	3.7	4.7	5.7	5.5	11.2	17.1	12.3
Булган	4.7	4.9	4.0	6.8	13.6	22.6	15.1
Говь-Алтай	4.2	6.5	5.5	7.2	16.5	28.2	14.2
Дорноговь	5.2	5.3	6.5	9.1	13.7	22.6	15.1
Дорнод	4.8	6.4	8.5	10.9	17.1	20.7	15.2
Дундговь	2.6	4.9	4.9	5.6	14.6	22.8	14.8
Завхан	4.4	5.6	5.4	6.2	19.0	24.2	16.3
Өвөрхангай	4.4	4.7	4.1	6.3	11.3	21.0	12.3
Өмнөговь	6.0	8.2	8.4	9.4	17.8	21.3	14.1
Сүхбаатар	2.6	4.7	3.6	5.5	13.6	16.9	10.5
Сэлэнгэ	4.7	7.2	8.0	10.5	15.8	19.8	13.1
Төв	4.2	5.3	5.5	7.0	15.9	24.0	12.6
Увс	5.0	6.0	6.0	6.5	17.8	22.6	12.7
Ховд	4.8	8.8	5.6	8.0	17.4	23.6	13.6
Хөвсгөл	3.8	4.2	4.3	5.4	12.1	17.9	11.9
Хэнтий	5.7	7.7	6.8	10.3	14.3	20.1	12.2
Дархан-Уул	6.5	9.2	11.2	14.9	20.0	26.7	16.3
Улаанбаатар	8.8	11.1	13.0	15.7	24.4	31.7	18.1
Орхон	6.8	7.2	10.2	13.0	19.7	24.3	15.5
Говьсүмбэр	7.8	12.1	11.1	10.9	17.0	29.4	15.5


Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

2010 онд нийслэл хотод нийт хүн амын 44,6%, 2020 онд 47.1% амьдарч байсан (1212.mn). Хэдийгээр нийслэлд хүмүүсийн ажил мэргэжлийн түвшнээ ахиулж, илүү ур чадвартай ажилд шилжин ажиллах боломж хамгийн их байгаа боловч тухайн хүний хүйс, амьдарч буй байршлаас хамаарсан

ялгаа ямар байгааг тодруулъя. Зураг 10-өөс харахад, тухайн хүн орон сууцанд амьдардаг бол хожим нь ажил мэргэжлийн түвшин өгсөх магадлал илүү бөгөөд нас залуу байх тусам энэ зөрүү улам ихсэж байна. Мөн нийслэлд ажил эрхэлж буй эмэгтэй хүмүүс үеийнхээ эрэгтэй хүмүүсээс ажил мэргэжлийн

хувьд өгсөх магадлал илүү байна. Гэхдээ амьдардаг сууцаар нь харьцуулбал, орон сууцанд амьдардаг эрэгтэйчүүд гэр хороололд амьдардаг үеийнхээ эмэгтэйчүүдээс ажил мэргэжлийн түвшин өгсөх боломж нь илүү байжээ.

Зураг 10. Нийслэлд 2010-2020 онд явагдсан ажил мэргэжлийн түвшний үе доторх өгсөлт, 2010 оны байршлаар болон хүйсээр



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Зураг 10-аас ажиглаж болох өөр нэг онцлог бол 1975-1985 онд төрсөн, орон сууцанд амьдарч байсан эрэгтэйчүүд 2010-2020 онд ажил мэргэжлийн түвшнээ ахиулсан байдал нь үеийнхээ эмэгтэйчүүдээс нэлээд доогуур байгаа явдал юм. Энэ үед төрсөн эрэгтэйчүүд үеийнхээ эмэгтэйчүүдээс боловсролын түвшнээр илүү хоцорсон байдаг гэдгийг бид өмнө нь хэмжиж харуулсан байгаа. Гэр хороололд амьдарч байсан энэ үеийн эрэгтэйчүүдийн хувьд дээрх зөрүү бусад үеийнхээс төдийлөн ялгаагүй байна.


Ажил мэргэжлийн түвшний үе доторх шилжилтийг эмзэг бүлгийн өрхийн гишүүдийн хувьд тодруулж авч үзье. Энд бид 2010 оны байдлаар 3 ба түүнээс олон хүүхэдтэй ганц бие тэргүүнтэй өрх, хөгжлийн бэрхшээлтэй гишүүнтэй өрхийг эмзэг бүлгийн өрх гэж

тодорхойлсон. Зураг 11-д эдгээр өрхийн гишүүдийн ажил мэргэжлийн түвшин 2010-2020 онд хэрхэн дээшилснийг бусад өрхийн гишүүдийнхтэй харьцуулан харуулав. Эндээс үзэхэд, бүх насныхны хувьд, эмзэг бүлгийн өрхийн гишүүдийн ажил мэргэжлийн түвшний үе доторх өгсөлт бусад өрхийн гишүүдийнхээс нэлээн доогуур явагдсан байна. Ялангуяа, 1980-1989 онд төрсөн, олон хүүхэдтэй ганц бие залуус ажил мэргэжлийн түвшнээ ахиулах боломж маш хязгаарлагдмал байжээ. Тухайлбал, тэдний дөнгөж 5-6 хувь нь 2010-2020 онд ажил мэргэжлээ ахиулж чадсан бол хөгжлийн бэрхшээлтэй гишүүн бүхий өрхийн 1980-1989 онд төрсөн залуусын 9-16 хувь, бусад өрхийн залуусын 12-21 хувь ажил мэргэжлийн түвшнээ дээшлүүлсэн байна. Харин 1990-1994 онд төрсөн, олон хүүхэдтэй ганц бие

тэргүүнтэй өрхийн хүүхэд, залуусын ажил мэргэжлийн түвшин дээшилсэн хувь бусад өрхийн хүүхэд, залуусынхаас харьцангуй бага буюу 6 пунктаар доогуур

байгаа бол хөгжлийн бэрхшээлтэй гишүүн бүхий өрхийн хүүхэд залуусын ажил мэргэжлийн түвшний өгсөлт 9 пунктаар доогуур байна.

Зураг 11. Эмзэг бүлгийн гишүүдийн ажил мэргэжлийн түвшний өгсөлт, 2010 оны бүлгээр



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Эндээс дүгнэхэд, эмзэг бүлгийн өрхийн насанд хүрэгчид төдийгүй хүүхдүүд ч боловсролын түвшний хоцрогдлоос шалтгаалаад хөдөлмөрийн зах зээл дээр ажил мэргэжлээ ахиулах боломж үеийнхнээсээ нэлээд доогуур байдаг байна.

Хөдөлмөр эрхлэлтийн үе доторх үнэмлэхүй шилжилтэд нөлөөлсөн хүчин зүйлсийн шинжилгээ

Хөдөлмөр эрхлэлтэд гарсан өөрчлөлтийг 2010 ба 2020 оны хүмүүсийн ажил эрхлэлтийн болон бусад шинж чанарын талаарх дэлгэрэнгүй тоон өгөгдлийг ашиглан, илүү уян хатан загваруудаар шинжлэх боломжтой. Энд бид хөдөлмөр эрхлэлтэд гарсан гол

өөрчлөлтийг ажил мэргэжлийн түвшний (occupational) өөрчлөлтөөр төлөөлүүлэн авч үзэж **ажил мэргэжлийн түвшний үе доторх шилжилтэд** нөлөөлж болох хүчин зүйлсийг 2 төрлийн регрессийн загвар ашиглан үнэлсэн. Эхний загвар нь 2010 ба 2020 оны хөдөлмөр эрхлэлтийн мэдээллийг хувь хүний түвшинд холбож панел өгөгдөл үүсгэлгүй, шууд нийлүүлсэн холимог хөндлөн (pooled cross sectional) өгөгдөл ашиглах энгийн пробит регресс (probit)-ийн загвар [5] бол дараагийн загвар нь 2010 ба 2020 оны хөдөлмөр эрхлэлтийн мэдээллийг хувь хүний түвшинд холбосон панел өгөгдөл ашиглах пробит (panel probit) загвар [6] юм.

Дээрх хоёр эмпирик загвар ашиглан хүн амын ажил мэргэжлийн түвшин дээшлэхэд нөлөөлөх хүчин зүйлсийн үнэлгээг Хүснэгт 14-д харуулав.

Эндээс харахад, хоёр үнэлгээгээр хүчин зүйлсийн нөлөөллийн чиглэл буюу үнэлэгдсэн коэффициентын өмнөх тэмдэг адил байна. Гэхдээ энд [5] тэгшитгэлийн дагуу хийсэн энгийн холимог үнэлгээ нь өгөгдлийн панел шинжийг харгалзаагүй учраас [6] тэгшитгэл буюу панел пробит үнэлгээний үр дүнг цаашид ашиглах нь зүйтэй юм.

Панел үнэлгээний үр дүнгээс үзвэл, 2010-аас 2020 онд хүмүүсийн ажил мэргэжлийн түвшин ерөнхийдөө дээшлэхэд хугацааны тогтмол нөлөө хүчтэй нөлөөлжээ. Тухайлбал, энэ хугацаанд ажил мэргэжлийн түвшнээ ахиулах магадлал нь 14.9% нэмэгджээ. Энэ нь тухайн хүний нас 10 жилээр

ахиж, туршлага, ур чадвар нь тэр хэрээр дээшилснээс гадна энэ хугацаанд улс даяар хөдөлмөрийн зах зээл өргөжиж, олон хүний ажил мэргэжлийн түвшнээ ахиулах боломж нэмэгдсэнтэй холбоотой байж болох юм.

Мөн хувь хүний тогтмол нөлөө болох хүйс, төрсөн он (кохорт бүлэг)-ы ялгаа нь тухайн хүний ажил мэргэжлийн түвшинд маш их нөлөөлдөг байна. Эмэгтэйчүүдийн ажил мэргэжлийн түвшин өндөр байх магадлал эрэгтэйчүүдийнхээс 19.2% илүү өндөр байдаг бол 1960-1969 онд төрсөн, хамгийн туршлагатай ажиллагсдын ажил мэргэжлийн түвшин дээшлэх магадлал нь дараа үеийнхнээсээ 14.8% - 34.0% илүү байна.

Хүснэгт 14. Ажил мэргэжлийн түвшний шилжилтэд нөлөөлөх хүчин зүйлсийн үнэлгээ

Тайлбарлах хувьсагч	[1] Энгийн холимог (pooled) ложит	[2] Панел пробит
Жил: 2020 он (2010 он = 0)	0.022*** (0.000)	0.260*** (0.008)
Хүйс: Эмэгтэй (Эрэгтэй = 0)	0.266*** (0.007)	0.339*** (0.010)
Кохорт бүлэг (1960-69 он = 0)		
1970-79	- 0.208*** (0.011)	- 0.260*** (0.014)
1980-89	- 0.488*** (0.010)	- 0.593*** (0.014)
1990-94	- 0.526*** (0.013)	- 0.618*** (0.017)
Ам бүлийн тоо	- 0.022*** (0.002)	- 0.025*** (0.002)
Боловсрол (Суурь боловсролоос доогуур түвшин = 0)		
Дунд	1.687*** (0.048)	1.796*** (0.051)
Дээд	4.224*** (0.048)	4.957*** (0.053)
Одоогийн байршил (Нийслэл = 0)		
Аймгийн төв	0.009	- 0.000

	(0.009)	(0.012)
Тосгон	- 0.337***	- 0.385***
	(0.028)	(0.035)
Сумын төв	0.294***	0.292***
	(0.012)	(0.015)
Хөдөө	- 0.881***	- 1.052***
	(0.014)	(0.018)
Тогтмол	-47.279***	- 4.027***
	(1.496)	(0.054)
Ажиглалтын тоо	591,288	591,288
Псевдо R ²	0.274	0.486

Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Хугацааны болон хувь хүний тогтмол нөлөөнөөс гадна хүмүүсийн хугацаанаас хамаарсан шинж чанарыг илэрхийлэх хувьсагчид болох ажиллагсдын тухайн үеийн ам бүлийн тоо, боловсролын түвшин, байршил нь ажил мэргэжлийн түвшин ахихад мэдэгдэхүйц нөлөөтэй байна. Жишээлбэл, ажилтны ам бүлийн тоо 1-ээр нэмэгдэхэд ажил мэргэжлийн түвшин дээшлэх магадлал 2.1% буурдаг аж. Боловсролын түвшин нэмэгдэх хэрээр ажил мэргэжлийн түвшин дээшлэх боломж эрс нэмэгдэж байна. Байршлын хувьд, аймгийн төвд амьдарч байгаа иргэдийн ажил мэргэжил дээшлэх магадлал нийслэлийнхтэй ойролцоо байгаа бол хөдөө амьдарч буй иргэдийнх хамгийн бага, үүний дараа тосгонд амьдарч буй иргэдийнх мөн бага байна. Харин сумын төвд амьдарч буй иргэдийн ажил мэргэжлийн түвшин дээшлэх магадлал яг адил хүйсийн, адил боловсролтой, нэг үеийн хүмүүстэй харьцуулахад хамгийн их байжээ.

Дээрх панел [6] загварт авч үзсэн тайлбарлах хувьсагчдаас тухайн хүний боловсролын түвшний хувьсагч нь ажил мэргэжлийн түвшин дээшлэхэд хамгийн гол үүрэгтэй юм. Уг загвараас

боловсролын хувьсагчийг хасаж үнэлэхэд R² коэффициент нь 0.486-аас 0.346 болж огцом буурч байсан. Бусад хувьсагчдын хувьд энэ нөлөө харьцангуй бага байна.

Хөдөлмөр эрхлэлтийн үе доторх харьцангуй шилжилт

Одоо үе доторх хөдөлмөр эрхлэлтийн харьцангуй шилжилтийг авч үзье. Тодорхойлолт ёсоор, хөдөлмөр эрхлэлтийн үе доторх харьцангуй өгсөлт гэдэг нь нийт хүн ам доторх тухайн хүний хөдөлмөр эрхлэлтийн үзүүлэлт (цалинтай хөдөлмөр эрхлэх байдал, ажил мэргэжлийн түвшин гэх мэт)-ийн эрэмбэ буюу эзлэх байр 2010-аас 2020 оны хооронд урагшилсныг илэрхийлэх бол харьцангуй уруудалт нь уг эрэмбэ ухарсныг илэрхийлнэ. Иймээс тухайн хүний хөдөлмөр эрхлэлтийн үзүүлэлт дээшилсэн л бол түүний нийт хүн амд эзлэх байр нь урагшилна, хэвээр үлдэх магадлал маш бага. Хэрвээ хугацааны эхэнд тухайн хүний хөдөлмөр эрхлэлтийн үзүүлэлт өндөр бөгөөд хугацааны эцэст өндөр хэвээр байсан бол түүний хөдөлмөр


эрхлэлтийн харьцангуй эрэмбэ урд нь эрэмбэлэгдсэн хүмүүсийн шилжилтээс шалтгаалан эсвэл өөрчлөгдөхгүй, эсвэл урагшилна. Гэхдээ энэ тохиолдолд хэрвээ урд нь эрэмбэлэгдэж байгаад хөдөлмөр эрхлэлт нь муудсан хүмүүсээс ард нь эрэмбэлэгдэж байгаад хөдөлмөр эрхлэлт нь дээшилсэн хүмүүсийн тоо олон байвал тэр хүний эрэмбэ ухарч болно. Харин түүний хөдөлмөр эрхлэлтийн үзүүлэлт буурвал харьцангуй байр нь ухарна. Хэрвээ хугацааны эхэнд тухайн хүний хөдөлмөр эрхлэлтийн үзүүлэлт доогуур байсан бөгөөд хугацааны эцэст доогуур хэвээр байсан бол түүний хөдөлмөр эрхлэлтийн харьцангуй эрэмбэ урд нь эрэмбэлэгдсэн хүмүүсийн шилжилтээс шалтгаалан эсвэл өөрчлөгдөхгүй, эсвэл ухарна. Гэхдээ энэ тохиолдолд хэрвээ ард нь эрэмбэлэгдэж байгаад хөдөлмөр эрхлэлт нь сайжирсан хүмүүсээс урд нь эрэмбэлэгдэж байгаад хөдөлмөр эрхлэлт нь муудсан хүмүүс олон байвал тэр хүний эрэмбэ урагшилж болно.

Хөдөлмөр эрхлэлтийн үе доторх үнэмлэхүй шилжилтийг бид ажил эрхлэлтийн статус, салбар, ажил

мэргэжлийн түвшин зэрэг үзүүлэлтэд гарсан ахиц өөрчлөлтөөр хэмжиж байсан билээ. Эдгээр үзүүлэлт нь хоорондоо нэлээд хүчтэй хамааралтай, нас, хүйс, газар зүйн байршлаар гарах ялгааг ойролцоо харуулж байсан тул энэ удаад зөвхөн ажил мэргэжлийн түвшин (occupation)-ийг сонгон, хөдөлмөрийн зах зээл дээр гарсан харьцангуй шилжилтийг шинжиле. Ажил мэргэжлийн харьцангуй шилжилтийн хувьд өгсөлт нь уруудалтын урвуу болох бөгөөд харьцангуй эрэмбээ хэвээрээ хадгалсан тохиолдол маш цөөн байна. Иймээс тухайн ажиллагсдын бүлгийн ажил мэргэжил өгссөн ба уруудсан хувийн нийлбэр нь 100 хувь орчим болно.

Зураг 12-д 2010-2020 явагдсан ажил мэргэжлийн түвшний үе доторх харьцангуй өгсөлт ба уруудалтыг хүйсээр харьцуулав. Бүх насны бүлгийн хувьд эмэгтэйчүүдийн ажил мэргэжлийн түвшний харьцангуй өгсөх шилжилт үеийнхээ эрэгтэйчүүдээс 10 гаруй нэгж хувиар илүү (Зураг 12. А), үүнийг дагаад харьцангуй уруудалт нь яг тийм хувиар дутуу байна (Зураг 12. Б).

Зураг 12. Ажил мэргэжлийн түвшний харьцангуй шилжилт 2010-2020 онд, хүйсээр, кохорт бүлгээр





Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Ажил мэргэжлийн түвшин харьцангуй өгссөн хувь уруудсан хувиас нэлээд бага байгаа нь ажил мэргэжлийн түвшин өндөртэй хүний эзлэх хувь бага байдагтай холбоотой. Тухайлбал, 2010 онд нийт ажил эрхэлж байсан хүмүүсийн дөнгөж 18.5 хувь нь ажил мэргэжлийн түвшин өндөртэй байсан бол 2020 онд энэ үзүүлэлт өсөөд 28.0 хувь болжээ.

Одоо ажил мэргэжлийн түвшний харьцангуй шилжилт тухайн хүний төрсөн газраас болон амьдарч буй байршлаас хэрхэн хамаарч явагдсаныг авч үзье. Ажил мэргэжлийн түвшний үе доторх үнэмлэхүй өгсөх шилжилттэй төстэйгөөр (Зураг 9-ийг харна уу), 2010-2020 онд явагдсан ажил эрхлэлтийн үе доторх харьцангуй өгсөлт хөдөө

төрсөн хүмүүсийн хувьд хамгийн бага, Улаанбаатарт төрсөн хүмүүсийнх хувьд хамгийн их байна. Мөн нас залуу байх тусам ажил мэргэжлийн түвшин харьцангуй өгсөх магадлал нэмэгдэж байна (Зураг 13. А). Гэхдээ ажил мэргэжлийн түвшний үнэмлэхүй өгсөлтөөс ялгаатай нь хөдөөд төрсөн хүмүүсийн энэ магадлал Улаанбаатарт төрсөн хүмүүсийн магадлалаас маш бага, суманд төрсөн хүмүүсийн ажил мэргэжлийн харьцангуй өгсөх магадлал ч нэлээн доогуур байгаа юм. Энэ нь хөдөө болон суманд төрсөн хүмүүс ихэвчлэн мал маллах гэх мэт ур чадвар бага шаардсан, ажил мэргэжлийн түвшин багатай ажил эрхэлдэг, түүнийгээ ахиулж сольдоггүйг харуулж байна.

Зураг 13. Ажил мэргэжлийн түвшний харьцангуй өгсөлт 2010-2020 онд, байршлаар, кохорт бүлгээр



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Ажил мэргэжлийн түвшний харьцангуй өгссөн байдлыг хүмүүсийн 2010 он буюу хугацааны эхэнд тооллогод хамрагдсан байршлаар нь харьцуулж харвал дээрх төрсөн байршлаар харьцуулсантай төстэй байдал харагдаж байна (Зураг 13. Б). Гэхдээ энэ тохиолдолд хөдөөд, сумын төвд, аймгийн төвд амьдарч байсан

хүмүүсийн ажил мэргэжлийн түвшний харьцангуй өгсөлт төрсөн байршлаар тооцсон дүнгээс нэлээн доогуур гарч байна. Хөдөө орон нутагт төрсөн хүмүүс 2010 оноос өмнө том хот сууринд шилжсэн байгаад, 2010 оноос хойш ажил мэргэжлийн түвшнээ ахиулсан байх боломж нь 2010 онд хөдөө орон нутагт амьдарч байсан хүмүүсийнхтэй

харьцуулахад илүү байх магадлалтай юм. Гэхдээ хөдөөд эсвэл суманд төрсөн байх нь хожмын ажил мэргэжлийн түвшнээ ахиулах боломжийг ингэж хязгаарлаж буй нь анхаарал татаж байна.

4.3 Үе доторх хөрөнгийн шилжилт

Хүн ам хөрөнгийн хувьд 2010-2020 онд хэрхэн дээшилснийг хэмжихийн тулд бид тооллогод хамруулсан сууцны талаарх мэдээллийг ашиглан баялгийн буюу хөрөнгийн оноог 3-р бүлэгт танилцуулсан аргачлалын дагуу хүн нэг бүрээр, хугацааны эхэн ба эцэст тус бүрд нь тооцсон. Бүх хүнийг энэ оноогоор нь багаас их рүү жагсааж, 5 тэнцүү бүлэгт хуваасан. 2010 ба 2020 он тус бүрд хөрөнгийн оноо хамгийн багатай хүн амын 20 хувийг 1-р бүлэг (Q1), дараагийн арай өндөр оноотой 20 хувийг 2-р бүлэг (Q2) гэх мэтчилэн, хөрөнгийн оноо хамгийн өндөртэй хүн амын 20 хувийг 5-р бүлэг (Q5) гэж тэмдэглэв. 2010 онд тогтоосон хүмүүсийн хөрөнгийн энэ эрэмбэ 2020 онд хэрхэн өөрчлөгдсөнийг Хүснэгт 15-д харуулав. Хүснэгтийн мөрүүд нь

хүмүүсийн хөрөнгийн индексийн 2010 оны 5 бүлгийг илэрхийлэх бол хүснэгтийн баганууд нь хөрөнгийн индексийн 2020 оны 5 бүлгийг илэрхийлнэ. Жишээ нь хүснэгтийн хамгийн эхний мөр нь 2010 онд хөрөнгө хамгийн багатай байсан бүлгийн хүмүүсийн хэдэн хувь нь 2020 онд аль бүлэг рүү шилжсэнийг харуулна. Тухайлбал, 2010 онд хамгийн бага хөрөнгөтэй байсан бүлгийн 59.6 хувь нь (саарал нүд) 2020 онд ч хамгийн бага хөрөнгөтэй хэвээр үлдсэн бол 18.8 хувь нь хөрөнгийн эрэмбэ дээшилж 2-р бүлэгт, 13.4 хувь нь 3-р бүлэгт, 6.1 хувь нь 4-р бүлэгт тус тус шилжжээ. Мөн 2.1 хувь нь өнгөрсөн 10 жилийн хугацаанд хөрөнгө хамгийн багатай бүлгээс хамгийн ихтэй бүлэгт шилжсэн байна. Үүнтэй харьцуулахад, 2010 онд хөрөнгийн индексээр дундаж буюу 2-4-р бүлэгт байсан хүмүүс 2020 онд эрэмбэ нь дээшлэх, доошлох хөдөлгөөн их хийжээ. Өөрөөр хэлбэл, дунд бүлгүүдэд хамаарч байсан хүмүүс 10 жилийн дараа тухайн бүлэгтээ хамаарсан хэвээр байх тохиолдол 28.4 – 34.6 хувь (саарал нүднүүд) байна. Тэгвэл 2010 онд хөрөнгө хамгийн ихтэй байсан, хүснэгтийн хамгийн доод мөрний бүлгийн 66.5% нь 2020 онд ч хамгийн их хөрөнгөтэй хэвээр (саарал нүд) байжээ.

Хүснэгт 15. Хөрөнгийн индексийн шилжилт, 2010-2020 онд, тэнцүү 5 бүлгээр


		2020 оны хөрөнгийн индекс					Нийт
		Q1	Q2	Q3	Q4	Q5	
2010 оны хөрөнгийн индекс	Q1	59.6%	18.8%	13.4%	6.1%	2.1%	100%
	Q2	16.4%	34.6%	27.3%	16.2%	5.6%	100%
	Q3	15.9%	26.2%	28.4%	21.8%	7.8%	100%
	Q4	4.9%	19.6%	26.0%	31.4%	18.1%	100%
	Q5	1.3%	3.9%	4.4%	23.9%	66.4%	100%

Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Хэдийгээр хөрөнгө багатай бүлгүүд хооронд шилжилт их явагдсан боловч хамгийн их хөрөнгөтэй бүлэг рүү доод бүлгүүдээс шилжиж орох хүмүүсийн

тоо маш бага байна. Дээрх хүснэгтэд танилцуулсан шилжилтийг Зураг 14-т дүрслэн харуулав.

Зураг 14. Хөрөнгийн индексийн шилжилт, 2010-2020 онд, тэнцүү 5 бүлгээр



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо


Тэмдэглэл: Энд хөрөнгийн индексийн 1-р бүлэг Q1-ийг “ядуу”, 2-р бүлэг Q2-ыг “дунд-”, 3-р бүлэг Q3-ыг “дунд”, 4-р бүлэг Q4-ийг “дунд+” 5-р бүлэг Q5-ыг “баян” гэж тэмдэглэв.

Одоо хүмүүсийн хөрөнгийн шилжилтийг 5 тэнцүү бүлэгт хуваасан индексийн хөдөлгөөнөөр биш хүн тус бүрд оноосон эрэмбэ байр сүүлийн 10 жилд хэрхэн урагшилж, ухарснаар нарийвчилж авч үзье. Ингэхдээ уг шилжилтийг хүн амын нас, хүйс, боловсрол, төрсөн газар болон суурьшлаар харьцуулъя.

Зураг 15. А-д хүн амын хөрөнгийн эрэмбэ өгсөх шилжилтийг насны бүлэг тус бүрд хүйсээр харьцуулан харуулав. Насны хувьд, 1960-1985 онд төрсөн хүмүүсийн хөрөнгийн оноогоор эзлүүлсэн байр нь бусадтай

харьцуулахад урагшилсан хувь нас залуу болох тусам нэмэгдсэн бол 1985-1995 онд төрсөн хүмүүсийн хөрөнгийн оноогоор эзлүүлсэн байр урагшлах хувь нь нас залуу болох тусам буурах хандлагатай байна. Энэ нь дунд насны хүмүүсийн орлого тогтворжиж хөрөнгө нэмэгдэх нь хамгийн их байдаг бол дөнгөж ажил хийж эхэлж байгаа залуусын хувьд хөрөнгө нь нэмэгдэж амжаагүй амьдралын мөчлөгийг ерөнхийдөө бас илэрхийлж байна. Хүйсийн хувьд 2010-2020 онд эмэгтэйчүүдийн хөрөнгийн харьцангуй эрэмбэ үеийнхээ эрэгтэйчүүдийн эрэмбээс илүүтэй урагшилжээ. Гэхдээ хүйсээрх энэ зөрүү 1965 оноос өмнө төрсөн хүмүүсийн дунд их байснаа 1970-1974 онд төрсөн хүмүүсийн дунд бараг арилаад, 1980 оноос хойш төрсөн хүмүүсийн дунд эргээд өсжээ.

Зураг 15. Хөрөнгийн эрэмбийн өгсөх шилжилт 2010-2020 онд, нас, хүйс, боловсролоор



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Зураг 15. Б-д хүн амын хөрөнгийн эрэмбэ өгсөх шилжилтийг насны бүлэг тус бүрд боловсролын түвшнээр харьцуулан харуулав. Хөрөнгийн харьцангуй шилжилт боловсролын түвшнээс хамаарч ихээхэн ялгаатай явагдсан бөгөөд энэ ялгаа нь насны бүлгүүдээр ихээхэн өөр байна. Тухайлбал, 1965 оноос өмнө төрсөн дээд боловсролтой хүмүүсийн хөрөнгийн харьцангуй өгсөх шилжилт 2010-2020 оны хооронд бусад хүмүүсийнхээс харьцангуй бага явагджээ. Энэ нь дээд боловсролтой ахмад хүмүүсийн хөрөнгө ерөнхийдөө буурсан гэсэн үг биш, харин дунд ба залуу үеийн хүмүүс тэднээс илүү хөрөнгөтэй болж, хөрөнгийн эрэмбээрээ урдуур нь орох өөрчлөлт их явагдсантай голчлон холбоотой. Харин дунд, бага боловсролтой ахмадуудын хөрөнгийн эрэмбэ урагшилсан хувь дээд боловсролтой ахмадуудаас өндөр (ухарсан хувь бага) байгаа нь тэдний хөрөнгийн эрэмбэ анхнаасаа нэлээд хойгуур байсан бөгөөд тэдний урдуур эрэмбэтэй байсан хүмүүсийн хөрөнгө нэмэгдэх нь тэдний эзлэх байрыг ухраах нөлөө бага үзүүлсэнтэй холбоотой.


1970-1990 онд төрсөн хүмүүсийн хувьд дээрх байдал эсрэгээр ажиглагдаж байна. Энэ үеийн ид хөдөлмөрийн насны бага боловсролтой хүмүүсийн хөрөнгийн эрэмбэ урагшлах нь дунд, дээд боловсролтой хүмүүстэй харьцуулахад эрс доогуур байна. Ялангуяа энэ үеийн өндөр боловсролтой хүмүүсийн хөрөнгийн эрэмбийн харьцангуй өгсөлт нь нас залуу болох тусам илүү нэмэгджээ. Өөр нэг анзаарагдаж буй онцлог бол боловсролын түвшнээрх хөрөнгийн харьцангуй шилжилтийн энэ зөрүү хүйсээрх зөрүүнээс хавьгүй илүү байдаг ажээ.

Одоо хөрөнгийн энэхүү харьцангуй өгсөх шилжилтийг хүн амын төрсөн байршил болон сонирхож буй хугацааны эхэн үе болох 2010 оны байршлаар харьцуулж харъя. Зураг 16. А-д хөрөнгийн эрэмбийн харьцангуй өгсөлтийг хүмүүсийн төрсөн байршлаар зэрэгцүүлж харуулав. 1960 оноос өмнө нийслэлд төрсөн хүмүүсийн хөрөнгийн эрэмбэ бусад газар төрсөн хүмүүсийнхээс хамгийн бага урагшилсан бол түүнээс хойш хөдөөд төрсөн хүмүүсийн хувьд энэ үзүүлэлт

хамгийн бага байна. Аймгийн төв, сумын төвд төрсөн хүмүүсийн хувьд хөрөнгийн

эрэмбэ нь ихэнх насны бүлгээр хамгийн их өгсөх шилжилттэй байжээ.

Зураг 16. Хөрөнгийн эрэмбийн өгсөх шилжилт 2010-2020 онд, нас, байршлаар



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Зураг 16. Б-д хөрөнгийн эрэмбийн харьцангуй өгсөлтийг 2010 онд тооллого явагдах үеийн байршлаар харьцуулав. Энэ шилжилт ерөнхийдөө төрсөн байршлаар харуулсан шилжилттэй төстэй явагджээ. Тухайлбал, ихэнх

насны бүлгийн хувьд хөдөөд амьдарч байсан хүмүүсийн хөрөнгийн эрэмбийн өгсөлт үеийнхэнтэйгээ харьцуулахад хамгийн бага, сумын төвд амьдарч байсан хүмүүсийн хөрөнгийн эрэмбийн өгсөлт хамгийн их явагджээ.

5. 2010-2020 ОНД ЯВАГДСАН НИЙГМИЙН ҮЕ ХООРОНДЫН ШИЛЖИЛТ

Нийгмийн үе хоорондын шилжилтийг илэрхийлэх гол үзүүлэлт нь тухайн нийгэм дэх хувь хүмүүс буюу өрхүүдийн нийгмийн статус өмнөх үеэсээ буюу эцэг эхийнхээ үеэс хэр дээшилж чадсан хувь юм. Иймээс “босоо шилжилт” хэмээх энэ хөдөлгөөнийг хэмжихийн тулд тухайн хувь хүний нийгмийн статусыг илэрхийлсэн үзүүлэлтүүдээс гадна түүний эцэг эхийн нийгмийн статус ямар байсныг мэдэх шаардлагатай болно.

Үе хоорондын шилжилтийг шилжилтийн магадлалын матриц (transition matrix), үе хоорондын регрессийн коэффициент (intergenerational regression), үе хоорондын корреляц (intergenerational correlation) зэрэг үзүүлэлтээр хэмждэг. Шилжилтийн матриц гэдэг нь эцэг эх ба хүүхдийн боловсролын түвшин, эсвэл ажил мэргэжлийн түвшин зэргийн хооронд шилжих магадлалыг илэрхийлсэн хүснэгт юм. Жишээлбэл, мөрийн дагуу эцэг эхийн боловсролын түвшин, баганын дагуу хүүхдийн боловсролын түвшинд харгалзах давтамжийн хүснэгт бол боловсролын үе хоорондын шилжилтийн магадлалын матриц болно. Энэ хүснэгтийн мөрийн дагуух нийлбэр 1 байх ёстой.

Үе хоорондын шилжилтийн регрессийн коэффициент, үе хоорондын корреляцийн коэффициентууд нь эцэг эхийн ба хүүхдийн нийгмийн статусын тоон хэмжигдэхүүнээр илэрхийлэгдэх үзүүлэлтэд тохиромжтой. Жишээлбэл бид энэ судалгаанд боловсрол, ажил

мэргэжлийн түвшин, хөрөнгийн эрэмбэ зэрэг тоогоор илэрхийлэгдэх үзүүлэлт эцэг эх ба хүүхдийн хооронд хэр хүчтэй хамаарч байгаа, хүн амын бүлгээр хэр ялгаатай байгааг харьцуулав.

Гэхдээ бид энд 2010-2020 он буюу дөнгөж 10 жилийн хугацааг авч үзэж байгаа тул үе хоорондын шилжилтийг хангалттай хэмжиж харуулж чадахгүй юм. Учир нь хүүхэд залуусыг эцэг эхийнхээ ид насанд хүрч, насны хувьд харьцуулагдахуйц болсон үеийнх нь нийгмийн статусыг хэмжиж байж нийгмийн үе хоорондын шилжилтийг бүрэн дүүрэн гаргана. Хүний насны нэг үе буюу 20-25 жил, түүнээс урт хугацаа хамарсан панел тоон өгөгдлөөс л үүнийг хэмжих боломжтой. Эсвэл тухайн насанд хүрсэн хүнээс эцэг эх нь тэдний одоогийн насан дээр ямар байсныг асуусан судалгааны найдвартай тоон өгөгдөл хэрэгтэй. Харамсалтай нь манай улсад ийм тоон өгөгдөл хомс байна. Иймээс бид энд үе хоорондын нийгмийн шилжилтийг судлахдаа 2010 онд эцэг эхтэйгээ хамт амьдарч байсан хүмүүс 2020 онд нийгмийн статусын хувьд хэрхэн өөрчлөгдсөнийг авч үзлээ. 2010 оны тооллогын үед эцэг эхээсээ тусдаа амьдарч байгаа, эсвэл эцэг эх нь нас барсан хүмүүсийн хувьд эцэг эхийнх нь нийгмийн статусыг тодорхойлох хувьсагчдыг тооллогын мэдээллээс олж холбох боломжгүй.


Иймд үе хоорондын шилжилтийг тооллогын өгөгдлөөс судлах цорын ганц боломж нь энэхүү эцэг эхтэйгээ

амьдарч буй хүмүүсийн хязгаарлагдмал (truncated) түүврийн шинжилгээ юм. Гэхдээ энэхүү хязгаарлагдмал түүврийн гол сул тал бол эцэг эхтэйгээ амьдарч буй хүмүүс нь үеийнхээ бусад хүмүүсээс судалгаанд бүртгээгүй зарим шинж чанараар ялгаатай, тэр шинж чанарууд нь хувь хүний нийгмийн шилжилтэд нөлөө үзүүлдэг байх явдал юм. Өөрөөр хэлбэл, эцэг эхтэйгээ цуг ба тусдаа амьдарч буй хүмүүсийн дундах энэ ажиглагдахгүй шинж чанарын ялгааны

нөлөөг бид эцэг эхийн нийгмийн статусын ялгаанаас үүдсэн гэж буруу үнэлэх эрсдэлтэй. Иймээс энэ үл ажиглагдах ялгаа аль болох бага гарах түүврийг сонгох хэрэгтэй.

Эхлээд тухайн насны бүлгийн хүмүүсээс 2010 онд эцэг эхтэйгээ амьдарч байсан хүмүүсийн эзлэх хувийг авч үзье. Зураг 17-д харуулснаар, хүүхдийн нас ахихын хэрээр эцэг эхтэйгээ хамт амьдардаг хүүхдийн эзлэх хувь буурч байна.

Зураг 17. Эцэг эхтэйгээ хамт амьдарч байсан залуусын эзлэх хувь, 2010 онд



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Эндээс бид 2010 онд эцэг эхтэйгээ хамт амьдарч байсан хувь өндөртэй 11-20 настай хүүхэд залуусыг сонгон авч, 10 жилийн дараа 21-30 насандаа тэдгээр хүүхэд залуусын нийгмийн статус хэрхэн өөрчлөгдсөн, тэр нь тухайн хүүхдийн болон тэдний эцэг эхийн янз бүрийн бүлгээр хэр их ялгаатай байгааг хэмжсэн. 2010 онд 20-оос дээш насны хүмүүсийн 50-аас бага хувь нь эцэг эхтэйгээ хамт амьдардаг бөгөөд нас нэмэгдэх хэрээр энэ хувь огцом буурч байна. Иймд дээр дурдсан “түүвэр сонголтын

гажуудал” (sample selection bias)-ыг бага байлгахын тулд 2010 онд 11-20 настай хүүхдүүдийг сонгон авч хэмжихэд энэ түүврийн хувьд уг алдаа харьцангуй багатай байж болохыг Хүснэгт 16 дахь харьцуулалт илтгэж байна. Тодруулбал, 11-20 настайдаа эцэг эхтэйгээ амьдарч байсан хүүхдүүдийн зарим нь 10 жилийн дараа ч эцэг эхтэйгээ амьдарч байгаа бол зарим нь тусдаа гарсан. Гэхдээ энэ хоёр бүлгийн боловсролын түвшин олж авсан байдал хоорондоо ойролцоо байна.

Хүснэгт 16. 2010 онд эцэг эхтэйгээ амьдарч байсан, 11-20 настай байсан хүүхдүүдийн боловсролын түвшин (n=91,020)

2020 оны боловсролын түвшин	Нийт	2020 онд эцэг эхтэйгээ хамт амьдарч байгаа	2020 онд эцэг эхээсээ тусдаа амьдарч байгаа
Бага	3.8%	3.5%	4.1%
Дунд	57.9%	58.8%	56.6%
Дээд	38.3%	37.7%	39.3%
Бүгд	100.0%	100.0%	100.0%

Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Дараагийн хэсгүүдэд энэхүү сонгосон бүлэг буюу 2010 онд 11-20 настай байсан, эцэг эхтэйгээ хамт амьдарч байсан хүүхэд залуусын хувьд эцэг эхтэйгээ харьцуулахад боловсрол, ажил мэргэжлийн түвшин нь хэр урагшилсан (үнэмлэхүй), эсвэл эцэг эхийнхээ боловсрол, ажил мэргэжил, хөрөнгийн эрэмбэтэй харьцуулахад хүүхдийн эрэмбэ хэр урагшилсан (харьцангуй) талаарх дэлгэрэнгүй шинжилгээний үр дүнг танилцуулна.

5.1. Үе хоорондын боловсролын шилжилт

Энд эхлээд боловсролын үе хоорондын үнэмлэхүй шилжилтийг авч үзье. Үүнийг хэмжихдээ бид 2010 онд эцэг эхтэйгээ хамт амьдарч байсан 11-20 насны хүүхэд залуусын боловсролын түвшин эцэг эхийнхээ боловсролын түвшнээс илүү гарч чадсан эсэхээр хэмжсэн. Энд эцэг эхийн боловсролын түвшнийг эцгийн боловсрол, эхийн боловсролын аль өндөр үзүүлэлтээр төлөөлүүлэв. Мөн судалгааны арга зүйн хэсэгт дурдсанчлан, боловсролын өгсөх шилжилтийг тодорхойлохдоо “хүчтэй шалгуур” буюу хүүхдийн боловсролын түвшин эцэг эхийнхээсээ заавал давсан

байх шалгуур тавьсан. Энэ тохиолдолд бид боловсролыг бага, дунд, дээд гэсэн 3 түвшинд ангилж байгаа учраас дээд боловсролтой эцэг эхийн хүүхэд дээд боловсрол эзэмшсэн тохиолдолд боловсролын үе хоорондын өгсөлт явагдсан гэж үзэхгүй юм.

Юуны өмнө эцэг эх, хүүхдийн боловсролын түвшин хугацааны эхэн ба эцэст ямар харьцаатай болж өөрчлөгдсөнийг авч үзье. Хүснэгт 17-ын дээд хэсэгт 2010 онд эцэг эх ба хүүхдийн боловсролын түвшин ямар тархалттай байсныг эцэг эхийн боловсролын түвшин тус бүрээр суурилан харуулав. Тэр үед 11-20 насны хүүхдүүдийн дийлэнх нь бага, дунд боловсролтой байсан бөгөөд эцэг эхийн боловсролын түвшин бага байх тусам хүүхэд нь боловсролын түвшин багатай байх магадлал илүү байжээ. Хүснэгтийн доод (шилжилтийн матриц) хэсэгт 2020 онд эцэг эх, хүүхдийн боловсролын дээрх харьцаа хэрхэн өөрчлөгдсөнийг харуулах бөгөөд өнгөрсөн 10 жилийн хугацаанд өсвөр насны хүүхэд залуусын дийлэнх нь боловсролоо дээшлүүлсэн байна. Гэхдээ эцэг эхийн боловсролын түвшнээс хамаарсан ялгаа хадгалагдсаар байна.

Хүснэгт 17. Эцэг эх, хүүхдийн боловсролын түвшин, 2010 ба 2020 онд

		Хүүхдийн боловсрол 2010			
Эцэг эхийн боловсрол 2010		Бага	Дунд	Дээд	Нийт
	Бага	61.4%	38.3%	0.3%	100%
	Дунд	48.9%	50.6%	0.5%	100%
	Дээд	43.0%	55.9%	1.1%	100%


		Хүүхдийн боловсрол 2020			
Эцэг эхийн боловсрол 2010		Бага	Дунд	Дээд	Нийт
	Бага	14.2%	68.4%	17.4%	100%
	Дунд	3.6%	60.7%	35.7%	100%
	Дээд	1.0%	42.7%	56.3%	100%

Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Одоо боловсролын үе хоорондын өгсөлт ямар байдалтай байгааг тодруулж авч үзье. Дээр дурдсан шалгуурын дагуу хүүхдийн боловсролын түвшин эцэг эхийнхээ боловсролын түвшнээс давсан бол боловсролын үе хоорондын өгсөлт явагдсан гэж үзнэ.

Дээрх хэмжүүрээр хэмжсэн боловсролын үе хоорондын өгсөлт 31.9 хувь байна. Өөрөөр хэлбэл, 2020 оны байдлаар, 21-30 насны нийт залуусаас эцэг эхийнхээ боловсролын түвшнээс илүү боловсролтой хэсгийн эзлэх хувь энэ юм. Үүнийг хүйсээр харьцуулбал, боловсролын үе доторх өгсөлттэй адилаар, үе хоорондын өгсөлт эмэгтэйчүүдэд илүү хүчтэй явагдаж байна. Тухайлбал, Зураг 18-д харуулснаар, эрэгтэйчүүдийн боловсролын үе хоорондын өгсөлт 25.4 хувь байгаа бол эмэгтэйчүүдийнх 38.6 хувь байгаа юм.


Зураг 18. Боловсролын үе хоорондын өгсөлт, хүйсээр, хувь



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Боловсролын үе хоорондын өгсөлтийг тухайн хүний төрсөн байршлаар харьцуулбал, нийслэлд хамгийн бага, сумын төв хөдөөд хамгийн их байна (Зураг 19. А). Энэ нь судалгааны түүвэрт сонгогдсон хүүхэд залуусын эцэг эхчүүдийн боловсролын дундаж түвшин нийслэлд илүү өндөр, хөдөө орон нутагт бага байдгаас голчлон шалтгаална.

Зураг 19. Боловсролын үе хоорондын үнэмлэхүй өгсөлт, байршлаар, хувь



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Харин хамгийн сүүлийн тооллогод хамрагдсан байршлаар харьцуулахад тосгонд хамгийн бага, аймгийн төвд хамгийн их байна (Зураг 19. Б). 2020 оны байршлаарх боловсролын үе хоорондын өгсөлт төрсөн байршилтай харьцуулахад ингэж өөрчлөгдсөн нь түүвэрт хамрагдсан хүүхэд залуус олноороо хөдөө сумдаас аймгийн төв, нийслэл рүү боловсролын түвшнээ дээшлүүлэхээр шилжсэнтэй холбоотой юм.

Нийслэлд амьдарч буй хүүхэд залуусын боловсролын үе хоорондын өгсөлтийг байршлаар нь тодруулбал, 2010 онд гэр хороололд амьдарч байсан хүүхдүүдийнх 33.7 хувь, орон сууцанд амьдарч байсан хүүхдүүдийнх 21.8 хувь

байна. Эндээс, гэр хороололд амьдарч байгаа хүүхдүүд боловсролоо ахиулах боломжоор илүү хангагдсан гэж дүгнэж болохгүй, харин тэдний эцэг эхчүүд харьцангуй доогуур боловсролтой учраас хүүхдүүд нь эцэг эхийнхээ боловсролыг давахад илүү хялбар гэж үзэж болно. Хүснэгт 18-д харуулснаар, гэр хороолол амьдарч хүүхдүүдийн эцэг эхчүүд дийлэнх нь дунд боловсролтой бол орон сууцанд амьдарч буй хүүхдүүдийн эцэг эхчүүд дийлэнх нь дээд боловсролтой байна. Хүүхдийн боловсролын түвшнийг харьцуулахад гэр хороололд амьдардаг хүүхэд залуусын дээд боловсрол эзэмших байдал орон сууцанд амьдардаг үеийнхнээсээ ихээр хоцорсон байна.

Хүснэгт 18. Нийслэлд амьдарч буй эцэг эхчүүд, хүүхдийн боловсролын дундаж түвшин, байршлаар


		Орон сууц		Гэр хороолол	
Эцэг эхийн боловсролын түвшин 2010 онд	Бага	0.3%		1.8%	
	Дунд	34.7%		80.9%	
	Дээд	65.1%		17.3%	
	Нийт	100.0%		100.0%	
		Орон сууц		Гэр хороолол	
Хүүхдийн боловсролын түвшин 2020 онд	Бага	1.1%		1.6%	
	Дунд	38.1%		56.8%	
	Дээд	60.8%		41.7%	
	Нийт	100%		100%	

Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

2020 оны байдлаарх боловсролын үе хоорондын үнэмлэхүй өгсөлтийг аймгаар харьцуулбал, Баян-Өлгий, Ховд, Завхан гэх мэт баруун аймгуудад

хамгийн өндөр буюу 40 хувь орчим байгаа бол Сүхбаатар, Сэлэнгэ, Дорноговь, Баянхонгор аймагт хамгийн бага буюу 30 хувиас доогуур байна (Зураг 20).

Зураг 20. Боловсролын үе хоорондын үнэмлэхүй өгсөлт, аймаг нийслэлээр, хувь



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Одоо боловсролын үе хоорондын харьцангуй шилжилтийг хэмжсэн үр дүнг товч авч үзье. Улсын хэмжээнд боловсролын үе хоорондын үнэмлэхүй өгсөлт 31.9 хувь байсан бол харьцангуй өгсөлтийн дундаж 45.7 хувь байна. Өөрөөр хэлбэл, 2020 онд 21-30 насны залуус энэ үе доторх боловсролын түвшний эрэмбээрээ эцэг эхчүүдийнхээ боловсролын түвшний эрэмбээс урагшаа байр эзэлж байгаа хүүхдийн эзлэх

хувь 45.7 байна. Энэхүү харьцангуй өгсөлт үнэмлэхүй өгсөлтөөс өндөр байгаа нь үнэмлэхүй шилжилт өгсөө ч үгүй, уруудаа ч үгүй, эцэг эхтэйгээ адил боловсролтой байх тохиолдол их гардагтай холбоотой. Харин үе хоорондын харьцангуй шилжилтийг нэг бүрчлэн оноосон эрэмбээр хэмжиж буй үед эцэг эхтэйгээ яг адилхан эрэмбэтэй байх тохиолдол бараг гарахгүй.

Боловсролын үе хоорондын харьцангуй өгсөлтийг хүйсээр харьцуулбал ялгаа нь үнэмлэхүй өгсөлттэй төстэй байна. Тухайлбал, харьцангуй өгсөлт эмэгтэй хүүхдүүдийнх 53.2%, эрэгтэй хүүхдүүдийнх 38.3% байна. Харин төрсөн байршлаар харьцуулбал, энэ үзүүлэлт нийслэлд хамгийн их буюу 50.8%, хөдөөд хамгийн бага буюу 40.3% байна. Энэ нь нийслэлд төрсөн хүүхдүүд дээд боловсрол эзэмшиж буй хувь нь эцэг эхчүүдийнхээ дээд боловсрол эзэмшсэн хувиас илүү гарснаар, үеийнхэн доторх боловсролын эрэмбэ нь эцэг эхчүүдийнхээ эрэмбээс ч илүү урагшаа шилжиж байгааг харуулна. Аймаг нийслэлээр энэ шилжилтийг харьцуулбал үнэмлэхгүй шилжилтээс бага зэрэг ялгаатай үр дүн гарч байна. Аймгуудын хувьд үнэмлэхүй ба харьцангуй шилжилтийн хандлага ойролцоо байгаа боловч, үе хоорондын үнэмлэхүй шилжилтээр Улаанбаатарт амьдарч байгаа хүүхдүүд улсын дунджаас доогуур байсан бол харьцангуй шилжилтээр тэргүүлж байна (Хавсралт дахь Зураг 4-ийг үзнэ үү).

Гэхдээ нийслэлд амьдарч буй хүүхэд залуусын боловсролын үе хоорондын харьцангуй өгсөлт үнэмлэхүй өсөлтөөс ялгаатай явагджээ. 2010 онд гэр хороололд амьдарч байсан хүүхдүүдийн 61.7 хувийнх нь боловсролын эрэмбэ эцэг эхийнхээсээ урагшилсан бол орон сууцанд амьдарч байсан хүүхдүүдийнх 46.2 хувь байна. Үүний нэг шалтгаан нь Улаанбаатарын гэр хорооллын эцэг эхчүүд ихэвчлэн бага, дунд боловсролтой, хөдөө орон нутгаас нүүж ирсэн, боловсролын эрэмбээр эцэг эхчүүд дотроо хойгуур байр эзэлдэгтэй холбоотой байж болох

юм. Энэ тохиолдолд хүүхдүүд нь дунд, дээд боловсрол голчлон эзэмшсэнээр үеийнхэн дотроо, ялангуяа хөдөө орон нутагт амьдарч байгаа хүүхдүүдээс боловсролын эрэмбэ нь урагшаа байр эзлэх тул боловсролын үе хоорондын шилжилт орон сууцанд амьдарч байсан хүүхдүүдийнхээс илүү гарна.

Боловсролын үе хоорондын үнэмлэхүй өгсөлт 31.9%, харьцангуй өгсөлтийн дундаж 45.3% гэдэг нь хэр сайн үзүүлэлт вэ? Үүнийг хэмждэг өөр нэг үзүүлэлт үе хоорондын корреляц эсвэл үе хоорондын регрессийн коэффициент байдаг. Судалгааны өгөгдлөөс энэ үзүүлэлтийг тооцоход 0.62 гарсан. Энэ нь тухайн хүүхдийн боловсролын түвшин нь эцэг эхийнхээ боловсролын түвшнээс хамаарах нөлөө ихтэй (persistence) байгааг харуулж байна.

5.2 Үе хоорондын хөдөлмөр эрхлэлтийн шилжилт

Энэ хэсэгт бид хөдөлмөр эрхлэлтийн шилжилтийг ажил мэргэжлийн түвшний шилжилтээр төлөөлүүлж авч үзнэ. Тухайн хүний эрхэлж буй ажил мэргэжил (occupation) нь захирал, дарга, менежер, мэргэжилтэн, техникч, дэд мэргэжилтний түвшинд байвал дээд түвшин, түүнээс доош худалдаа, үйлчилгээ, ХАА, оператор, энгийн ажил мэргэжил, туслах ажилтан гэх мэт байвал доод түвшин гэж тодорхойлсон. Улмаар хүүхдийн ажил мэргэжлийн түвшин эцэг эхийнхээ ажил мэргэжлийн түвшнээс өндөр байгаа үед үе хоорондын өгсөх шилжилт явагдсан гэж тодорхойлов. Өөрөөр хэлбэл, доогуур түвшний

ажил мэргэжилтэй эцэг эхийн хүүхэд нь дээд түвшний ажил мэргэжилтэй бол үе хоорондын өгсөх шилжилт гэж үзнэ. Эсрэгээр, өндөр түвшний ажил мэргэжилтэй эцэг эхийн хүүхэд доогуур түвшний ажил эрхэлж байвал уруудалт гэж үзнэ. Харин эцэг эхтэйгээ адилхан ажил мэргэжлийн түвшинтэй бол өгсөлт эсвэл уруудалт явагдсан гэж үзэхгүй.


Гэхдээ энд 21-30 настай залуусын ажил мэргэжлийн түвшнийг 10 жилийн өмнөх эцэг эхийнх нь ажил мэргэжлийн түвшинтэй харьцуулж үе хоорондын шилжилтийг хэмжвэл өгсөх шилжилтийг бодит байдлаас нэлээд дутуу, уруудах шилжилтийг нэлээд хэтрүүлж үнэлэхийг анхаарах хэрэгтэй. Учир нь эдгээр залуус одоо ур чадвар, албан тушаалын шатлал өгсөөд удаагүй байгаа бол 10 жилийн өмнө тэдний эцэг эхчүүдийн ихэнх нь ажил мэргэжлийнхээ ид оргил үед хүрсэн байсан. 30 хүртэлх насанд ихэнх хүмүүс боловсролынхоо дээд түвшинд хүрдэг тул энэ түүврээс боловсролын үе хоорондын шилжилтийг хэмжихэд ийм асуудал бага байв. Ажил мэргэжлийн түвшний үе хоорондын шилжилтийг хэмжихэд тулгарах дээрх асуудлыг тойрох гол арга нь илүү урт

судалгааг хамарсан панел тоон өгөгдөл ашиглах явдал юм.

Хэдийгээр 2010-2020 оны тооллогоос бүрдүүлсэн 10 жилийн урттай панел өгөгдөл нь хөдөлмөр эрхлэлтийн үе хоорондын өгсөх шилжилтийг доогуур тооцох сул талтай боловч энэ үзүүлэлт хүн амын бүлгүүд хооронд ямар ялгаатай байгааг энэ өгөгдлөөс тооцож харьцуулалт, дүгнэлт хийх бүрэн боломжтой юм. Иймээс ажил мэргэжлийн түвшний үе хоорондын шилжилтийн магадлалыг тухайн хүний хүйс, төрсөн ба амьдарч буй байршил гэх мэт бүлгүүдээр харьцуулж авч үзье.

Нийт түүврийн хувьд ажил мэргэжлийн түвшин үе хооронд үнэмлэхүй өгссөн хувь 23.0 байна. Гэхдээ Зураг 21-ээс харахад хүйсээр болон төрсөн байршлаар энэ үзүүлэлт ихээхэн ялгаатай байна. Тодруулбал, 21-30 насны эмэгтэйчүүд (30.6%) үеийнхээ эрэгтэйчүүдтэй (17.0%) харьцуулахад, эцэг эхээсээ илүү өндөр түвшний ажил мэргэжилтэй байх магадлал маш их байдаг ажээ. Залуу эмэгтэйчүүд боловсролын хувьд үеийнхээ эрэгтэйчүүдээс давуу байдаг нь үүний нэг тайлбар болно.

Зураг 21. Ажил мэргэжлийн үе хоорондын өгсөлт, хүйсээр, төрсөн байршлаар




Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Төрсөн газрын хувьд сумын төв, хөдөөд төрсөн хүмүүсийн ажил мэргэжлийн үе хоорондын өгсөлт доогуур байдаг аж. Өөрөөр хэлбэл, хөдөө орон нутагт төрсөн нь тухайн хүн ажил мэргэжлээ дээшлүүлэх боломжийг (үе доторх өгсөлт) хязгаарлахаас гадна, хожим нь, эцэг эхийнхээ эрхэлж байснаас илүү сайн ажил олж хийх (үе хоорондох өгсөлт) боломжийг хязгаарладаг нэг гол хүчин зүйл болдог ажээ.

Ажил мэргэжлийн үе хоорондын өгсөлтийг тухайн хүний одоогийн байршлаар харьцуулахад ч нэлээд ялгаа харагдаж байна (Зураг 22). Ерөнхийдөө нийслэлээс алслагдах тусам ажил мэргэжлийн хувьд эцэг эхээсээ өндөр түвшний ажил эрхлэх магадлал буурч байна. Хөдөө орон нутагт хөдөлмөрийн зах зээл бага, ажил мэргэжлээ ахиулах боломж хязгаарлагдмал байдаг нь үүнд нөлөөлсөн.

Зураг 22. Ажил мэргэжлийн үе хоорондын өгсөлт, одоогийн байршлаар



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Гэхдээ Улаанбаатарын гэр хороололд амьдардаг залуус эцэг эхээсээ илүү өндөр түвшний ажил эрхэлдэг байх магадлал нь орон сууцанд амьдардаг залуусынхаас өндөр байдаг ажээ. Энэ нь боловсролын үе хоорондын өгсөлт Улаанбаатарын гэр хороололд амьдардаг залууст их явагдсаны нэг гол илрэл байх талтай.

5.3. Үе хоорондын хөрөнгийн шилжилт

Хөрөнгийн үе хоорондын шилжилтийг хэмжих ерөнхий зарчим нь өмнөх хэсгүүдэд хэлэлцсэн боловсролын түвшин ба ажил мэргэжлийн түвшний үе хоорондын шилжилтийг хэмжихтэй

адил. Гэхдээ энэ судалгаанд бидний сонгож авсан түүвэр болох 2010 онд эцэг эхтэйгээ амьдардаг байсан, 2020 онд 21-30 настай залуусын өгөгдлөөс хөрөнгийн үе хоорондын шилжилтийг хэмжихэд анхаарах гол зүйл бол ажил мэргэжлийн үе хоорондын шилжилт хэмжихэд тулгарсантай адил, харьцуулалт хийх эцэг эх ба хүүхдийн амьдралын үе шатыг (life cycle) харьцуулагдахуйц сонгох боломжгүй байгаа явдал юм. Өөрөөр хэлбэл, бид зөвхөн 10 жилийн урттай панел өгөгдөл ашиглаж байгаа учраас хөрөнгө хуримтлуулж амжаагүй, 30 хүртэлх насны залуусын хөрөнгийг 10 жилийн өмнө 35-60 орчим настай байсан эцэг эхийнх нь хөрөнгөтэй харьцуулж, хөрөнгийн үе хоорондын шилжилтийг

тодорхойлох шаардлагатай болно. Иймээс судалгаанд ашиглаж буй өгөгдлөөс хөрөнгийн үе хоорондын өгсөх шилжилтийг тооцвол бодит байдлаас ихээхэн доогуур үзүүлэлт гарах сул талтайг анхаарах нь зүйтэй. Гэхдээ хөрөнгийн үе хоорондын энэ шилжилт хүн амын бүлгүүд дунд хэр ялгаатай байгаа нь багагүй сонирхолтой байгаа юм.


Үе хоорондын шилжилтийг судлахад бидний ашиглаж буй түүврээс хөрөнгийн үе хоорондын шилжилтийг хэмжихэд анхаарах бас нэг зүйл бий. 2010 онд эцэг эхтэйгээ амьдарч байсан, 11-20 настай байсан хүүхэд залуусын 60.3 хувь нь 10 жилийн дараа ч эцэг эхтэйгээ амьдарсаар байгаа. Эцэг эхтэйгээ амьдарч байгаа хүүхдийн хөрөнгийн оноо, индексийг эцэг эхийнх нь оноо, индекстэй адил тооцно. Иймээс бид энд хөрөнгийн үе хоорондын шилжилтийг хэмжихдээ эцэг эхээсээ тусдаа, өрх тусгаарлан өрхийн тэргүүн, эхнэр нөхөр болон амьдарч байгаа хүүхдүүдийн түүврийг ашиглаж болно. Эцэг эхтэйгээ хамт амьдарч байгаа хүүхдүүдийг хамруулбал хөрөнгийн үе хооронд өгсөх, уруудах шилжилтийн хувиуд өөр байна. Гэхдээ хөрөнгийн үе хоорондын үнэмлэхүй шилжилтийг биш харьцангуй шилжилтийг хэмжих үед эцэг эхтэйгээ

хамт амьдрахаас шалтгаалах зөрүү маш бага байдаг. Бүрдүүлсэн панел өгөгдлөөс хөрөнгийн оноо буюу индекс тооцоход ашигласан хувьсагч цөөн байсан тул бид хөрөнгийн шилжилтийг абсолют оноонд биш, уг оноонд суурилсан эрэмбэ (rank) ашиглан хэмжих буюу зөвхөн харьцангуй шилжилт тооцох нь зүйтэй гэдгийг дээр тайлбарласан билээ.

Хэмжилтийн үр дүнд, хөрөнгийн үе хоорондын өгсөх шилжилт 45.1% гарч байна. Энэ нь хүүхдүүдийн 45.1 хувь нь хөрөнгийн эрэмбээрээ эцэг эхчүүдийнхээ 10 жилийн өмнөх эрэмбээс урагшилж чадсан, үлдэх 54.9 хувь нь эцэг эхийнхээ эрэмбээс доогуур эрэмбэтэй байна (Зураг 23).

Хөрөнгийн үе хоорондын харьцангуй шилжилтийг хүйсээр харьцуулбал, 21-30 насны эмэгтэйчүүд (46.9%) үеийнхээ эрэгтэйчүүдтэй (43.4%) харьцуулахад илүү байна. Өөрөөр хэлбэл, нийт залуусын дунд тухайнхүүхдийн хөрөнгөөр эрэмбэлэгдсэн байр нь тэдний нийт эхчүүдийн дунд тухайн эцэг эхийнх нь хөрөнгөөр эрэмбэлэгдсэн байраас урагшлах магадлал эмэгтэйчүүдэд илүү ажээ. Энэ нь эдгээр эмэгтэйчүүд үеийнхээ эрэгтэйчүүдээс боловсрол, ажил мэргэжлийн түвшин ерөнхийдөө илүү байдагтай ямар нэг хэмжээгээр холбоотой.

Зураг 23. Хөрөнгийн үе хоорондын харьцангуй өгсөлт, хүйсээр, төрсөн байршлаар




Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Төрсөн газраар харьцуулбал, аймгийн төв, сумын төвд төрсөн хүмүүсийн хөрөнгийн үе хоорондын харьцангуй өгсөлт өндөр байдаг бол Улаанбаатар, тосгон, хөдөөд төрсөн хүмүүсийнх бага байна.

Хөрөнгийн үе хоорондын өгсөлтийг одоогийнх нь байршлаар харьцуулбал, ерөнхийдөө нийслэлээс алслагдах тусам хөрөнгийн үе хоорондын харьцангуй шилжилт буурч байна (Зураг 24). Энэ нь хөдөө орон нутагт хөдөлмөр эрхлэлтийн өгсөх шилжилт хийх боломж бага байхаас гадна хөрөнгийн оноо сайжрахад нөлөөлөх гол зүйл болох төвлөрсөн шугамд холбогдсон

орон сууцны хүртээмж бага байдагтай холбоотой байж болох юм. Улаанбаатар дахь хөрөнгийн үе хоорондын харьцангуй шилжилтийг тодруулбал, гэр хороололд амьдардаг залуус хөрөнгийнхөө эрэмбээр эцэг эхээсээ илүү эрэмбэтэй байх магадлал нь орон сууцанд амьдардаг залуусынхаас маш доогуур байна. Үүний гол шалтгаан нь уг үзүүлэлтийг тооцох суурь нь сууцны нөхцөл байгаа явдал юм. Одоо орон сууцанд амьдарч байгаа нь одоо гэр хороололд амьдарч байгаатай харьцуулбал сууцны нөхцөл 10 жилийн өмнөхөөс сайжрах магадлалаар илүү гэдгийг илтгэнэ.

Зураг 24. Хөрөнгийн үе хоорондын харьцангуй өгсөлт, одоогийн байршлаар



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Дээрх үзүүлэлтийг аймгуудаар харьцуулбал, Завхан (61.6%), Говь-Алтай (58.9%), Хөвсгөл (53.1%) аймгуудад хамгийн өндөр, Баян-Өлгий

(27.6%), Баянхонгор (34.6%), Дорнод (37.5%) аймгуудад хамгийн бага байна (Хавсралт дахь Зураг 6-г үзнэ үү).

6. ШИЛЖИН ИРЭГСДИЙН ДУНД ЯВАГДСАН НИЙГМИЙН ШИЛЖИЛТ

Энэ судалгаанд авч үзэх нэг чухал асуудал нь 2010-2020 онд өөр газраас шилжин суурьшсан хүн амын дунд нийгмийн шилжилт бусад хүн амтай харьцуулахад хэр явагдсаныг тодруулах явдал юм. 2010 оны ХАОСТ-ын тайланд дурдсанаар, нийт хүн амын 41.5 хувь нь тухайн тоологдсон газраасаа өөр газар төрсөн буюу төрснөөсөө хойш нүүн шилжиж ирсэн бол 13.7 хувь нь сүүлийн 5 жилд өөр газраас нүүж ирсэн, 4.3 хувь нь сүүлийн 1 жилд өөр газраас нүүж ирсэн хүмүүс байжээ (ҮСХ, 2011). Харин 2020 оны ХАОСТ-ын тайлангаас үзэхэд, төрснөөсөө хойш нүүж ирсэн хүн амын эзлэх хувь 23.4, сүүлийн 5 жилд өөр газраас нүүж ирсэн хүн амын эзлэх хувь 5.5, сүүлийн 1 жилд өөр газраас нүүж ирсэн хүн амын эзлэх хувь

2.8 болж, 2010 оныхтой харьцуулахад эрс буурчээ. 2010 оноос хойш томоохон ган, зуд тохиолдоогүй, аймаг, нийслэл хоорондоо хатуу хучилттай засмал замаар холбогдсон, Нийслэлийн Засаг даргын захирамжаар 2017-2020 онд Улаанбаатар хотод байнга оршин суухаар ирэх иргэдийн шилжилт хөдөлгөөнийг хязгаарласан зэрэг нь хөдөөнөөс хот руу шилжих хөдөлгөөний урсгалыг багасгасан байж болох юм (ҮСХ, 2020).

Тооллогын мэдээллээс үүсгэсэн панел өгөгдлөөс шилжин ирэгсдийг ирсэн байршлаар нь харьцуулбал, дийлэнх нь хөдөө орон нутгаас нийслэлд шилжин ирэгсэд эзэлдэг байна (Хүснэгт 19). Гэхдээ энэ үзүүлэлт 2020 онд 2010 онтой харьцуулахад эрс буурчээ.

Хүснэгт 19. Сүүлийн 5 жилд өөр газраас нүүж ирсэн хүн ам (628,066 хүний түүврээс тооцсон)

	2010 онд		2020 онд	
	Тоо	Хувь	Тоо	Хувь
Орон нутгаас нийслэлд	39,122	65.5%	10,863	53.9%
Орон нутгаас орон нутагт	13,366	22.4%	5,283	26.2%
Нийслэлээс орон нутагт	5,924	9.9%	3,906	19.3%
Гадаадаас Монголд	1,316	2.2%	103	0.5%
Нийт	59,728	100%	20,155	100%

Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Бид энэ хэсэгт 2010 онд тооллогод хамрагдсан, гэхдээ сүүлийн 5 жилд өөр газраас (гадаад болон дотоод) буюу 2005 оны 1-р сард тоологдсон газраасаа өөр газар амьдарч байсан хүн амын бүлгийг “шилжин ирэгсэд” гэж онцолж

авч үзэн, тэдний дунд 2010-аас 2020 хүн хүртэлх хугацаанд явагдсан нийгмийн шилжилтийг судлах юм. Өөрөөр хэлбэл, тухайн газарт гадаад, дотоодоос шилжин ирээд удаагүй буюу 5 хүртэлх жил болсон иргэдийн хувьд боловсрол,

хөдөлмөр эрхлэлт, сууцны нөхцөл гэх мэт нийгмийн үзүүлэлт нь 2010-аас 2020 онд бусадтай харьцуулахад хэр ахиж дэвшсэнийг тодруулна. Ингэхдээ, өмнөх бүлгүүдэд авч үзсэний адилаар, шилжин ирэгсдийн үе доторх шилжилтийг бусад хүмүүстэй болон өөр хооронд нь (шилжин ирсэн газар, нас, хүйс гэх мэт) харьцуулна. Харин үе хоорондын шилжилтийг авч үзэхгүй. Учир нь үе хоорондын шинжилгээ хийхээр ялгаж авсан, 2010 онд 11-20 настайдаа эцэг эхтэйгээ амьдарч байсан хүүхэд залуусын дотор шилжин ирсэн хүүхдийн тоо цөөн байсан. Мөн тэдний нас бага учраас шилжин ирсэн газрын ялгаа нь төрсөн газрын ялгаагаар үндсэндээ тайлбарлагдах бөгөөд өмнөх бүлгүүдэд бид үе хоорондын шилжилт тухайн хүний төрсөн газраас хамаарч ямар ялгаатай байсныг хангалттай харуулсан билээ.

Хүмүүс өөрийн болон хүүхдийнхээ боловсролыг дээшлүүлэх, сайн ажил олж хийх, амьжиргаагаа дээшлүүлэх гэх мэт олон янзын шалтгаанаар нүүн шилждэг. Гэвч нүүн ирсэн газраа дасан зохицож, боломжуудыг ашиглахад бэрхшээл тулгардаг байж болох юм. Үүнийг тодруулах зорилгоор бид 2010-аас 2020 онд хүн амын дунд явагдсан нийгмийн өгсөх, уруудах хөдөлгөөнүүд өөр газраас шилжин ирсэн иргэдийн хувьд хэр ялгаатай явагдсан талаарх харьцуулсан шинжилгээг хүн амын нас, хүйс гэх мэт бүлгээр хийлээ. Үүний тулд эхлээд нийт хүн амыг шилжин суурьшсан байдлаар нь “огт шилжиж байгаагүй”, “2005 оноос өмнө шилжиж ирсэн, түүнээс хойш шилжээгүй” буюу

2010 онд шилжиж ирээд 5-аас дээш жил болсон, “2005-2010 онд шилжиж ирсэн, түүнээс хойш шилжээгүй” буюу тухайн газарт 2010 онд шилжиж ирээд удаагүй (сүүлийн 5 жилийн дотор шилжиж ирсэн), “2010-2020 онд шилжсэн” гэсэн 4 бүлэгт хуваасан. Шилжиж ирээд 5 жил болсон хугацааг зааг болгож сонгосон шалтгаан нь тооллогод 5 жилийн өмнө хаана амьдарч байсныг асуусантай холбоотой. 2010-2020 онд шилжиж явсан хүмүүсийг тусад нь бүлэг болгосноор тухайн нутгийн уугуул болон шилжиж ирээд удсан, удаагүй хүмүүсийн нийгмийн байдал дараагийн 10 жилд хэрхэн өөрчлөгдсөнийг илүү нарийвчилж харьцуулах боломжтой болно.


Үүний дараа бид 2005-2010 онд тухайн газар шилжин ирсэн, түүнээс хойш шилжээгүй хүмүүсийг дотор нь шилжин ирсэн газраас нь хамааруулж “аймгаас нийслэлд”, “аймгууд хооронд”, “нийслэлээс аймагт”, “гадаадаас Монголд” гэж 4 бүлэгт хуваан нийгмийн шилжилтийг нь харьцуулав. Гадаадаас шилжин ирэгсдийн дийлэнх нь том хотуудад ирж суурьшдаг. Жишээлбэл, 2005-2010 онд гадаадаас шилжин ирэгсдийн 88.5% нь Улаанбаатар, 3.6% нь Эрдэнэт, 3.1% нь Дарханд суурьшжээ. Тооллогод Монголоос гадаад явсан иргэдийг хамруулаагүй, тэдний боловсрол, хөдөлмөр эрхлэлт гэх мэт нийгмийн үзүүлэлтүүдийн талаарх асуулт байхгүй тул тэднийг энэ харьцуулалтад хамруулах боломжгүй юм.

6.1. Шилжин ирэгсдийн боловсролын үе доторх шилжилт

Эхлээд шилжин ирэгсдийн боловсролын өгсөх шилжилтийг авч үзье. Ерөнхийдөө шилжилт хөдөлгөөний нэг гол шалтгаан нь боловсролоо дээшлүүлэх явдал байдаг учраас шилжсэн хүмүүсийн боловсрол шилжээгүй хүмүүсийнхээс илүү ахих магадлалтай юм. Тэр дундаа залуу шилжин ирэгсдийн боловсролын түвшин дээшлэх хандлага их байдаг. Манай улсад 2010 оноос 2020 оны хооронд боловсролын өгсөх шилжилт шилжин ирсэн хүмүүсийн дунд хэрхэн явагдсаныг Зураг 25-д харуулав. Зураг 25-ын А хэсгээс, шилжилт хөдөлгөөнд оролцоод удаагүй байсан болон дээрх хугацаанд шилжих хөдөлгөөнд оролцсон, залуу үеийнхний боловсролын түвшин илүү дээшилснийг харж болно. Тухайлбал, 1980-1984 онд төрсөн, шилжигч болон шилжигч бус хүмүүсийн 2010-2020 онд боловсрол дээшилсэн хувь ойролцоо, 10.1-12.7% байсан бол 1985-1989 онд төрсөн хүмүүсийн дунд шилжиж ирээд удсан хүмүүсийн боловсролын өгсөлт

19.3%, огт шилжээгүй хүмүүсийнх 22.0%, 2005-2010 онд шилжсэн хүмүүсийнх 28.1%, 2010 оноос хойш шилжсэн хүмүүсийнх 31.1% байна. Тэгвэл 1990-1994 онд төрсөн залуусын дунд огт шилжээгүй хүмүүсийн боловсролын өгсөлт 49.3%, шилжиж ирээд удсан хүмүүсийнх 54.7%, 2005-2010 онд шилжсэн хүмүүсийнх 62.8%, 2010 оноос хойш шилжсэн хүмүүсийнх 60.6% байна. Сүүлийн 5 жилийн дотор шилжин ирээд цаашид шилжээгүй болон өмнө нь шилжсэн эсэхээс үл хамааран цаашид шилжин суурьшсан хүмүүсийн боловсролын өгсөх шилжилт ойролцоо байна. Тухайн газраа байнга байсан болон шилжиж ирээд удсан хүмүүсийн хооронд мөн боловсролын өгсөх шилжилт ойролцоо явагджээ. Мөн зургаас харахад, 1975-1984 онд төрсөн хүмүүсийн боловсролын өгсөх шилжилт бага явагдсан боловч огт шилжээгүй хүмүүсийн боловсролын өгсөлт нь шилжин ирсэн хүмүүсийнхээс бага зэрэг илүү байна. Эндээс энэ үеийнхний ихэнх хүмүүсийн нүүн шилжсэн зорилго нь өөрсдийнхөө боловсролыг дээшлүүлэхтэй төдийлөн холбоогүй гэж дүгнэж болох юм.

Зураг 25. Шилжин ирэгсдийн боловсролын үе доторх үнэмлэхүй өгсөлт, 2010-2020 он



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо


Зураг 25-ын Б хэсэгт 2005-2010 онд шилжсэн хүмүүс дараагийн арван жилд боловсролоо хэрхэн дээшлүүлснийг шилжин ирсэн газраар нь харьцуулав. Ерөнхийдөө залуусын дунд боловсролын өгсөлт илүү явагдсан боловч хаанаас шилжин ирснээс хамаарсан ялгаа тодорхой бөгөөд нэлээд хэлбэлзэлтэй ажиглагдаж байна. Жишээлбэл, нийслэлээс аймагт шилжигсдийн дунд боловсролын өгсөлт бусдаас бага явагдсан бол гадаадаас ирсэн болон аймгаас нийслэл рүү шилжигсдийн дунд бусдаас илүү явагджээ. Мөн 1985 оноос хойш төрсөн, аймгууд хооронд шилжсэн залуус боловсролоо дээшлүүлэх хандлага доогуур байна.

1970-1974 оны үеийнхэн дундаас боловсролоо дээшлүүлсэн хувь нь гадаадаас шилжин ирэгсдийнх 15.0% байгаа бол аймгуудаас нийслэлд ирэгсдийнх 9.4%, аймгууд хооронд шилжигсдийнх 5.4%, нийслэлээс аймагт шилжигсдийнх 4.0% байгаа нь сонирхол татаж байна. Энэ үеийнхнээс 20-30 насандаа гадаадад гарч ажиллаж амьдарч байгаад Монголд буцаж ирсэн хүмүүсийн нэлээд нь хожуу ч гэсэн боловсролоо дээшлүүлэхэд анхаарал хандуулжээ. 1985-1989 онд төрсөн, аймгаас нийслэл рүү шилжсэн хүмүүсийн боловсролын өгсөлт 31.6%, гадаадаас дотогш шилжигсдийнх 22.2%, аймаг хооронд шилжигсдийнх 15.8%, нийслэлээс аймаг руу шилжигсдийнх 12.1% байна. Тэгвэл 1990-1994 онд төрсөн, гадаадаас ирэгсдийн боловсролын түвшин дээшилсэн

хувь 76.5%, аймгаас нийслэл рүү шилжигсдийнх 66.1%, аймаг хооронд шилжигсдийнх 40.6%, нийслэлээс аймаг руу шилжигсдийнх 37.4% байна. Дээрх боловсролоо дээшлүүлсэн хүн амын дийлэнх нь 2010 онд дунд боловсролтой байснаа 2020 онд дээд боловсролтой болсон хүмүүс юм. Боловсролоо дээшлүүлсэн дээрх хүмүүсийн хувь аймгаас нийслэлд шилжигсэд болон гадаадаас Монголд шилжин ирэгсдийн (тэдний 88% нь Улаанбаатарт ирдэг) дунд өндөр байдаг нь Монголын дээд боловсрол олгох их дээд сургуулиуд нийслэлд төвлөрсөн байдагтай зарим талаар холбоотой.

Шилжин ирэгсдийн боловсролын өгсөх шилжилтийг хүйсээр харьцуулсныг Зураг 26-д харуулав. 1970-1984 онд төрсөн, шилжин ирсэн эрэгтэй, эмэгтэй хүмүүсийн хувьд 2010-2020 онд боловсролын өгсөлт нь нэлээд ойролцоо, шилжээгүй эрэгтэйчүүдтэй харьцуулахад бага зэрэг доогуур явагджээ. 1985-1989 онд төрсөн эрэгтэй, эмэгтэй шилжин ирэгсдийн боловсролын өгсөлт хоорондоо ойролцоо бөгөөд шилжин ирээгүй хүмүүсийнхээс 7 пунктаар илүү байна. Харин 1990-1994 онд төрсөн эрэгтэй шилжин ирэгсдийн боловсролын өгсөлт 54.8%-д хүрч, шилжээгүй эрэгтэйчүүдээсээ 11 пунктаар илүү явагдсан боловч, эмэгтэй шилжин ирэгсдээсээ 15 пунктаар, шилжээгүй эмэгтэйчүүдээс 3 пунктаар тус тус хоцорчээ.

Зураг 26. Шилжин ирэгсдийн боловсролын үе доторх үнэмлэхүй өгсөлт, 2010-2020 он, хүйсээр



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо


6.2. Шилжин ирэгсдийн хөдөлмөр эрхлэлтийн үе доторх шилжилт

Хүмүүс өөр нутагт шилжин суурьших нэг гол зорилго нь хөдөлмөр эрхлэлтийн нөхцөл байдлаа сайжруулах явдал байдаг. Хөдөө орон нутгийг бодвол хот суурин газар нь ажлын байр ихтэй, хөдөлмөрийн зах зээл томтой байдаг учраас ур чадвараа ахиулах, цалин орлогоо нэмэгдүүлэх боломж ихтэй байж болох юм. Тэгвэл шилжин суурьшсан монголчуудын хувьд хөдөлмөр эрхлэлтийн өөрчлөлт хэрхэн явагдсаныг шилжин суурьшсан байдлаар харьцуулж авч үзье.

Эхлээд ажил мэргэжлийн түвшний өгсөлт хэрхэн явагдсаныг тодруулъя. Зураг 27-ын А хэсэгт харуулснаар,

ерөнхийдөө шилжин ирсэн хүмүүсийн хувьд ажил мэргэжлийн түвшний өгсөлт илүү байна. Нас залуу байх тусам энэ магадлал нь харьцангуй сүүлд шилжиж ирсэн хүмүүсийн хувьд эрс нэмэгдэж байна. Жишээлбэл, 1985 оноос өмнө төрсөн, шилжиж ирээд 5-аас дээш жил болсон ба 5 жил хүрээгүй хүмүүсийн ажил мэргэжлийн түвшний өгсөлт бараг адилхан, огт шилжээгүй хүмүүсийн өгсөлтөөс 1-3 пунктаар өндөр байсан. Харин 1985-1989 онд төрсөн, шилжиж ирээд 5 жил болоогүй хүмүүсийн ажил мэргэжлийн түвшний өгсөлт (27%) шилжиж ирээд 5-аас дээш жил болсон хүмүүсийн өгсөлт (20%)-өөс 7 пунктаар, огт шилжээгүй хүмүүсийнхээс 9 пунктаар илүү байна. 1990-1994 онд төрсөн хүмүүсийн хувьд дээрх зөрүү харгалзан 7 пункт, 11 пункт байна.

Зураг 27. Шилжин ирэгсдийн ажил мэргэжлийн түвшний үе доторх үнэмлэхүй өгсөлт, 2010-2020 онд, %



Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Ажил мэргэжлийн түвшний өгсөлт хамгийн хүчтэй явагдсан, шилжиж ирээд удаагүй буюу сүүлийн 5 жилд шилжиж ирсэн хүмүүсийг Зураг 27-ын Б хэсэгт шилжин ирэгсдийн бүлгээр харьцуулан харуулав. Эндээс үзэхэд, 1985 оноос өмнө төрсөн хүмүүсийн хувьд, гадаадаас Монголд шилжин ирэгсдийн ажил мэргэжлийн түвшин 2010-2020 онд бусад шилжигсдээс илүү дээшилжээ. Харин 1985 оноос хойш төрсөн хүмүүсийн хувьд аймгуудаас нийслэлд шилжигсдийн ажил мэргэжлийн түвшин хамгийн муу ахижээ.

Ажил мэргэжлийн түвшний өгсөлт шилжин ирэгсдийн хүйсээр хэр ялгаатай явагдсаныг Зураг 27-ын В хэсэгт харуулав. Ерөнхийдөө аль ч хүйсийн шилжсэн хүмүүсийн ажил мэргэжлийн түвшин адил хүйсийн шилжээгүй хүмүүсийнхээс илүү дээшилсэн байна. Боловсролын өгсөлтийг дагаад ажил мэргэжлийн түвшний өгсөлт эмэгтэйчүүдийн хувьд ерөнхийдөө илүү сайн явагджээ. Гэхдээ 1985 оноос хойш төрсөн, шилжиж ирсэн эрэгтэйчүүдийн ажил мэргэжлийн түвшний өгсөлт шилжээгүй эмэгтэйчүүдийнхээс 3 пунктаар илүү явагдсан байна.

7. ДҮГНЭЛТ, ЗӨВЛӨМЖ

Энэ судалгаанд бид 2010-аас 2020 оны хооронд хүн амын дунд нийгмийн шилжилт хэрхэн явагдсаныг тэдний боловсролын түвшин, хөдөлмөр эрхлэлт орон сууцны нөхцөл байдлын өрчлөлтөөр тодруулж харахыг зорилоо. Ингэхдээ нийгмийн ухаанд ашигладаг үе доторх ба үе хоорондын шилжилт, үнэмлэхүй ба харьцангуй шилжилт гэсэн тодорхойлолтуудад үндэслэн нийгмийн шилжилтийг хэмжлээ.

Судалгаанд ашигласан тоон өгөгдөл нь 2010 ба 2020 оны Хүн ам, орон сууцны тооллогын судалгаанд хоёуланд хамрагдсан нийт хүн амын 30 хувийн мэдээллийг агуулсан панел өгөгдөл юм. Энэ түүвэр нь хүн амын бүлгүүдийг хангалттай төлөөлөхөөс гадна тооллогоор цуглуулсан өгөгдлөөс санамсаргүй сонгосон учраас ямар нэг түүвэр сонголтын гажуудалгүй өгөгдөл болж чадна.

Судалгааны үр дүнд үндэслэн 2010-2020 оны хооронд хүн амын дунд явагдсан нийгмийн шилжилтийн талаар дараах дүгнэлтүүд гарч байна.

Үе доторх нийгмийн шилжилтийн хувьд

Манай улсын хувьд албан боловсролын хамралт өндөр байдаг учраас ялангуяа өсвөр насны хүүхэд залуусын дунд боловсролын түвшин дээшлэх шилжилт сайн явагджээ. Гэхдээ боловсролын үе доторх шилжилт хүн амын бүлгүүдээр нэлээд ялгаатай байна. 2010-аас 2020 он хүртэлх арван жилийн

хугацаанд ерөнхийдөө эмэгтэйчүүд боловсролоо эрэгтэйчүүдээс илүү дээшлүүлжээ. Ялангуяа 1985 оноос хойш төрсөн эмэгтэйчүүд илүү олноор их дээд сургууль төгссөн бөгөөд тэдний боловсролын түвшин үеийнхээ эрэгтэйчүүдээс илүү хурдтай дээшилсэн байна.

Үе доторх боловсролын шилжилт төрсөн байршлаар бас нэлээд ялгаатай явагдсан байна. Тухайлбал, 1975-1984 онд хөдөөд төрсөн хүмүүсийн боловсрол бусад газар төрсөн үеийнхээ хүмүүсээс илүү дээшилсэн бол 1985 оноос хойш хөдөөд төрсөн хүмүүсийн боловсрол бага ахижээ. Мөн 2010 онд Улаанбаатар, Ховд, Баян-Өлгий, Говь-Алтай Дархан-Уул аймагт амьдарч байсан хүмүүсийн боловсрол дараагийн 10 жилд хамгийн их дээшилсэн бол Сүхбаатар, Хэнтий, Дорнод, Хөвсгөл, Сэлэнгэ аймгийн иргэдийнх хамгийн бага дээшилжээ. Нүүн шилжсэн иргэдийн нөлөөг хасаж тооцсон ч аймгуудын энэ ялгаа өөрчлөгдөхгүй байна. Зөвхөн нийслэлийг аваад үзэхэд ч хаана амьдарч буйгаас хамаарч иргэдийн боловсролоо ахиулах боломж ихээхэн ялгаатай байна. Жишээлбэл, 2010 онд нийслэлийн гэр хороололд амьдарч байсан хүүхэд залуусын боловсрол орон сууц, хауст амьдардаг үеийнхнээсээ эрс бага дээшилсэн байна. Мөн эмзэг бүлгийн өрхийн хүүхэд, залуусын боловсрол дээшлэх нь үеийнхнээсээ бага явагджээ.

Боловсролын үе доторх шилжилтийн дээрх хандлагууд харьцангуй хэмжилтээр ч тодорхой харагдаж байна. Эмэгтэйчүүд, тэр дундаа, 1990 оноос хойш төрсөн

эмэгтэйчүүд боловсролоороо нийт хүн амд эзлэх харьцангуй байраа ихээр урагшлуулсан бол 1995 оноос төрсөн эрэгтэйчүүдийн боловсролын эрэмбэ ухарчээ. Мөн 1975-1985 онд хөдөөд төрсөн хүмүүс боловсролын эрэмбээ илүү урагшлуулах нь их байсан боловч түүнээс хойш хөдөөд төрсөн хүмүүсийн боловсролын эрэмбэ ихээр ухарчээ. 1970-1995 онд Улаанбаатарт төрсөн хүмүүст боловсролын харьцангуй уруудалт хамгийн бага байжээ. Энэ нь хөдөөд төрсөн хүмүүс 2010-2020 онд боловсролоо дээшлүүлэхэд бага анхаарсныг харуулж байна. Хөдөөд болон сумдад төрсөн хүмүүс томоохон хот, сууринд төрсөн хүмүүсийг бодвол боловсролын хувьд нийгэмд эзлэх байр суурь доошлох магадлал маш өндөр байна.

Хөдөлмөр эрхлэлтийн хувьд 2010-2020 онд өгсөх шилжилт давамгайлжээ. Гэхдээ хүн амын бүлгүүдээр энэ шилжилт нэлээд ялгаатай явагдсан байна. Залуу үеийнхэн хөдөлмөрийн зах зээл дээр үнэмлэхүй өгсөх шилжилт илүү хийсэн бол ахмад үеийнхэн үнэмлэхүй уруудах шилжилт илүү хийсэн байна. Хөдөлмөр эрхлэлтийн статусын хувьд, 1960-1970 он ба 1990-ээд онд төрсөн эмэгтэйчүүд нь үеийнхээ эрэгтэйчүүдтэй харьцуулахад, цалин хөлсгүй ажлаас цалин хөлстэй ажилд дэвшсэн хувь бага бол 1970-1990 онд төрсөн эмэгтэйчүүдийн хувьд өгсөх шилжилт илүү явагджээ. Харин 1960-1965 онд төрсөн эмэгтэйчүүдийн хувьд хөдөлмөр эрхлэлтийн статус буурсан хувь нь үеийнхээ эрэгтэйчүүдийнхээс илүү бол 1965-1990 онд төрсөн эрэгтэйчүүдэд хөдөлмөр эрхлэлтийн статус доошлох нь илүү байжээ. Нас

залуу байх тусам эмэгтэйчүүдийн ажил мэргэжлийн түвшин өгсөх магадлал үеийнхээ эрэгтэйчүүдтэй харьцуулахад улам нэмэгдэж байна. Гэхдээ ажил мэргэжлийн түвшин уруудах магадлал эмэгтэйчүүдийн хувьд эрэгтэйчүүдийнхээс илүү, тэр дундаа ахмад насны эмэгтэйчүүдийн хувьд уруудах хандлага бүр их байна.

Нийслэл, хот суурин газар төрсөн бүх насны бүлгийн хүмүүс хөдөлмөрийн зах зээл дээр илүү хөдөлгөөнтэй, өгсөх болон уруудах шилжилт хийх магадлал нь хөдөөд төрсөн хүмүүсийнхээс илүү байна. Нас залуу байх тусам энэ цэвэр зөрүү улам өсөх хандлагатай байна. Бүх насны бүлгийнхний ажил мэргэжлээ дээшлүүлэх боломж нь Улаанбаатарт хамгийн их байсан бол Дархан-Уул, Орхон, Говьсүмбэр зэрэг том хотууд, уул уурхайн үйл ажиллагаа идэвхтэй явагдаж буй Өмнөговь аймагт ажил мэргэжлийн түвшнээ дээшлүүлсэн хувь 1990 оноос хойш төрсөн хүмүүсийн хувьд нэлээд өндөр байна. Нийслэл дэх ажил мэргэжлийн түвшний шилжилтийг тодруулбал, боловсролын үе доторх шилжилтийн адилаар, орон сууцанд амьдардаг хүмүүсийн ажил мэргэжил илүү дээшилсэн бол гэр хороололд амьдардаг хүмүүсийн шилжилт харьцангуй бага, нас залуу болох тусам энэ ялгаа нэмэгдэж байна. Эмзэг бүлгийн өрхийн гишүүд боловсролын түвшний хоцрогдлоос шалтгаалаад хөдөлмөрийн зах зээл дээр ажил мэргэжлээ ахиулах боломж үеийнхнээсээ нэлээд доогуур байна.

Ажил мэргэжлийн түвшний панел үнэлгээнээс үзвэл, 2010-аас 2020 онд хүмүүсийн ажил мэргэжлийн түвшин

дээшлэхэд хугацааны тогтмол нөлөө буюу нийт хүмүүсийн нас, туршлага нэмэгдэх, хувь хүний тогтмол нөлөө буюу эмэгтэй байх, кохорт бүлэг буюу нас, туршлага илүү буюу 1980 оноос өмнө төрсөн байх зэрэг нь хүчтэй эерэг нөлөөлдөг байна. Мөн тухайн хүн нийслэлд, эсвэл сумын төвд амьдардаг байх, ам бүлийн тоо цөөн байх нь ажил мэргэжлийн түвшин ахихад нөлөөлжээ. Гэхдээ ажил мэргэжлийн түвшин дээшлэхэд дээд боловсролтой байх нь хамгийн хүчтэй нөлөөлдөг байна.

Ажил мэргэжлийн түвшний харьцангуй шилжилтийн хувьд, бүх насны бүлгийн эмэгтэйчүүдийн ажил мэргэжлийн түвшний харьцангуй өгсөлт буюу ажил мэргэжлийн түвшний эрэмбэ нь үеийнхээ эрэгтэйчүүдээс 10 гаруй пунктаар илүү байна. Мөн энэ харьцангуй өгсөлт хөдөө төрсөн хүмүүст хамгийн бага, Улаанбаатарт төрсөн хүмүүст хамгийн их явагджээ. Ерөнхийдөө нас залуу байх тусам ажил мэргэжлийн түвшин харьцангуй өгсөх магадлал нэмэгдэж байна.

Тооллогод хамрагдсан иргэдийн сууцны мэдээллийг ашиглан хөрөнгийн оноог нь ойролцоогоор тооцож эрэмбэлсэн харьцуулалтаас харахад, 2010-2020 онд хөрөнгө хамгийн багатай болон хамгийн ихтэй бүлгүүд тэр хэвээрээ үлдэх магадлал өндөр, дундаж бүлгүүд хоорондоо солигдох нь их байжээ. Хөрөнгийн энэхүү харьцангуй шилжилт боловсролын түвшин, нас, төрсөн газар, одоо амьдарч байгаа хамаарч ихээхэн ялгаатай явагдсан бол хүйсийн хувьд зөрүү харьцангуй бага байна. Бага боловсролтой, хөдөө амьдарч буй хүмүүс хөрөнгийн эрэмбээр

ихээхэн ухарчээ. Гэхдээ энд хөрөнгийг зөвхөн сууцны нөхцлөөр төлөөлүүлж хэмжсэн, бусад үл хөдлөх, хөдлөх, санхүүгийн хөрөнгийг хамруулаагүй гэдгийг анхаарах нь зүйтэй.

Үе хоорондын нийгмийн шилжилтийн хувьд

Хүүхдүүдийн нийгмийн статус эцэг эхтэйгээ харьцуулахад хэрхэн дээшилснийг үе хоорондын шилжилтээр харуулдаг. Гэхдээ бидний ашиглаж буй тоон өгөгдөл 2010 ба 2020 оны хоорондох 10 жилийн хугацааг хамарч байгаа учраас бид энэ судалгаанд 2010 онд эцэг эхтэйгээ хамт амьдарч байсан 11-20 насны хүүхэд залуусын нийгмийн статус 2020 онд 21-30 настай болсон хойноо эцэг эхийнхээ нийгмийн статусаас хэрхэн дээшилснийг тодруулж авч үзлээ.

Үе хоорондын шилжилтийн шинжилгээнээс харахад, 2020 оны байдлаар 21-30 настай залуусын 31.9% эцэг эхээсээ илүү боловсролтой болжээ. Гэхдээ эмэгтэйчүүдийн боловсролын үе хоорондын өгсөлт эрэгтэйчүүдээс илүү явагдсан бол хөдөө төрсөн хүмүүс эцэг эхээсээ өндөр боловсролтой болох хандлага нь нийслэлд төрсөн хүмүүсийнхээс илүү өндөр байжээ. 2010-2020 онд баруун аймгуудад амьдарч буй хүмүүсийн боловсролын үе хоорондын өгсөлт илүү явагдсан байна. Нийслэлд 2010 онд гэр хороололд амьдарч байсан хүүхдүүдийн боловсролын үе хоорондын өгсөлт орон сууцанд амьдарч байсан хүүхдүүдийнхээс эрс өндөр байна. Гэхдээ энэ нь гэр хороололд амьдарч байгаа хүүхдүүд боловсролоо ахиулах

боломжоор илүү хангагдсан гэхээсээ илүүтэй тэдний эцэг эхчүүд харьцангуй доогуур боловсролтой учраас хүүхдүүд нь эцэг эхийнхээ боловсролыг давахад хялбар байсантай холбоотой.

Боловсролын үе хоорондын үнэмлэхүй өгсөлт 31.9%, харьцангуй өгсөлтийн дундаж 45.3% байна. Үе хоорондын корреляц эсвэл үе хоорондын регрессийн коэффициент 0.62 гарсан. Энэ нь тухайн хүүхдийн боловсролын түвшин нь эцэг эхийнхээ боловсролын түвшнээс хамаарах нөлөө ихтэй (persistence) байгааг харуулж байна. Дэлхийн Банкнаас хийсэн судалгаанд, Монгол Улсын хувьд 1980-аад онд төрсөн хүмүүсийн хувьд боловсролын үнэмлэхүй шилжилтийг хэмжсэн регрессийн коэффициент нь 0.55-0.66 интервалд буюу ихээхэн дээгүүр түвшний шилжилттэй байна гэж хэмжигдсэн (Weide et al.,2021) бол бидний хэмжсэнээр нийт 1915 - 2010 онуудад төрсөн хүмүүсийнх 0,3 интервалд байна.

Боловсролын үе хоорондын энэхүү шилжилт ажил мэргэжлийн түвшний үе хоорондын шилжилтэд шууд тусгалаа олжээ. 21-30 насны эмэгтэйчүүд үеийнхээ эрэгтэйчүүдтэй харьцуулахад, эцэг эхээсээ илүү өндөр түвшний ажил мэргэжилтэй байх магадлал маш их байна. Сумын төв, хөдөөд төрсөн хүмүүсийн ажил мэргэжлийн үе хоорондын өгсөлт доогуур байна. Хөдөө орон нутагт төрсөн байх нь тухайн хүн ажил мэргэжлээ дээшлүүлэх боломжийг (үе доторх өгсөлт) хязгаарлахаас гадна, эцэг эхийнхээ эрхэлж байснаас илүү сайн ажил олж хийх (үе хоорондох өгсөлт) боломжийг хязгаарладаг нэг гол

хүчин зүйл болдог ажээ. Ерөнхийдөө нийслэлээс алслагдах тусам ажил мэргэжлийн хувьд эцэг эхээсээ өндөр түвшний ажил эрхлэх магадлал буурч байна. Хөдөө орон нутагт хөдөлмөрийн зах зээл бага, ажил мэргэжлээ ахиулах боломж хязгаарлагдмал байдаг нь үүнд нөлөөлсөн. Улаанбаатарын гэр хороололд амьдардаг залуус эцэг эхээсээ илүү өндөр түвшний ажил эрхэлдэг байх магадлал нь орон сууцанд амьдардаг залуусынхаас өндөр байдаг ажээ.

Хэмжилтийн үр дүнд, хөрөнгийн үе хоорондын өгсөх шилжилт 45.1% гарч байна. Энэ нь хүүхдүүдийн 45.1 хувь нь хөрөнгийн эрэмбээрээ эцэг эхчүүдийнхээ 10 жилийн өмнөх эрэмбээс урагшилж чадсан, үлдэх 54.9 хувь нь эцэг эхийнхээ эрэмбээс доогуур эрэмбэтэй байна.

Шилжин ирэгсдийн дунд явагдсан нийгмийн шилжилтийн талаар

2010 онд нийт хүн амын 9.5% нь сүүлийн 5 жилд өөр газраас нүүж ирсэн хүмүүс байсан бол 2020 онд энэ үзүүлэлт 3.2% болж буурчээ. 2005-2010 болон 2010-2020 онд шилжилт хөдөлгөөнд оролцсон, залуу үеийнхний боловсролын түвшин нь огт шилжээгүй болон шилжиж ирээд удсан (2005 оноос өмнө шилжиж ирсэн) хүмүүстэй харьцуулахад илүү дээшилсэн. Шилжиж ирээд удаагүй хүмүүсийг тодруулбал, нийслэлээс аймагт шилжигсдийн дунд боловсролын өгсөлт бусдаас бага явагдсан бол гадаадаас ирсэн болон аймгаас нийслэл рүү шилжигсдийн дунд

боловсролын түвшин илүү дээшилжээ. Ерөнхийдөө шилжин ирэгсдийн боловсролын түвшин шилжээгүй хүмүүсийнхээс өндөр байгаа боловч 1990 оноос хойш төрсөн, шилжин ирсэн эмэгтэйчүүд шилжин ирсэн эрэгтэйчүүдээсээ илүү боловсролоо дээшлүүлжээ.

Боловсролын түвшний адилаар ерөнхийдөө шилжин ирсэн хүмүүсийн хувьд ажил мэргэжлийн түвшний өгсөлт илүү байна. Нас залуу байх тусам шилжин ирээд удаагүй хүмүүсийн ажил мэргэжлийн түвшний өгсөлт огт шилжээгүй болон шилжин ирээд удсан хүмүүсийнхээс илүү байна. Тэр дундаа гадаадаас шилжин ирээд удаагүй байсан, 1960-1980 онд төрсөн хүмүүс ур чадвар, албан тушаалын хувьд бусад шилжигсдээс илүү ахижээ. Хүйсээр харьцуулбал, эмэгтэй шилжигч ажил мэргэжлээ ахиулах хандлага нь эрэгтэй шилжигчийнхээс нэлээд өндөр байдаг байна.

Судалгаанаас гарах зөвлөмжийн хувьд нийгмийн шилжингэ хөдөлгөөний 10 жил тутамд сайтар хэмжиж, нөлөөлж байгаа хүчин зүйлсүүдийг сайтар тогтоож байх шаардлагатай байна. Иргэд боловсрол, ажил эрхлэлт, орлогын хувьд хир зэрэг ахиж дэвшиж эсвэл уруудаж байна гэдгийг тогтоохын тулд дата өгөгдлийн чанарыг сайжруулах хэрэгтэй байна. Тухайлбал, хөрөнгө баялгийн хувьд нийгмийн шилжингэ хөдөлгөөнийг зөв тооцохын тулд зөвхөн орон сууцны байдлаас гадна иргэдийн эзэмшиж байгаа малын тоо, хадгаламжийн хэмжээ, хөдлөх хөрөнгийн талаарх мэдээлэлийг нэгтгэн уг судалгаанд санал болгон хэрэглэсэн

аргыг ашиглан дахин хэмжилт хийх нь уг судалгааны гажилтыг засварлах юм.

Судалгаа тооцоо сайн хийгдвэл цаашдын нийгэм, эдийн засгийн бодлогуудыг сайжруулж хэрэгжүүлж боломж бүрдэнэ. Тухайлбал, боловсролын, идэвхтэй хөдөлмөрийн зах зээлийн болон сангийн бодлого: төсвийн зарцуулалтын бодлого, татварын бодлого ямар нөлөө үзүүлж байгааг сайтар судлах хэрэгтэй байна. Судлаачдын болон Олон улсын байгууллагуудын хийсэн судалгаанаас харахад нийгмийн шилжингэ хөдөлгөөний бууралт, ухралтыг сайжруулдаг санал нэгтэй дэмжигддэг аргууд цөөн боловч зах зээлийн шударга өрсөлдөөн, эдийн засгийн өсөлтийг дэмждэг аливаа бодлогууд, макроэдийн засгийн тогтвортой байдал, гадаадын шууд хөрөнгө оруулалтын таатай орчин, дэлхийн зах зээлд холбогдсон байдал зэрэг бодлогууд илүү нөлөөлтэй байгаа гэж Narayan, Weide, Cojocaru, Lakner, Redaelli, Mahler, Thewissen (2018) нар дүгнэсэн юм. Тиймээс зөвлөмжийн хувьд эдгээр бодлогууд чухал гэдгийг дахин дурьдах нь зүйтэй юм. Нийгмийн халамжийн бодлогууд, хүүхдийн мөнгө зэрэг бодлогууд нь нийгмийн шилжих хөдөлгөөнд урт хугацаанд ямар нөлөө үзүүлж байгаа талаар судалгаа ховор байгаа тул энэ чиглэлээр Монгол улсад нарийн сайн судалгаа хийх хэрэгтэй юм.

АШИГЛАСАН ЭХ СУРВАЛЖ

- Asian Development Bank. (1992). *Mongolia: A Centrally planned economy in transition*. Oxford: Oxford University Press.
- Black, S., & Devereux, P. (2010). Recent Developments in Intergenerational Mobility. *NBER Working Paper 15889*.
- Chetty, R., Grusky, D., Hell, M., Hendren, N., Manduca, R., & Narang, J. (2017). The Fading American dream: Trends in absolute income mobility since 1940. *Science*, No. 356, 398-406.
- Corak, M. (2013). Income Inequality, Equality of Opportunity, and Intergenerational Mobility. *Journal of Economic Perspectives* 27(3), 79-102.
- Corak, M., & Heisz, A. (1998). The Intergenerational Earnings and Income Mobility of Canadian Men: Evidence from Longitudinal Income Tax Data. *Journal of Human Resources*, 34 (3), 504-533.
- Emran, M. S., Greene, W., & Shilfi, F. (2016). *When Measure Matters: Coresidency, Truncation Bias, and Intergenerational Mobility in Developing Countries*. Washington, DC: World Bank.
- Goldthorpe, J. H. (1987). *Social Mobility and Class Structure in Modern Britain, 2nd edn*. Oxford: Clarendon Press.
- Halikias, D., & Reeves, R. V. (2016). *How Many People Are Better Off Than Their Parents? Depends on How You Cut the Data*. Brookings.
- Helliwell, J. F., & Putnam, R. D. (1999). Education and social capital. (Working Paper No. 7121). Retrieved from the National Bureau of Economic Research website: <http://www.nber.org/papers/w7121>.
- Hochschild, A. (2018). *Strangers in Their Own Land: Anger and Mourning on the American Right*. The New Press.
- Lam, N. T., & Cuong, N. V. (2019). Intragenerational and Intergenerational Mobility in Viet Nam. P. J. (editors) Bihong Huang-Д, *Demystifying Rising* (хуудсд. 273-327). Tokyo: Asian Development Bank Institute.
- Merton. R.K.(1967) *On theoretical sociology. Five essays, old and new*. Toronto: The Free Press
- Merton.R.K. (1957) *Social theory and Social structure*. Illinois: The Free Press
- Narayan, A., Weide, R. V., Cojocaru, A., Lakner, C., Redaelli, S., Mahler, D. G., . . . Thewissen, S. (2018). *Fair Progress? Economic Mobility across Generations around the World*. Washington, DC: World Bank.

- Parsons.T (1936) Structure of social action. N.Y: McGraw-Hill
- Parsons. T (1953). "Working papers in the theory of action". Free Press.
- Parsons.T (1966) Societies: Evolutionary and comparatives. Englewood: Prentice-Hall.
- Ritzer G. (1996) *Sociological theory*. The McGraw- Hill Companies, Inc.
- Rutstein, S., & Johnson, K. (2004). *The DHS Wealth Index*. Maryland: ORC Macro.
- Steiner-Khamsi, G., & Stolpe, I. (2006). Educational import. Local encounters with global forces in Mongolia. New York: Palgrave Macmillan.
- Solon, G. (2013). Cross-Country Differences in Intergenerational Earnings Mobility. *Journal of Economic Perspectives* 16(3), 59-66.
- Stolpe., I. (Feb 2016) Social versus Spatial Mobility? Mongolia's Pastoralists in the Educational Development Discourse. Open access journal. Vol 4. No 1(2016)
- Torche, F. (2015). Analyses of Intergenerational Mobility: An Interdisciplinary Review. *ANNALES, AAPSS* 657.
- Ts. Tsetsenbileg (2018) Changes of rural lifestyle of Mongolia in XXI century. Ulaanbaatar: Soymbo printing;
- Tsogbadrakh. Kh. (2017). Intangible capital evolution shaped by higher education: A path dependency analysis of Mongolia. A dissertation manuscript. Retrieved from <https://www.proquest.com/openview/1bb2d6a41994b2bce8cb91f8caec2f7/1?pq-origsite=gscholar&cbl=18750&diss=y>
- USAID. (2020). *Guide to DHS Statistics*. Maryland: United States Agency for International Development.
- Weide, R. v., Lakner, C., Mahler, D. G., Narayan, A., & Ramasubbaiah, R. (2021). Intergenerational Mobility around the World. *Policy Research Working Paper, No. 9707*, 1-47.
- Амбросов АА (1978) От классовой дифференциации к социальной однородности общества. М: Прогресс
- Бурдые. П. (1993) Социология политики. Пер с фр. М: Наука
- Вебер. М. (1990) *Избранные Произведения*. Пер. с нем. М.: Прогресс.
- Володина А И (1982) Утопический социализм. М: Наука
- Гүндсамбуу, Х. (2021). *Монголын нийгмийн давхраажил: хөгжил, хандлага* (XX зуун) (Б. Анхны хэвлэл 2002 он). Цогц хөгжлийн үндэсний төв.
- Дюркгейм.Ү (1990) *О разделении общественного труда*. Метод социологии Пер.с фр.-М., Наука
- Манлайбаатар., З,Отгонтөгс, Б. (2023). Эдийн засаг: Онол, практик. 2023 оны 6 дугаар сар, Дугаар 36
- Мөнхбат, О. (2000) Социаль бүтцийн социологи. УБ: МУИС-ийн Хэвлэх үйлдвэр



- ТЭЗУХ. (1988). *БНМАУ-ын хүн ам, орон сууцны 1989 оны тооллого явуулах журам, тооллогын хуудас нөхөх заавар*. Улаанбаатар: Төлөвлөгөө, эдийн засгийн улсын хороо.
- тэнхим, М.-и. Н.-и. (1996). *Монголын нийгмийн дотоод ялгарал социологийн судалгаа*.
- Өлзийсайхан. Д. (2004). Ардчилал: сэхээтний нийгмийн төлөв. УБ.тал 82
- Пүрэв. Ц. (2013) Монголын нийгмийг социологиор шинжлэхүй. УБ: АМЖА Принтинг
- Уртнасан. Ц. (2017) . Монголын нийгмийн бүтцийн судалгаа, шинжилгээ. УБ:Соёмбо принтинг ХХК
- ШУА, Философи, социологи, эрхийн хүрээлэн (1993) Нийгмийн бүтцийн өнөөгийн төлөв хандлага
- ҮСХ. (2011). *Хүн ам, орон сууцны 2010 оны улсын тооллого: Шилжих хөдөлгөөн, суурьшил*. Улаанбаатар: Үндэсний статистикийн хороо.
- ҮСХ. (2020). *Хүн ам, орон сууцны 2020 оны улсын ээлжит тооллогын нэгдсэн дүн*. Улаанбаатар: Үндэсний статистикийн хороо.

ХАВСРАЛТ



Зураг 1. Боловсролын үе доторх үнэмлэхүй өгсөлт, насаар (“сул” тодорхойлолт)



Зураг 2. Боловсролын үе доторх үнэмлэхүй өгсөлт, хүйс, байршил (“сул” тодорхойлолтоор)



Зураг 3. Үе доторх боловсролын үнэмлэхүй өгсөлт, 2020 оны тооллогод хамрагдсан аймаг, төрсөн оны бүлгээр




Хүснэгт 1. Хөдөлмөр эрхлэлтийн өгсөх шилжилтийн пробит үнэлгээ

Тайлбарлах хувьсагч	Хамаарах хувьсагч		
	Хөдөлмөр эрхлэх статус	Ажилладаг салбар	Ажил мэргэжлийн түвшин
Хүйс: Эрэгтэй (Эмэгтэй = 0)	0.028*** (0.005)	- 0.030*** (0.005)	- 0.102*** (0.006)
Ам бүлийн тоо	0.004*** (0.001)	0.005*** (0.001)	- 0.011*** (0.002)
Боловсрол (Суурь боловсролоос доогуур түвшин = 0)			
Дунд	0.588*** (0.012)	0.545*** (0.011)	0.783*** (0.019)
Дээд	0.363*** (0.013)	0.251*** (0.012)	1.009*** (0.019)
Төрсөн байршил (Нийслэл = 0)			
Аймгийн төв	-0.102*** (0.006)	-0.005 (0.006)	-0.178*** (0.007)
Тосгон	-0.208*** (0.015)	-0.114*** (0.015)	-0.240*** (0.018)
Сумын төв	- 0.226*** (0.008)	- 0.107*** (0.008)	- 0.269*** (0.009)
Хөдөө	-0.639*** (0.009)	-0.505*** (0.008)	-0.638*** (0.011)
Кохорт бүлэг (1960-69 он = 0)			
1970-79	0.332*** (0.008)	0.310*** (0.008)	0.258*** (0.010)
1980-89	0.674*** (0.007)	0.702*** (0.007)	0.607*** (0.009)
1990-94	1.195*** (0.008)	1.241*** (0.008)	1.036*** (0.010)
Тогтмол	-1.618*** (0.015)	-1.633*** (0.015)	-2.170*** (0.022)
Ажиглалтын тоо	352,395	352,395	352,395
Псевдо R2	0.108	0.110	0.097

Эх сурвалж: Хүн ам, орон сууцны тооллогын анхдагч өгөгдөлд үндэслэсэн судлаачийн тооцоо

Зураг 4. Боловсролын үе хоорондын харьцангуй өгсөлт, аймаг нийслэлээр, хувь



Зураг 5. Хөрөнгийн үе хоорондын харьцангуй өгсөлт, аймаг нийслэлээр, хувь

